

## WOTET

### *Yowbad Kululuwan Bwanabwein*

<sup>1-2</sup> Kalin nuwag Tiyopil yakoum. Kweitan livan kweiboug nalel neiw. Let towen wanuwan nalel livanen Yeisuw. Yeisuw isilamaw nawotet babaw o nageiguy, iwwotet ee... tutan iyakous nakatimlakay nagamag wasigeis, mo imwen in walbalab. Peinan bo nikatigikes nagamag tasiyas silmanin anilivan bikokews; ikatimlakes waseg Kululuwan Yowbad, ikous, mo imwen in walbalab.

<sup>3</sup> Peinan kweiboug mwasanin niyagages Yeisuw, imat, ikit vayuwein; sona mwamovan mo inekes nagamag tasiyas; ikines nawotet tawtouna singay; e, tasiyas isimounids bo imov, peinan siney inounas sinawavas yam waseg, ikkines Yeisuw, o sinapun Yowbad inakaleiwag Yeisuw bo ikatimlakes.

<sup>4</sup> Misumkwey siney nagamags nikatuyouns nis-esus, Yeisuw idibakes, ilana, “Awoum kunounas; tage kukwayamats Yelusalem waseg; Tamag mo bikayeb teitan gamag biwekeimiy vagan kid bilabeimiy; kweiboug nikatigik mawan, o yey nadibakeimiy mawan.

<sup>5</sup> “Peinan kweiboug Yon nibaptayses gamags, soup waseg; tage igaw tut nag biveiyov, Yowbad mo bibaptayseimiy yakamiy, waseg kululuwan tatonen.”

### *Yeisuw imwen in walbalab*

<sup>6</sup> Katuyouns tasiyas mo ikatiganes Yeisuw, ilansa, “Tamwey, tabta bukuvag vayuwein bitaw-toun dakaleiwags, yakids min-Yisleil, mawana kweiboug? Tut townen bukuvag mawan? o nag? igaw?”

<sup>7</sup> Yeisuw ikatimop asilivan, ilana, “Tamag nawotet townen. Nag kadilokeimiy bukukwakins avei-tut o avei-yam Yisleil vayuwein mo bitaw-toun; peinan takaleiwag anmwanet Tamag.

<sup>8</sup> “Tage yakamiy miwotet kweitan. Igaw Kululuwan Townen Bwanabwein biwekeimiy, bikimtuweimiy yagan bukusekes livaneig min-Yelusalem wasigeis, o min-Yudiy asibabaw-wan, o min-Samaliy wasigeis, o vena babaw wadaban pwepway.”

<sup>9</sup> Igawa illivan mawan o ikkines; Yowbad mo ikow, inow, ilakanig-o lov kweitan wanuwan.

<sup>10-11</sup> E, iyeys, ikakins walbalab, Yeisuw nilakanig yay; nuwanaw mo itamanaws wadides tawaw asteiy, asikweim pwapwakaw. Tasiyas mo ilivans, ilansa, “Min-Galiliy yakamiy, aveiyag wawun kutomos kukwakins walbalab? Townen Yeisuw mwana nilisaweimiy nein walbalab, igaw mawan, mo beiyum bimekeimiy. Mawana nein, e, beiyum beim mawan-wan, ankakin katanok-wan.”

### *Atimapun Yudas*

<sup>12</sup> Ikous, ilisawes koy townen, yagan Oliv, iyums ineis Yelusalem. Ked townen nag biveiyov, kadiyakus-wan, kadiloka gamag binoun yam Tapwaloul waseg.

<sup>13</sup> Iyums, mo isiws wasibunatum to nisikeyas, mo innavaws kasiyuwein waseg, tasiyas Pita, Yon, Yemes, Andiluw; tasiyas Pilip son Tomas; tasiyas Batolomiw son Matiw; Alpiyow natun towen Yemes; talliwon towen yagan Saymon; o Yemes natun towen Yudas.

<sup>14-16</sup> Asibabaw tasiyas, ninous kid katanok-wan vagan bininitougs Yowbad waseg. Sisiyas vinay mwasanin, sisiy Yeisuw inan Meliy, siney Yeisuw budan. Babiweis mamagin lakututan sinawey. Misiyamun towen, kweitan yam waseg, Pita mo itamanaw wanuwein gamag siyas babaw, ilana, “Budag yakamiy, kweiboug Yowbad Kululuwan ikatipel ansinap isek Deibid, mo ikatigik nawotet Yudas, towen talabein siyas niyousis Yeisuw; o Deibid anilivan towen nein Bukitab waseg. O kadilok youd siyas bikamats mawan Deibid anilivan kweiboug.

<sup>17</sup> “O towen Yudas sods nitasesus, o datoveks nisek inawotet, mawana yakids.

<sup>18-19</sup> “O towen gog isilakod Yeisuw waseg, mo ikow maysan nawotet towen, igimwel pwepway kweitan. Wankuyeim mo ikalouw kantukov wapwepway towen, nuwan ikatuw, sinewun isap in wamnat. O min-Yelusalem babaw ikakins, mapun idokes pwepway ‘Akeldamak.’ (Kativin bein aga-Muyuw ‘Buyav pwapwayein’).

<sup>20</sup> “O livanen Yudas nises Bukitab, kweitan Sam waseg, mawana,  
 ‘Kadiloka naven bikalipet; awoum teitan gamag bisik.’  
 E, kweitan livan nises,  
 ‘Kweitan gamag bikow nawotet.’ ”

<sup>21-22</sup> Pita mo ilivan, ilana, “Kadiloka tan-  
eves atimapun Yudas, kavel tut babaw sods  
nitasesus; nitakines Yon igaw kweiboug ni-  
baptayses gamags, o nitakines daGuyaws Yeisuw,  
yam babaw ininoun ee... tutan ilivet mo imwen  
in walbalab. O sods towen bitakokews livanen  
Yeisuw nakabeikit waseg; e, bitaneves mtowen  
atimapun Yudas.”

<sup>23</sup> E, iliganes Pita anilivan, isenas tawaw asteiy;  
teitan Yosep, yagan pinatoun, kweitan yagan  
Basabas, kweitan yagan Yusitos; tayuwein isenas  
yagan Matiyas.

<sup>24-25</sup> Ikous, mo ikululs Yowbad wamatan, ini-  
tougs, ilansa, “O Guyaw, kukwakina gamag  
babaw amasinap, kwatimlakem mukwaleiwag  
wasigeis tasiyas asteiy, kal atimapun Yudas  
bikow nawotet, takawein amlivan; peinan Yudas  
bo ipiyeve nawotet towen, inoun in inaven kwei-  
tan.”

<sup>26</sup> Wankuyeim mo ileles yiges tasiyas asteiy,  
akweiy youd waseg, mo ilaves makaw; ikalouws,  
o yagan Matiyas isin wanakaew, mapun Matiyas  
isiw inekes tasiyas takaweins livanen Yeisuw;  
tasiyas sinawatan tatanok.

## 2

### *Kululuwan Towen Bwanabwein isap*

<sup>1</sup> Pentikos anayam waseg, Yeisuw nagamag  
asibabaw-wan, katanoka bunatum waseg nis-  
esus.

<sup>2</sup> But meinoy neim walbalab, singay nuwanaw  
inekes; idokes yag itow avakaekin; bo iyavkavek  
bunatum towen nisinis wanuwan.

<sup>3</sup> Wamtes gog mamagina mayen kov, ililivis in palatan palatan, mo itonas wasigeis gamag katanok katanok.

<sup>4</sup> Yowbad Kululuwan Townen Bwanabwein bo inekes, asibabaw-wan, mo igeiguys, asilivan kweitan kaeig kweitan kaeig, peinan asisinap bo isekes Kululuwan Yowbad.

<sup>5</sup> Misumkwey townen vena babaw gimgilis nimeis sagal townen silmanin, nisesus Yelusalem, tawaw bwanabweins, gimgilis vena babaw wadaban pwepway.

<sup>6</sup> Butun townen iliganes; ikatuyouns nimeis, bo iyow nuwes peinan asibabaw iliganes ages tatineis.

<sup>7-11</sup> Singay isom ninous, ilansa, “Adok tasiyas asibabaw-wan min-Galiliy ne? Amawan asilivan nitaliganes teitan gamag aygan tonen, teitan gamag aygan tonen; tage yakids aygads babaw, peinan davanuys babaw, Palit, Mediy, Elam, Mesopotemiy, Yudiy, Kapadokiy, Ponit, Esiy, Piligiy, Pampiliy, Yidipt; o wawnuwan Aplik ven mwasanin, Saylin walasin; o mina-Lom, mwasanin min-Yudiy nikoulups ineis Lom sisiy mina-Lom tasiyas nikawes min-Yudiy datapwalouls; o min-Kilit, o min-Alebiy; yakids babaw taliganes livanen Yowbad nawotet tawtoun, o babaw yakids taliganes aygads tatoneids waseg.”

<sup>12</sup> Bo isom ninous peinan nag ikakins silawun. Sisiyas ikatiganes, ilansa, “Aw-sinap townen?”

<sup>13</sup> Tage mwasanin isibawes, ilansa, “Bo ikabalaweins, peinan wayn neimoums adok.”

*Pentikos anayam Pita igeiguy*

14 Siney Yeisuw nagamag, tasiyas sinawatan tatanok, Pita mo itamanaw igeiguy, idibakes gamag babaw, ilana, “Sigwey min-Yudiy yakamiy, o Yelusalem gimgilis yakamiy babaw, kuliganes agulivan, mo bakatimlakeimiy sinap kweitan.

15 “Peinan kulivans, ‘Bo imoums wayn, ika-balaweins,’ nag; nag bakakabalawein, peinan igaw gaboug. Tasiyas bikabalaweins, wayn kwayav waseg beimoums mo bikabalaweins; tage yakamey bwein.

16-17 “Youd townen nukukines peinan palopit Yowel kweiboug-o nikatigik, ilana,

‘Yowbad anilivan mawana: Igaw nakabiyokous tut ven watinow, kululuwag bo basekes ven babaw gimgilis, nitimiyas, tawaw o vinays, mapuna bigeiguys agulivan waseg.

Tabwabwat wasigeis yakamiy bikines kweivaw youd, mamagina asmikon; ninous waseg bikakins; o tammwayas, asmikon waseg bikamikons.

18 O yam townen waseg kululuwag bo basekes gungamag, tawaws o vinays, mo bigeiguys.

19 Aniyag bo basen wanakaew walbalab, o ven watinow. Aniyag buyav waseg o kov son musewun waseg.

20 Kalas biladadub, o tibukon bilabwabwel mawana buyav.

Ikous, mo bikamat Guyaw Yowbad nawotet taw-toun, inayam townen waseg.

21 Guyaw townen bo bikatinabwes gamag tasiyas kalisiy bidawes yagan.’

<sup>22</sup> “Sigwey min-Yisleil yakamiy, kuliganes agulivan towen. Yowbad bo ikatimlakeids gum-Nasalet towen, yagan Yeisuw, naman mulin waseg, nawotet tawtoun, peinan Yowbad nisek natawtoun tonen silmanin wotet towen; o sods nitasesus, nawotet tawtoun nivvag, o babaw yakamiy kukwakins.

<sup>23</sup> “O kweiboug Yowbad ikakin-wan towen nawotet babaw bo biwtel ven watinow waseg; o Yowbad kweiboug nikaleiwag silmanin takalbalebs biyousis towen Yeisuw, bikatkavates waklos, mo bikatimates. O yakamiy miwotet mawan.

<sup>24</sup> “Tage Yowbad bo iyamov Yeisuw, kanig mou-vitan bo ilisow. Nag kadilok kanig bitawtoun Yeisuw waseg, nag.

<sup>25-28</sup> “Livanen mtowen kweiboug Deibid bo ilivan Yeisuw anilivan mamagina, ‘Tut babaw nakikineim yak gunguyaw yak wamatag.

Guntawtoun bisigeg, peinan yakoum wagunkatay nukuses.

Mapun, wadoug waseg allivan, peinan gumwasaw avakaein.

Igaw woug waseg nases ven watinow, bo banmiseim gunguyaw yakoum bukwatinabweig. Peinan kwayuseig, awoum kululuwag bisesuna watum.

Awoum woug beipwas; awoum.

Bo nukwatimlakeig ked towen kabmwamov kidenen.

Wamatam bo bukuvag gumwasaw bivakaein.’

<sup>29</sup> “Sigwey yakamiy, adok balivan livanen datoveks towen Deibid; livan kamnat balivan.

Towen Deibid bo ikanig, itakus wakalawagan waseg; e, alawag towen, igaw tut towen wadavanuys nises.

<sup>30</sup> “O peinan Deibid palopit, bo ikakin sinapun Yowbad; o Yowbad bo itabudabod, idibek Deibid, ilana,

‘Mounid wabuyavim igaw mo bisap tabum yakoum,

towen bo biguyaw, bikow kid mukwaleiwag.’

<sup>31</sup> “O kweiboug, peinan Deibid ikakin mtowen Kelis kanig bo bilisow, bitamanaw vayuwein, livanen bo ilivan mamagina:

‘Awoum bisesuna waTum. Awoum won beipwas; awoum.’

<sup>32</sup> “Yowbad gog nivag mtowen Yeisuw mo itamanaw vayuwein; o yakamey bo nakakin.

<sup>33</sup> “O tut towen, mtowen Yeisuw, Taman nisek nakaleiwag avakaein, o nises Taman wanakatay. O peinan Taman anilivan, bo bisek Kululuwan Towen Bwanabwein, nagein gog bo isek, katipel mo nisekem yakamey; nawotet towen kukines o kuliganes.

<sup>34-35</sup> “Deibid ta-imwen in walbalab; Yeisuw gog imwen in walbalab. Livanen Yeisuw nilivan mawana,

‘Yowbad bo idibek gunguyaw, ilana: Kusin wagunkatay.

Tage tasiyas nikamliweims igaw mo bavag beibus, bimplavags mamagina mukwabtatet.’

<sup>36</sup> “Kuliganes beibwein, o kadiloka min-Yisleil babaw yakamiy bukukwakins kamnat waseg,



Yowbad bo ikatigik guyaw teitan takatinabweids yakids, towen yagan Kelis, mtowen Yeisuw nukuweiys waklos.”

<sup>37</sup> Gamag tasiyas iliganes, bo igeg ninous, ibwayouys avakaein, ikatugwans waseg Pita siney Yeisuw nagamags, ilansa, “Tawaw, bo igak! Amawan bakavkek?”

<sup>38</sup> Pita ikatimop asilivan, idibakes, ilana, “Kulavewas amisinap kalbaleb, mo bakabaptayseimiy tatanok tatanok yakamiy, Yeisuw Kelis yagan waseg; mo biwid mikalbaleb, binumlev, nasiwayoub mo bisekeimiy, Kululuwan Town Bwanabwein.

<sup>39</sup> “Peinan Yowbad bo ilivnek mound bisiwyoubuds yakids sidayas nitidayas, o bisiwyoubus vena babaw gimgilis, kalisiy daGuyaws Yowbad bidawes. E, Kululuwan bo isekeids sidayas tasiyas.”

<sup>40</sup> Anilivan mawan mo igeiguy avakaein, idibakes, “Kadiloka kulavewas simiyas, peinan takakons tasiyas.”

<sup>41</sup> Gamag mwasanin iliganes anilivan; yam towen mo ibaptayses, mo iyakelesiys tasiyas, babiweis mamagina kweitoun tawsan gamag.

<sup>42</sup> Tasiyas bo itoukums. Yeisuw nagamags asilivan iliganes, o sisiyas tasiyas nisesus, ininitougs Yowbad waseg; o bled ikikivis, mawan asisinap.

### *Tayakelesiys asininap*

<sup>43</sup> Gamag babaw bo igoulus Yowbad; peinan ikines Yeisuw nagamag siwotet singaya tawtoun.

<sup>44</sup> O tasiyas tanageins livanen Yeisuw, sisiyas nisesus; o sivavag mamagina babaw gamag sivavag; nag kweitan ikayuses, nag.

<sup>45</sup> O sipwepway o siwliyoug iyamiyises, mayses ivganes tasimavs wasigeis.

<sup>46-47</sup> Yam babaw ikatuyouns tasiyas-wan, ineis Yowbad wanbunatum. Tage tatineis wasibunatum, bunatan bunatan, ikikivis bled; sisiyas ikamkwams, ikalin nuwes, bo imwasaws; ikavvasis Yowbad; o gamag babaw ikalin nuwes tasiyas. O yam babaw Guyaw Yowbad ikatinabwes gamag mwasanin; ikatimweisis nagamag bo ibabaw.

### 3

#### *Takagayal ivages mo ibwein*

<sup>1</sup> Kweitan yam, kalas bo itageg, tutan nitoug Yowbad wanbunatum, Pita son Yon mo ineis, nitoug silmanin.

<sup>2-3</sup> Teitan taw igaw kweiboug inan nikop yay igayal, bo ivakaein tage angayal isigeg-wan; o yam katanok katanok issin Yowbad nabunatum wawkwedan, koukwed townen yagan Kamnabwein; e, tut babaw issin townen, ininitoug money wasigeis gamag tasiyas nisowsiws wanuwan. O siney bikokews taw townen biwayes, Koukwed Kamnabwein waseg bisin, yam babaw mo bininitoug; o taw townen ikines Pita son Yon kakita bo beisiws wakoukwed, mo ininitoug money wasigeis.

<sup>4</sup> Pita son Yon ikikines taw townen; Pita mo ilivan, ilana, "Kukinem yakamey."

<sup>5</sup> Taw townen mo igintoves tasiyas asteiy; idoki bisiwyoubus kid.

<sup>6</sup> Nag gog, Pita ilana, “Ta-ivag money waseg yey. Kweitan youd nises waseg yey, bo basekeim. Gum-Nasalet yagan Yeisuw Kelis, mtowen yagan waseg adibakeim kunoun.”

<sup>7-8</sup> Pita iyous naman wanakatay, mo itamnow. Nuwanaw idamoms kaken, o inatub meivek-wan idamoms; kaspepel, itamanaw, mo inoun; o siney tasiyas asteiy mo isiws Yowbad wanbunatum, inoun palatan palatan, ipilapel, singay iyakawn Yowbad waseg.

<sup>9-10</sup> Gamag babaw bo ikines taw townen ininoun, o iliganes anayakawn Yowbad waseg; iwtusis tantougein money townen kweiboug nises Yowbad nabunatum watoulan, Koukwed Kamnabwein waseg. Meiveka tasiyas bo isom ninous, mapuna ikalin nuwes, peinan ikines takagayal townen bo ibwein.

### *Pita igeiguy*

<sup>11</sup> Taw townen siney Pita, Yon nisesus. Bo isom ninous gamag babaw, isisawls, imimeis kwawnow kweitan yagan Solomon nakwawnow.

<sup>12</sup> Pita ikin, ikatimop asilivan, ilana, “Min-Yisleil yakamiy, aveiyag wawun isom ninoumiy, o wawun kukinemas yakamey. Ta-ivag mataw-toun o amasinap tatinem vagan bakavag beibwein takagayal townen, nag.

<sup>13</sup> “Townen Yowbad nawotet, mtowen Ebelam naYowbad, o Aysak naYowbad, o Yekob naYowbad, o tamumwey babaw siYowbad; mtowen nivag natun Yeisuw mo iguyaw. E, yakamiy nukupiyaves taw townen, nukusilkodes wamatan Paylat; o Paylat gog sivinan bikaluweg townen Yeisuw bilik bisap.

14 “O yakamiy gog nukupiyaves taw towen bwanabwein, tadidumwal, o nukwawtagis yagan tawayin gamag, vagan Paylat bikaluweg taw towen bilik bisap.

15 “Nukuweiys abmwamov tanuwagan towen, o Yowbad gog bo ivag ikit kanig waseg, bo kakin yakamey.

16 “Waseg natawtoun mtowen yagan Yeisuw, taw towen bo ibwein. O kweiboug nukukines angayal taw towen, o nagein-vak kukines bo idamoms kaken, peinan bo isimounid waseg Yeisuw. E, isimounid waseg Yeisuw, mo isek natawtoun wamitamiy babaw yakamiy.

17 “Sigwey, nagein akakin nukuwteles mawan peinan tatagouwaws yakamiy, o mituwaveks-vak mawan.

18 “O Yowbad gog ikakin gamag mwasanin biyagages naKelis, o kweiboug ikatimlakes napalopit mawan; e, mo ilivans mawan tababaw palopit tasiyas; o mawan asilivan kweiboug, mawana tut towen bo ikamat.

19-20 “Kadiloka kuvages ninoumiy bikanavin, kulavewas amisinap kalbaleb, vagan Yowbad biwid, binumlev. DaGuyaws mo bivag beibwein amnamiy. Peinan bo ikaleiwag Yeisuw Kelis nawotet vagan bilabeimiy. Magat bikanavin ninoumiy, Yowbad mo bikayeb mtowen biwekeimiy.

21 “Tut towen Kelis bo nein walbalab, kadiloka bisesuna ee... igaw anatut bikatilow youd babaw mo beiyum beim, mawan pwamug-o nilivnek Yowbad wasigeis napalopits tatonen.

22-23 “Moses gog anilivan mawana,

‘Igaw palopit teitan daGuyaws Yowbad mo bisek  
nawotet, mtowen budamiy teitan, palopit  
mawana yey;

kadiloka kuliganes anilivan babaw wasigeis  
yakamiy.

Kavel tapiyavein anilivan palopit towen, bo bagi-  
dem taw towen, bilisaweimiy, binoun.’

<sup>24</sup> “E palopit babaw kweiboug nilivnakes youd  
towen, asilivan katanok-wan, tage tut towen  
bo nikamat. Wanmugwana Samwel anilivan  
mawan, mo tasiyas wankuyeim asilivan bo  
mawan.

<sup>25</sup> “O yakids tut towen mamagin tasiyas palopit  
tibsiyas yakids o Yowbad nakaleiwag tamumwey  
wasigeis bo ikaluweg silmanin yakids; anilivan  
Ebelam waseg, ilana,

‘Igaw ven babaw gimgilis wadaban pwepway mo  
bimwasaws tabum waseg.’

<sup>26</sup> “Wanamug Yowbad bo isekeimiy natouwat  
pinamiy yakamiy, nikayeb mtowen niwekeimiy,  
vagan bukulavewas amisinap kalbaleb, mo  
bukumwasaws; wanmugwana yakamiy min-  
Yudiy, tage vena babaw wankuyeim mo  
bimwasaws.”

## 4

### *Bo iyateles Pita son Yon*

<sup>1-2</sup> Igaw Pita son Yon illivans gamag wasigeis,  
mo isaps tanuwgwes lun situwawek, sisiy  
tulal avakaein, towen tamtakavatein Yowbad  
nabunatum, sisiyas tasiyas Sadusiy; bo igeg  
ninous tasiyas, peinan ikatimlakes gamags,

ilansa, “Kanig waseg gamag beikits vayuwein, peinan Yeisuw nikanig, mo itamanaw vayuwein.”

<sup>3</sup> Mapuna iyousis tasiyas tawaw asteiy, isenas wadeil, bikayamats yamtan yam kid waseg mo biyateles, peinan bo ikwayav.

<sup>4</sup> Tage babaw gamag niliganes asilivan, bo isimounids waseg; tawaw siyas isimounids bo ibabaws, mamagina kweinim tawsan.

<sup>5</sup> Iyam-nen Yelusalem waseg mo ikatuyouns tanuwgwes lun situwawek, o tamumwey, o takatimlakeins kaleiwag.

<sup>6</sup> Misumkwey towen tanuwgwes lun sitovek avakaein yagan Anas, nimeis siney Kayapas, Yon, Alekisan, sisiy angamag mtowen tanuwgwes lun sitovek.

<sup>7</sup> Imeyes Pita son Yon itomos wanuwein gamag babaw, mo ikatiganes, ilansa, “Aw-kaleiwag waseg, kal yagan waseg kuwteles sinap towen?”

<sup>8-10</sup> Kululwan Townen Bwanabwein son Pita nisesus, mapun iwon, ilana, “O matuwawek, o tamumwey yakamiy; magat nagein bukwatiganemas livanen takagayal towen amawan anvavag neibwein, kadiloka bukukwakins, babawa yakamiy, o min-Yisleil babaws, bo ibwein waseg gum-Nasalet, Yeisuw Kelis; yakamiy nukuweiys waklos, ikanig, tage Yowbad ivag mo itamanaw vayuwein. E, natawtoun mtowen Yeisuw waseg, takagayal itamanaw wamatads bo ibwein.

<sup>11</sup> “Livanen mtowen waBukitab nises mamagina:

‘Wululay towen tawteleins bunatum nipiyaves, tage bo imlavag anmwamwan bunatum.’

12 “Mtowen anmwānet Yeisuw bikatinabweids; nag kwayuwein kadilok; nag kwayuwein yagan nises libalab waskawan; misinak yagan towen Yeisuw waseg bitabānes damwamovs, yakids gimgilis ven watinow.”

13 Ikinēs Pita son Yon bo iwons, asilivan taw-toun, o ikakinsa tasiyas nag iskuls avakaēin, mamagin ven gimgilis tasiyas, bo isom ninous; mo inuwes tasiyas asteiy sisiy Yeisuw kweiboug nisesus.

14 O peinan takagayal towen mwana ibwein, sisiy itamanaws, ta-māwan bikatimop asilivan.

15-16 Mapuna ikayabes bineis bikayamats wātoulan bunatum; tasiyasa takaleiwags mo illivans sisiyas, ilansa, “Amāwan bitavkakes gamag tasiyas? Peinan siwotet tawtoun singay, o min-Yelusalem babaw ikakins. Admwasins. Tamāwan!

17 “Adok bo bitakānes, vāgan nag bivgavaws livānen Yeisuw. Nagein gog gamag mwasanin bo iliganes asilivan. Bo deis. Kukin bikatpeles livan towen gamag wasigeis, adok bitakatimapus asisina vāgan bikākin mites. Idakaleiwags māwan!”

18 Ilivans māwan, ikous, mo idawes Pita son Yon bimeis. Imeis; tawtoun asilivan waseg mo idibakes, ilansa, “Awoum kullivans Yeisuw yagan waseg; awoum kugeiguys o kulivans; singay bwaboum.”

19-20 Pita son Yon ikatimapus asilivan, ilansa, “Tab kadilok wamatan Yowbad bakaligen amilivan yakamiy? O Yowbad anilivan tonen? Kuk-waleiwags yakamiy. O youd siyas nakakin

o nakaligen, ta-mawan bakayakous amalivan sinap towen waseg.”

21-22 Vayuwein ikanes avakaein, mo ikayabes bineis kid wasibunatum. Ta-ibanēs asisinap kalbaleb aveiyag bikatimapus, nag. Bo iwenes gamag babaw, peinan gamag babaw nikines wotet towen, mapuna iyakawns Yowbad waseg. Peinan taw towen mwana ibwein bo itovek, anbweilim bo iyakous sinawawas; o wotet towen tawtoun, mamagina mulin naman Yowbad.

*Tayakelisiys initougs Yowbad waseg*

23 Iyokous, mo iyums inekes tawlisiyas, mo ikamteles livan, tasiyas tanuwgwes lun o tamumwey asilivan.

24 Iliganes ikous, mo ikanavin ninous silmanin nitoug Yowbad waseg, ilansa, “Matovek yakoum, peinan nukuvag libalab, o pwepway, o yol, o youda babaw wapwepway o wayol.

25-26 “Gamag siyas sivines bisilbwades muwotet, mawan nilivan mutouwat towen, yakamey tibum Deibid. Peinan kweiboug Kululuwam waseg, mo ikakin sinap towen, ilana, ‘Aveiyag wawun iwons ven babaw gimgilis, o min-Yisleil ininuways sinap mav? King babaw wadaban pwepway itamanaws, sisiyas guyawaw ikatuyouns imeis, bikawpwanaws kid wasigeis Yowbad son naKelis.’

27-28 “Mounid, ven towen waseg, bo ipiyaves mutouwat towen bwanabwein; ikawpwanaws waseg towen Yeisuw, mtowen nukusek inawotet,



nukwayus peinan townen Mesay. O peinan mukwaleiwag nukulivnakes mawan, mogo iyagages Yeisuw, tasiyas Elod, o Ponitiy Paylat, o min-Yisleil, sisiyas ven mwasanin gimgilis, bo iyagages Yeisuw.

<sup>29</sup> “O Guyaw, tut townen bo kukwakin asilivan kalbaleb, sivines kid biyagagemas yakamey; kulabem mutouwat yakamey vagan bakawon beibwein, mo bakalivan amlivan.

<sup>30</sup> “O Guyaw kuyasel namam vagan buku-labem, takatouns kuvages beibweins, namam mulin kuvvag, wotet tawtoun waseg, wayagan mutouwat bwanabwein townen Yeisuw.”

<sup>31</sup> Initougs ikous, sibunatum mo igogewn, mamagina bo beinik; Yowbad Kululuwan inekes tasiyasa babaw, mapun iwonsa singay, illivans Yowbad anilivan.

### *Nag ikayuses sivavag*

<sup>32</sup> Peinan Kululuwan Yowbad nises wasigeis tasiyas, ninous katanok-wan, o sivavag katanok-wan. Nag teitan gamag bikayus navavag; peinan youd tasiyas gamaga babaw sivavag katanok-wan.

<sup>33-35</sup> O sitawtoun waseg, takaweins anilivan mo igeiguys livanen Yeisuw, ilansa, “Maguyaw townen nikanig, bo ikit vayuwein.” Babaw tasiyas singay isiwayoubs. Nag teitan kal tasimav nises, nag; peinan ven tanuwgwes iyamiyises sipwepway o sibunatum; mayses mo ikawes imeyes, isekes Yeisuw nagamag; tasiyas mo ivagens gamag wasigeis, bo isekes mawana gamag babaw sivines.

36-37 Teitan taw Yosep, kweivaw yagan Banabas, Yeisuw inagamags nidokes. Wawun yagan townen, “Talabein gamags.” Gum-Saypilos mtowen, anakum Livay, napwepway wanven bo iyamiyis; maysan ikow imey, isen wamtes Yeisuw nagamag, tasiyas takaweins anilivan, sinawatan teiy; bo isekes tasiyas maysan napwepway.

## 5

### *Ananiyas son Sapayil*

1-2 Teitan taw son nakwav iyamiyises sipwepway, maysan money mwasanin ikawes isenas wamtes tasiyas takaweins livanen Yeisuw, ilansa, “Maysan tamkwalan townen-an.” Iyaweids gog; taw townen Ananiyas iyaweid, namoney mwasanin ikayus, o nakwav Sapayil ikakina iyyaweid.

3 Iw to Pita, ilana, “Ananiyas, aveiyag wawun Seitan isiw wananoum yak, vagan kid Yowbad Kululuwan bukwatidev? Peinan kwayus mu-money mwasanin, maysan pwepway.

4 “Kweiboug pwepway townen tanuwagan yak; wankuyeim nukuyamiyis, maysan money nukukow tanuwagan yak. Aveiyag wawun amsinap nukuvag mawan? Nag kuyawadem yakamey; tage bo kuyaweid Yowbad waseg.”

5 Ananiyas iligen, ikalouw wapwepway, bo imat. Gamag tasiyas iliganes, mo ivag aspwayat avakaen.

6 Tabwabwat mo itamanaws itabwes won townen takanig, ikawes inawes, itakus.

7-8 Taw townen nakwav nag ikakin neimat. Veit kweitoun ikous mo isap, Pita ikatugwan

waseg, ilana, “Tabta mipwepway maysan mawan towen?” Ilana, “E, mawan.”

<sup>9</sup> Pita ilivan, “Aveiyag wawun ninoumiy amiteiy bo bukuyakwanes kid Yowbad Kululuwan? Kukin! Tadibwanins mumwan bo nimeis, wakoukwed nisesus, bo bikaweims binaweims yakoum!”

<sup>10</sup> Nuwanaw mo ikalouw wamatan Pita, imat. Tabwabwats mo isaps ikines nikanig manawen, ikawes, inawes, idibwanis namwan wadadan.

<sup>11</sup> Tayakelesiys babaw ivag aspwayat, o taliganeins livan towen mo ivag aspwayat meivekwan.

<sup>12</sup> Takaweins livanen Yeisuw siwotet singay tawtoun, gamag wasigeis; gamag nikines mo ikakins Yowbad nawotet tatonen. Yam babaw asisinap ikatuyouns imimeis Solomon wankwanow.

<sup>13</sup> Gamag siyas watoulan nag imekes, peinan aspwayat; tage babaw gamag bo iyakawns wasigeis.

<sup>14-15</sup> Gamag mwasanin mo isimounids Guyaw Yeisuw waseg, vinay, tawaw; bo ikatimweisis gamag singaya babaw. Takatouns imeyes, isenas ked wadadan, ampalawen Pita meinoy; e, isenas wakabes o wasag, sivines kululuwan Pita bilumwes kid tasiyas takatouns, mo beibweins.

<sup>16</sup> Ven babaw gimgilis Yelusalem walasin katuyouns imimeis, takatouns imeyes sisiyas tasiyas bwagaw nibugawus; ivages mo ibweins.

### *Mwasanin ikamliwes Yeisuw nagamag*

<sup>17-18</sup> Butun wotet towen mo iliganes tanuwg-wes lun sitovek avakaein, siney inabod tasiyas

Sadusiy, singay igeg ninous, ikamliwes tasiyas takaweins livānen Yeisuw, mapuna iyousis, inawes wādeil.

<sup>19-20</sup> Boug waseg Yowbad natakayob im ikaliyow awkwedan deil, itokes, inawes wamnat, ilana, “Kuneis, kutamanaws Yowbad wanbunatum, kudibakes gamag livānen mimwamov towen Yeisuw nisekeimiy.”

<sup>21</sup> Iliganes anelos towen anilivan; walalayis mo ineis Yowbad nabunatum, livan mo ikatimlakes gamag. Tanuwgwes lun sitovek avakaein siney angamag mo idawes min-Yisleil astakaleiwags o tammwayas bimeis, mo idibakes inagamags mwasanin, ilansa, “Kuneis, tasiwuns deil tasiyas kutokes, kumeyes.”

<sup>22-23</sup> Ineis, bitokes kid wādeil, iwekes makawan. Iyums, imeis ilansa, “Nakan nakakin deil buntu-man bo ikatabagus keikay-wan, o takaymateins deil nitatos wakoukwed; nakasiw wanuwan, ta-kweitan gamag nises, makawan.”

<sup>24</sup> Tulal avakaein sen tanuwgwes lun situwāvek iliganes asilivan, bo isunasun ninous; ikubukub nuwes, peinan na-bikakins aveiyag mo bikamat.

<sup>25</sup> Teitan gamag mo isap, ilana, “Gamag siyas nukusenas wādeil bo itamanaws Yowbad wanbunatum, illivans ikatimlakays gamag.”

<sup>26</sup> Tulal sen nagamag mo ineis, itokes gamag tasiyas imeyes. Bo ivnāses. Nag ikānes, peinan iwenes gamag babaw. Mata bigeg ninous, peinan idokes kid beiweiys dakul waseg.

<sup>27-28</sup> Imeyes gamag tasiyas, mo itomos wanuwein tasiyas takaleiwags. Tanuwgwes lun

sitovek avakaein mo ikatiganes, ilana, “Livan kamnat waseg nakadibakeimiy, kalana, ‘Awoum kugeiguys yagan townen waseg;’ tage min-Yelusalem babaw bo iliganes butun townen; o adok sivinamiy gamag kid bilansa, ‘Peinan tanuwgwes lun sikaleiwag bo iweiys Yeisuw.’

Awoum gamag bilivans mawan.”

<sup>29</sup> Pita siney takaweins livanen Yeisuw mo ilivans, “Magat mikaleiwag kweitan, o Yowbad nakaleiwag kweitan, kadiloka bakaligen Yowbad nakaleiwag.

<sup>30-31</sup> “DaYowbads townen tamunwey siYowbad bo isek Yeisuw vayuwein namwamov, peinan yakamiy nukwatimates, nukwatiptukwes wakamweilok; tage Yowbad bo isek naguyaw, mamagina takatinabwein gamags, aban nisek wanakatay Yowbad; o nawotet silmanin min-Yisleil yakids, bikanavin nanouds, mo biwid adsinaps kalbaleb, bilev.

<sup>32</sup> “O yakamey kakakin livan townen moundid, mapuna kallivan mawan; o Yowbad Kululuwan Bwanabwein bo isekem taliganein anilivan yakamey, o Kululuwan Townen ikatimlakeids sinap townen moundid.”

<sup>33-34</sup> Tasiyas iliganes, bo ikapasal nuwes, sivines bikatimates; tage takaleiwag teitan yagan Gamaliyel itamanaw vagan biliwon. Mtowen Palisiy, takatimlakein Yowbad nakaleiwag; mapuna babaw gamag ivnases tamwey townen. Ilana, “Kadilok tasiyas takaweins livanen Yeisuw bineis watoulan, tut kadiyakus bisesus, baliwon, beikous mo beisiws bimeis.”

<sup>35</sup> E, tasiyas ineis watoulan, Gamaliyel mo iliwon, ilana, “Sigwey min-Yisleil yakamiy, kadiloka kuvnaseimiy, aveiyag bukunuwakes gamag tasiyas.

<sup>36</sup> “Kunuwes kweiboug teitan gamag yagan Tudas itamanaw, idok guyaw avakaein tonen; gamag babaw mo inekes, mamagin lakatuvas tawaw; wankuyeim mwasanin iweiys taw townen, o taliganeins anilivan bo igayays; butun taw townen bo ikous.

<sup>37</sup> “Wankuyeim gum-Galiliy teitan yagan Yudas, anatut yagads gabman nileles wabuk, mo itamanaw, ikatidavis gamag mwasanin, ikatkunis; wankuyeim mo ikanig taw townen, o taliganeins anilivan bo igayays, bo ikous.

<sup>38-40</sup> “O tut townen adibakeimiy, bweina bisesus gamag tasiyas. Awoum kuyagages. Magat gamag sikaleiwag townen, o gamag siwotet, kakita biyakous; tage kukin Yowbad nawotet townen, ta-mawan bukusiwbwades; mata ge bukuvatays waseg Yowbad.” Tasiyas iliganes aygan townen; idawes Yeisuw nagamag, imeis, iwaways, mo idibakes, ilansa, “Awoum kwatimlakays yagan Yeisuw waseg;” mo ikayabes, ineis.

<sup>41</sup> Ilisawes takaleiwags tasiyas, nag ivag asimwasin, imwasaws-wan, ilansa, “Adok Yowbad sivinan yakids, inakaleiwag vagan abads bigeg, Yeisuw yagan peinan.”

<sup>42</sup> Yam katanok katanok mo ikatimlakes gamag, Yowbad wanbunatum, o bunatum babaw wasigeis; isekes livan townen bwanabwein, livanen Mesay, mtowen yagan Yeisuw.

## 6

### *Tamtakavateins kan siwotet*

<sup>1</sup> Misumkwey towen sivamul ikatimweisis singay babaw, musinis takagaGilis, musinis takagIbliws; e, tasiyas takagaGilis ivtokes livan siyas takagIbliws, ilansa, “Yam katanok katanok ivganes kaeis isekes nakubukwabs wasigeis, o yakamey nakubukwab siyas nag ivag mananan kaeis.”

<sup>2</sup> Yeisuw nagamag tasiyas sinawatan teiy mo idawes sivamul babaw bimeis, mo ilansa, “Ma-wotet bakalivan Yowbad anilivan; nag kadilok bakasem wotet towen vagan bakavgen kan.

<sup>3</sup> “Kadiloka kukines tawaw toubweins mwasanin yakamiy; gamag tasiyas asisinap tawtoun; o Yowbad Kululuwan wasigeis tasiyas; kadilok kusenias teinim teiy vagan bakasekes siwotet towen.

<sup>4</sup> “Yakamey bakaysiyous imawotet silmanin Yowbad, bakanitoug waseg, o anilivan bakasekes gamags.”

<sup>5</sup> Gamag babaw itams, ilansa, “Bwein”, mo isenas tawaw teinim teiy; teitan Sitiben, Kululuwan Yowbad nises waseg towen, o bwein isimounid Yowbad waseg; teitan Pilip, teitan Pilokol, teitan Nikanol, teitan Timon, teitan Pamenas, teitan Nikolaw, mtowen gum-Antiyok bo imlavag gum-Yudiy, peinan ikow tapwajoul-nen Yudiy.

<sup>6</sup> Tasiyas bo itamanaws wamtes takaweins livanen Yeisuw; initougs Yowbad waseg, ikous, mo isenas nimes wawous tasiyas, silmanin bikawes siwotet vagan bintakavatays kan.

<sup>7</sup> Singay babaw gamag mo iliganes livanen Yowbad, navamul bo ikatimweisis singay babaw,

waseg ven townen Yelusalem. Tanuwgwes lun mwasanin bo iliganes livan townen, mo isimounids waseg Yeisuw.

### *Bo iyousis Sitiben*

<sup>8</sup> Yowbad nasiwayoub avakaein isek Sitiben, iwotet tawtown, mamagin Yowbad naman mulin ivag; o gamag babaw ikines.

<sup>9-10</sup> Gamag mwasanin mo itamanaws ikamnimans waseg Sitiben; mwasanin min-Yudiy sitapwaloul yagan Libetin, sisiyas min-Saylin mwasanin, o min-Aleksanidel, o min-Silisiy, o min-Esiy, tasiyas mo ikamnimans waseg Sitiben; tage nag kadilok bitakayways, peinan kululuwan o ansinap singaya tawtown.

<sup>11</sup> Mapun isilkodes; idibakes mwasanin, ilansa, “Igaw yatal waseg kuyaweidsa, kulansa, ‘Nakaligen anilivan kalbaleb taw townen, ilivan mav, Moses livanen, o Yowbad livanen.’ ”

<sup>12</sup> E, mo ivtokes livan Sitiben wasigeis gamag babaw; o tamumwey, o takatimlakeins kaleiwag niliganes; gamag babaw mo itamanaws, iyousis Sitiben, inawes vagan biyateles wamtes astakaleiwags min-Yudiy tatineis.

<sup>13-14</sup> Mo idawes tasiyas tayyaweids bimeis. Imeis, ilansa, “Gamag townen, tut babaw ivtokay livan silmanin Yowbad nabunatum townen, o silmanin Moses nakaleiwag, o nakaligen anilivan, ilana, ‘Gum-Nasalet townen Yeisuw bo bigulek bunatum townen; o sinap kweiboug Moses nisekeids, Yeisuw bo bikatlow.’ Anilivan manawan.”



<sup>15</sup> Takaleiwags isinis, iggintoves magin taw townen Sitiben, ankakin kweitan, magin maḡwana gum-libalab anelos.

## 7

### *Anilivan Sitiben*

<sup>1</sup> Tanuwgwes lun sitovek avakaein mo ikatigan Sitiben, ilana, “Tabta asilivan moundid? Amḡawan amlivan yak?”

<sup>2</sup> Sitiben ikatimop livan townen, ilana: “Talawog yakamiy o tamumwey yakamiy, kuliganes agulivan. Guyaw avakaein Yowbad bo inek datoveks Ebelam, pwamug-o waMesopotemiy, wankuyeim mo ikoulup in Elan.

<sup>3</sup> “E, igaw Ebelam nises Mesopotemiy, Yowbad inek, idibek, ilana, ‘Kadiloka muven o talawom kulisow, kun ven kweitan bakatimlakeim.’

<sup>4</sup> “Mapuna ilisow Kaldiy, ikoulup, in Elan. Taman son nisesus; e taman ikanig ven townen Elan. Wankuyeim mo im isik pwepway townen Kenan, tut townen idavanuys.

<sup>5</sup> “O Yowbad ta-isek nakiyay townen; igaw. Ta-isek napwepway wavtanok, nag; Yowbad idibek Ebelam, ilana, ‘Igaw basekeimiy simwey tibum mipwepway;’ tage nag ivag natun, nag.

<sup>6-7</sup> “Yowbad mo idibek Ebelam, ilana, ‘Tibum bisikes kweitan ven, wunovek, o misikena gimgilis bisekes siwotet avakaein biwotets, o bweillim lakatuvas abes bigeg. Igaw mo bamop sikalbaleb misikena gimgilis tasiyas, igaw tibum mo bisaps bimeis biwotets gunawotet ven townen wanuwan.’

8 “O peinan Ebelam itam kaleiwag towen waseg, Yowbad mo isek nakabivatus; Ebelam ibwabwes tawaw momwes. Wankuyeim nakwav mo ikop natun Aysak, ikayamat yam kweinim kweitoun, mo ibob momwan; wankuyeim Aysak natun Yekob mawan, o Yekob nitun tawaw sinawatan teiy, tasiyas datuwaveks pwamug-o.

9-10 “Datuwaweks tasiyas ikamliwes budas Yosep, isekes gamag mwasanin, ikawes Yosep, inawes Yidipt; tage Yowbad son nisesus, ikatinob Yosep youd babaw kalbaleb nilouvat ven Yidipt waseg; e, isek ansinap avakaein wamatan min-Yidipt siking towen Pelow, mapun ikalin nuwan Yosep waseg, isek nawotet tamtakavatein nabunatum, o tamtakavatein ven towen Yidipt, meivek-wan.

11 “Wankuyeim nag ivag kweis Yidipt waseg, o Kenan waseg; tut singay kalbaleb ilivatus. Kan bo iyakousis datuwaweks wasigeis.

12 “Wankuyeim Yekob iligen kan nises Yidipt, mo ikayabes nitun; e, tibdayas yakids tasiyas; ikayabes ineis Yidipt, kan silmanin.

13 “Sivyuwein ikayabes, ineis Yidipt, Yosep mo ikamat wasigeis tuwan. Ikamtel waseg Pelow, ilana, ‘Talawog min-Kenan tasiyas.’

14 “Yosep mo idawes taman Yekob sen taliven bimeis Yidipt; gamag siyas babiweis sinawanim sinawey teinim.

15 “Yekob inoun in Yidipt, ven towen waseg nikanig; e, tibdayas tasiyas nikankanigs.

16 “Wous ititabwes guyawaw siyas, mo ikokews, innawes, isenas watakunumwan ven Sekam waseg; kweiboug Ebelam igimwel

takunumwan townen, maysan silib nisek Emol nitun, ven Sekam waseg.

17 “Kweiboug Yowbad nilivnek Ebelam waseg, ilana, ‘Bakatinabwes tibum ven townen waseg.’ Kadilakusa bo bilouvats tutan bikatinabwes, min-Yisleil mo ibabawsa singay. Ven townen Yidipt bo ikalawt min-Yisleil.

18-19 “Misumkwey townen mo isap King kweivaw; mtowen nag ikakin Yosep, isilkodes tamumwey, ikaleiwag vagan bilavewas nitsiyas apwaw; sivilan gamag tasiyas bintamats beikous.

20 “Tut townen waseg natan vin mo ikop natun apwaw tamnabwein yagan Moses, isowum tibukon kweitoun, namwan wanbunatum.

21 “Wankuyeim mo isemos wamnat; Pelow natun kudavin mo ikow, ituy gwad townen, mo imlavag natun tatonen.

22 “Townen Moses ivakaein, iskul, itakayes min-Yidipt asisinap babaw ikous, bo itawtoun anilivan waseg, o nawotet-vak tawtoun.

23 “Anbweilim sinawawas waseg, mo inuway taliven, in kid bilakwanes taliven tasiyas min-Yisleil, idoki bo bilabes.

24 “In ikin gum-Yidipt iyageg gum-Yisleil teitan, imop nakalbaleb, iweiy gum-Yidipt, imat.

25 “Idoki taliven bikakins Yowbad nisek nawotet vagan bikatinabwes tasiyas; tage nag ikakins.

26 “Yamtan yam mo ikines min-Yisleil asteiy ikawpwanaws, idoki bivag beimwas kid, ilana, ‘Tawaw, yakamiy bod katanok-wan, min-Yisleil yakamiy. Aveiyag wawun kuygeg soum?’

27-28 “Townen niyageg son, mo iyabin Moses, ilana, ‘Kal nisekeim muguyaw o mukwaleiwag wasigeis yakamey? Adok bukuweig maṡwana townen nov gum-Yidipt nukuweiy, ne?’

29 “Iligen anilivan townen, ivag anpwayat Moses, mo isawl, ikoulup, in isik ven yagan Midiyan, ivays son nakwav, ikopwes nitun tawaw asteiy.

30 “Isesun ee... bweilim sinawavas ikous, ininoun wanawoud, koy Sinay waseg. Ta-ivag ven, makawan. E, Moses mo ikin gum-libalab son inakov nigidaged amweilok yageivein waseg.

31-32 “Moses ikin, isunasun nanon, isineikim vagan kid bikinbunik, mo iligen aygan Yowbad, ilana, ‘Yey tamumwey siYowbad yey; yey Ebelam naYowbad yey; yey Aysak naYowbad yey; yey Yekob naYowbad yey.’ Moses iligen mo itat won, anpwayat bikin Guyaw Townen.

33-34 “Yowbad idibek ilana, ‘Kwablev musandol, kusew, peinan ven townen waseg nases. Awoum sona musandol bukumey. Bo akin min-Yidipt iyagages gungamag, bo aligen ildeilids, bo abus vagan kid bakatinabwes; e, tut townen kum bakayabeim kid bukun Yidipt, wotet townen silmanin.’

35 “Mtowen Moses, min-Yisleil kweiboug nipiyaves, nilansa, ‘Kal nisekeim muguyaw o mukwaleiwag townen?’ O Yowbad gog, gum-libalab waseg, bo isek nakaleiwag o nawotet vagan kid bikatinabwes Yowbad nagamag. Gum-libalab townen Moses nikin amweilok waseg.

36 “Moses mo imgwayes gamag tasiyas, peinan nawotet tawtoun, Yidipt waseg, o Yol Bwabwel waseg, o sinawavas bweilim wanawoud waseg,

nawotet tawtoun, mamagina Yowbad naman mulin.

37 “Mtowen Moses nidibakes min-Yisleil, ilana, ‘Igaw teitan wasigeis yakamiy, Yowbad mo bisek nawotet mo bimlavag palopit, mtowen maḡwana yey.’

38 “Towen Moses siney min-Yisleil babaw ini-nounas wanawoud, o gum-libalab nilivan son Moses koy Sinay waseg, ikatipel ansinap mo isekes tibdayas, tammwayas tasiyas, o mwamov livanen bo isekeids.

39-40 “Tage tammwayas tasiyas nag sivines bili-ganes Moses anilivan; ipiyaves, waninous kid sivines beiyums bineis Yidipt. Mapuna idibakes Elon, ilansa, ‘Kubun dayowbads vaḡan bing-wayeids, peinan mtowen Moses nitokeids nitali-sawes Yidipt, nag kakakin amaḡwan nein.’

41 “E, tut towen bo ibunis youd magin maḡwan bulumakaw natun, o iluns o itapḡalouls waseg kokotom towen, o imḡasaws waseg youd towen nibunis wanimes.

42-43 “Yowbad mo ilisawes tasiyas, vaḡan tasiyas bikululs kid wamatan wutun babaw, maḡwana palopit anilivan wanuwan Bukitab mamagina:

‘Adok bweilim lakatuvas wanawoud nukuweiys lun bulukwan, min-Yisleil yakamiy, vaḡan bukuluns waseg yey?

Tage nukuyousis yowbad kweitan, yagan Molok, nukuwlules nabunatum, nukukokews;  
o nukukululs wamatan Lapan nawutun, o nuku-tapḡalouls mikalelel waseg.

Mapuna bakaweimiy banaweimiy palata-dadan ven Babilon.'

44 "Tamumwey tasiyas ikokews Yowbad nabunatum wanawoud, peinan Yowbad nikatimlek Moses ankakin bunatum townen, ilana, 'Kuwlul gunbunatum ankakin maʿwan.'

45 "Wankuyeim Yosuw imgwayes tibdayas, tamumwey tasiyas; sona bunatum townen nikokews, mo iyousis min-Kenan sipwepway, peinan Yowbad ikawmanayes gamag tasiyas, mo isawls wantes tibdayas. Bunatum bunawen ises ee... mo isilamaw nakaleiwag Deibid.

46 "Yowbad isiwayoub waseg mtowen Deibid, o Deibid sivanan biwlul Yowbad nabunatum silmanin sitapwaloul Yekob tibun tasiyas.

47 "Togo Deibid nag iwlul nabunatum; natun gog Solomon iwlul Yowbad nabunatum townen.

48 "Tage libalab naYowbad townen nag imasis wanuwan bunatum ven watinow waseg, nag. Palopit teitan Yowbad anilivan nilel mamagina:

49-50 'Yey abag libalab o kakeig nakabvawot wapwepway.

Amata-bunatum bukuwlules yey gunbunatum?

O amata-bunatum bukuwlules vagan bayeiwas wanuwan?

Adok nag kadilokeimiy, peinan wanamag bo abun youd tasiyas.' "

51 Sitiben mo ilivan, ilana, "Singaya takakon yakamiy, Yowbad ta-ivag nakabivatus wani-noumiy o watigamiy, nag; tut babaw kuyblebes Yowbad Kululuwan; maʿwana tamumwey, maʿwana yakamiy.

<sup>52</sup> “Ta-kweitan palopit tammwayas ikatibomes, nag; babawa iyagages. O ikatimates palopit tasiyas, o palopit asilivan maḡwana, ‘Igaw beim Tadidumwal, mtowen Kelis.’ E, Tadidumwal towen nukusilkodes-vak, nukuweiys.

<sup>53</sup> “Min-libalab nisekeimiy Yowbad nakaleiwag; tage nukupiyaves nakaleiwag towen; maḡwana tamumwey, maḡwana yakamiy.”

### *Iweiys Sitiben*

<sup>54</sup> Iliganes anilivan towen, singay ikapasal nuwes, ikakilis kumtus, singay ikamliwes.

<sup>55</sup> Tage Yowbad Kululuwan Bwanabwein son Sitiben nisesus, Sitiben ikin walbalab, ikin miteteilin Yowbad, ikin Yeisuw nitamanaw Yowbad wanakaḡtay.

<sup>56</sup> Sitiben mo ilana, “Towen-o bo akin ikaliyow libalab, o Gimgilitoun towen Yeisuw itamanaw Yowbad wanakaḡtay.”

<sup>57</sup> Tasiyas gog bo iwaks avakaein, nag sivines biliganes livan towen, bo ikibwades tiges; ituts bineis biyousis kid Sitiben.

<sup>58</sup> Iyousis Sitiben, mo itokes inawes watoulan ven, mo iweiys, dakul waseg. O tasiyas niyyaweids yaḡal towen waseg inisis asikweim isenas wadadan toubwat teitan yagan Soul, vagan kid bimtakavet asikweim, mo ikawes dakul, iweiys Sitiben.

<sup>59</sup> Igawa iwaways, Sitiben mo iwak, idow naGuyaw yagan, ilana, “Guyaw Yeisuw, kululuwag kukow.”

<sup>60</sup> Mo ibasen kitatun, iwak avakaein, ilana, “O Guyaw awoum kumop asisinap towen kalbaleb;”

mo ikanig. Toubwat townen Soul ikikin, idok wotet townen bwein.

## 8

### *Soul iyagages tayakelesiys*

<sup>1</sup> Misumkwey townen gamag mwasanin bo isilamaws kid biyagages tayakelesiys Yelusalem waseg; e, bo iyagagesa singay. Mapuna bo igayays ineis Yudiy o Samaliy, o vena babaw wasigeis. Misinaka takaweins livanen Yeisuw nisesus Yelusalem, tasiyas sinawatan teiy.

<sup>2</sup> Mwasanin gamag bwanabweins bo idibwanis takanig townen Sitiben, ivalam avakaein silmanin.

<sup>3</sup> Tage Soul bo iyagages tayakelesiys, inineves tayakelesiys bunatum katanok katanok wasigeis, iyousis tawaw o vinay, itokes, inawes wadeil.

### *Livanen Yeisuw ikawes isekes min-Samaliy*

<sup>4</sup> O tayakelesiys tasiyas nigayays bo inawes livanen Yeisuw vena babaw wasigeis.

<sup>5</sup> Pilip in min-Samaliy wasiven kweitan wunovek waseg, isekes livanen Mesay Kelis.

<sup>6</sup> O min-Samaliy inganegs anilivan, ikines nawotet tawtoun, ninous katanok-wan vagan bili-ganes anilivan.

<sup>7</sup> Pilip nawotet tawtoun; o tasiyas takayyeiluws ivag, mo iwaks avakaein, yeiluw mo ilisawes gamag tasiyas; o taguyagweys o takagayals ivag, mo ibweins.

<sup>8</sup> Mapuna misikena gimgilis bo imwasaws avakaein.



9-11 Tamgameg yagan Saymon nises ven townen; min-Samaliy nikines nawotet, bo isom ninous. Mtowen Saymon bo ilivan, ilana, “Yey tatawtoun yey.” Bo iliganes anilivan, tasiyas guyawaw, o sisiyas toul, gamaga babaw, mo ilansa, “Adok natawtouna tonen, mamagina Yowbad natawtoun.” E, nagwadiven inganegs tamgameg townen, nameg nikines bo isom ninous.

12 Tage gamag babaw mo isimounids Pilip anilivan waseg, Yowbad nakaleiwag livanen son Yeisuw yagan livanen, ibaptayses tawaw o vinay.

13 Townen Saymon mo isimounid, ibaptays; ibaptays ikous, isesus son Pilip, ikikin nawotet tawtoun o naman mulin, bo isom nanon.

14 Takaweins livanen Yeisuw igaw nisesus Yelusalem, iliganes min-Samaliy bo itams Yowbad anilivan waseg, mapuna ikayabes Pita son Yon bikines.

15-16 Pita son Yon isaps, mo initougs silmanin Yowbad Kululuwan Townen Bwanabwein binekes kid gamag tasiyas; peinan kweiboug nag inekes, deisa nibaptayses yagan Guyaw Yeisuw waseg.

17 Initougs ikous, mo isenas nimes wawous gamag tasiyas, Yowbad Kululuwan mo inekes.

18-19 Townen Saymon ikin takaweins livanen Yeisuw siwotet mawan, nisenas nimes gamag wawous, Kululuwan Yowbad mo inekes; townen Saymon mo isekes money, ilana, “Money townen kukow, maysan sinap townen. Sivinag sinap townen, namag kid basen gamag wawous vagan Kululuwan Yowbad binekes.”

20-23 Pita mo ikawtun taw towen, ilana, “Soumwan mumoney kov waseg bigabum wadiginasim, peinan kudok kid bukugimwel Yowbad nasiwayoub. Yakoum tobwag gamag. Nag kweitan muwotet nises wasigeis yakamey. Yak nanoum bo ikaydodog wamatan Yowbad. Kadiloka kulavew amsinap towen kalbaleb; kunitoug Yowbad waseg. Adok mo biwid amsinap, peinan akakin-wan amkameiliw son amsinap kalbaleb bo ikalawt nanoum waseg.”

24 Saymon ikatimop anilivan, ilana, “Kunitougs Yowbad waseg vagan kid kalbaleb towen nag bimekeig yey.”

25 Pita son Yon asilivan kamnat waseg mo idibakes gamags livanen siGuyaw Yeisuw, mo iyums ineis Yelusalem; o igawa wakēd inounas, livan towen bwanabwein mo isekes min-Samilyi, vena babaw wasigeis.

### *Pilip inek gum-Idiyopiy teitan*

26 Yowbad ikayeb gum-libaleb teitan inek Pilip, ilana, “Kutamanaw kunoun kun wayals, kunoy ked makadewen meinoy neim Yelusalem nein Ges.” Ked towen waseg ta-ivag ven; makawan.

27-28 Itamanaw, inoun, mo inek gum-Idiyopiy teitan, mtowen yunak, towen tamtakavatein Kandas namoney, manawen vin min-Idiyopiy sikwin. E, yunak towen nitapwaloul Yelusalem waseg mo iyum in waniven. Hos ibiteilis inawag, isin wanuwan ivnivin Bukitab, palopit Isaya anilivan.

29 Yowbad Kululuwan mo idibek Pilip, ilana, “Kun, kunek taw towen wanawag nises.”

<sup>30</sup> Pilip isawl, inek, iligen ivnivin anilivan palopit towen Isaya. Pilip ikatigan ilana, “Tabta kukwakin silawun livan towen?”

<sup>31</sup> Iwage towen ilana, “Ta-mawan bavkek bakakin. Magat teitan gamag bikatimlakeig, bo bwein.” Mo ilana, “Kumwen kum, kusin wawag;” mo imwen, isin wadadan taw towen.

<sup>32-33</sup> Bukitab wanuwan bo ivin lelel-nen mamagin,

“Mawana lamiy gamag beiweiys, ta-ivag aygan; o mawana bibwabwes wunuwunun sip, nag beiwey, bo bikkapay-wan.

O gamag towen mawan, nag bilivan.

Asilivan tasiyas yaweid, inayatatal waseg.

Anmwasin; ta-mawan.

Igaw ta-kal bilivan livanen angamag taw towen, peinan bo ikanig.”

<sup>34</sup> Yunak mo ikatugwan Pilip waseg, ilana, “Livanen kavel? Palopit towen livanen? O teitan gamag livanen?”

<sup>35</sup> Pilip isilamaw livan towen Bukitab wanuwan, mo ikatimlek livanen Yeisuw, livan towen bwanabwein.

<sup>36</sup> Igawa ininounas waked, yunak inganeg livan towen, wankuyeim isaps wayvagam; mo yunak ilivan, ilana, “Kukin yevagam towen. Tab kadilok bukubaptayseig yey.” <sup>37</sup> (-)

<sup>38</sup> E, idibakes nagamag bisewas wag wadadan ked, mo ibus tasiyas asteiy, Pilip son yunak, ineis wayvagam, ibaptays son.

<sup>39</sup> Ibaptays ikous, igalags, Yowbad Kululuwan mo ikow Pilip, inow. Yunak na-ikin Pilip; anmwaneta ises. Mo inoun in waked, singay imwasaw.

<sup>40</sup> Wankuyeim mwasanin ibanés Pilip nises Asot. Inoun in itavin vena babaw, illivan livanen Yeisuw gamaga babaw wasigeis, wankuyeim in isap Sisaliy.

## 9

### *Soul ikanavin nanon* (Wotet 22:6-16; 26:12-18)

<sup>1-2</sup> Mtowen Soul singay ikawkunes Yeisuw nagamags, sivinan kid bikatimates. Mapuna inek tanuwgwes lun sitovek avakaen, ilana, “Tab kadilok kulel let, vagan bakow banow basekes tanuwgwes bunsiyas sinagog ven Damasik waseg; igaw tanuwgwes tapwaloul tasiyas bivinis, mo beitams waseg gunawotet vagan banineiv kid kalisiy inoyes Yeisuw inaked, ked townen kalbaleb. Magat vinay o tawaws, mo bayousis gamag tasiyas, bayawen nimes, mo batokes, bameyes Yelusalem.”

<sup>3</sup> Mtowen itam, isek nalet, ikow; siney nagemag mo ineis ee... kadilakusana Damasik, mititeilin avakaen imek Soul, ikaligwen matan. Mititeilin townen mawana kavikawn meinoy neim walbalab.

<sup>4</sup> Ikalouw wapwepway, iligen aygan teitan, ilana, “Soul, Soul, aveiyag wawun kuybilebeig yey?”

<sup>5-6</sup> Iwage Soul, ilana, “O guyaw, kavel yak?”

Ilana, “Yey Yeisuw, nukuybilebeig. Tage kutamanaw, kun ven towen wamatam, teitan gamag mo bilivnek muwotet vagan bukukwakin.”

<sup>7</sup> Gamag tasiyas sisiy Soul ineis waked, itamanaws, bo isom ninous, peinan iliganes aygan; tage ta-kweitan gamag ikines.

<sup>8</sup> Soul itamanaw, bo ikiplal matan, tage nag ikin, magina bo ikaw matan; mapuna iyousis naman mo itokes inawes ven towen Damasik.

<sup>9</sup> Yam kweitoun isesuna-wan, matan nag ibwein, ta-ikam, ta-imoum, isesuna-wan.

<sup>10</sup> Yeisuw nagamag teitan nises ven Damasik, yagan Ananiyas; anmikon waseg naguyaw idibek Ananiyas, ilana, “Ananiyas.”

Ilana, “Yey-ay.”

<sup>11-12</sup> Naguyaw mo ilivan, ilana, “Kutamanaw kun kunoy ked towen yagan Didumwal, e, kun Yud wanbunatum, kunev gamag teitan gum-Talisus yagan Soul, peinan bo intougig. E, igaw ininitoug, ikin taw teitan yagan Ananiyas isap, isen naman wawon, vagan matan beibwein.”

<sup>13-14</sup> Ananiyas ikatimop aygan, ilana, “O Guyaw, gamag babaw ilansa, ‘Taw towen singay takalbaleb, singaya iyagages mugwamag Yelusalem waseg;’ o tut towen ikow inalet tanuwgwes lun sitovek avakaein silmanin kid biyawanim yakamey takavtagin yagam yak.”

<sup>15-16</sup> Naguyaw mo idibek, ilana, “Kun kuwtel agulivan mawan, peinan bo akaluweg nawotet taw towen silmanin bikow yagag vena babaw gimgilis wasigeis, o siguyawaw wamtes, o min-Yisleil wamtes. Igaw bakatimlek taw towen

youda babaw kalbaleb igaw mo bilouvat peinan yagag yey bikow.”

<sup>17</sup> Ananias iligen, inoun, isiw wabunatum townen naGuyaw nikatigik, isen naman wawon Soul, ilana, “Bwadag yakoum Soul, daGuyaws nikayabeig nam, silmanin matam bavag beibwein, o silmanin Yowbad Kululuwan Townen Bwanabwein biwekeim. DaGuyaws townen Yeisuw niwekeim yak wakēd.”

<sup>18</sup> Nuwanaw mo ilatimatet matan, mo ikin bwein. Itamanaw mo ibaptays.

<sup>19</sup> Kan ikam, amnan mo ibwein.

### *Soul igeiguy Damasik waseg*

Soul siney Yeisuw nagamag ven Damasik waseg nisesus mwasanin yam waseg.

<sup>20</sup> Tage nuwanaw iggeiguy sinagoga babaw wasigeis, ilana, “Mounid Yowbad natun, mtowen Yeisuw.”

<sup>21</sup> Taliganeins anilivan townen bo isunasun ninous, ilivans, “Tabta taw townen tayagagein Yeisuw nagamag Yelusalem waseg, mo im wadavanuys silmanin biyousis tayakelesiys, mo binawes kid tanuwgwes lun situwawek wasigeis?”

<sup>22</sup> Tage Soul mo itawtouna singay, anilivan tawtoun waseg mo ikatimlakes min-Yudiy tasiyas misikesa Damasik waseg, vagan kid bikakinsa Yeisuw mounida Kelis; e, tasiyas bo ibol ninous, ta-mawan bikatimapus aygan.

### *Min-Yudiy sivines biyousis Soul*

<sup>23-24</sup> Yam mwasanin ikous, min-Yudiy illivans sisiyas, idokes amawan bikatimates Soul; tage teitan gamag idibek Soul mo ikakin ninous. Tasiyas

ikayyamats wawkwedan boul yam waseg o boug waseg; ikayyamats kid Soul bisap mo beiweisy. Ven townen nibasis boul watoulan. Gamag nitatos wadunan ked, ikayyamats.

<sup>25</sup> Mapuna boug waseg inavamul idagis Soul in wanuwan kaynad avakaein, ikaygwagwes ee... in iton wapwepway watoulan boul, mo itamanaw inoun.

### *Soul in Yelusalem*

<sup>26</sup> Soul inoun in Yelusalem, sivilan kid binekes Yeisuw nagamag; tage tasiyas iwenes, ilansa, “Adok mtowen Soul nag ikanavin nanon.”

<sup>27</sup> Tage mtowen Banabas mo itok, inekes tasiyas takaweins livanen Yeisuw, ilana, “DaGuyaws bo inek taw townen waked, ikin, ilivans son, wankuyeim ven Damasik waseg mo itawtoun, igeiguy Yeisuw yagan waseg.”

<sup>28</sup> Min-Yelusalem tasiyas iliganes aygan townen, mo Soul inekes; siney tasiyas nisesus siwotet babaw waseg; e, mo itawtoun, yagan Yeisuw waseg, illivan.

<sup>29</sup> E, illivans wasigeis min-Yudiy tasiyas takaga-Gilis, mo ikamnimans waseg, mapuna iyokons kid bikatimates.

<sup>30</sup> Tage Yeisuw nagamag ikakinsa ninous bikatimates Soul; mapuna itokes Soul ineis Sisaliy, wankuyeim mo ikayabes in Talisus.

<sup>31</sup> Tage tayakelesiys babaw nisesusa bwein, wawnuwan Yudiy, o Galiliy, o Samaliy. Nag aveiyag ilivatus; bwein-wan, ikatimweisisa babaws, itawtouns, ivnases Yowbad; peinan Kululuwan Townen Bwanabwein bo ilabes, imlavags singaya babaws.

*Pita ivag Ayney mo ibwein*

<sup>32</sup> Pita itāvin inoun vena babaw wasigeis, mo iwlobus inekes Yowbad nagamag mwasanin nis-esus ven yagan Lid.

<sup>33</sup> Ven townen mo iban taguyagwey teitan yagan Ayney, bweilim kweinim kweitoun immasis wakaban, ta-māwan binoun.

<sup>34</sup> Pita idibek, ilana, “Ayney, Yeisuw Kelis bo ivageim kid bukubwein. Kutamanaw, kukow musag.” Iligen, nuwanaw mo itamanaw.

<sup>35</sup> Mina-Lid o min-Selon tabebaws-wan ikines, mo isivins, Yowbad nakaleiwag ikawes.

*Dokas ikanig, mo imov vayuwein*

<sup>36</sup> Ven Yop waseg, Yeisuw nagamag natan yagan Tabit, pinyuwein yagan Dokas; vin manāwen nawotet bwanabwein, singaya isiwyoubus tasiyas tasimavs.

<sup>37-38</sup> Misumkwey townen ikatoun avakaein, mo ikanig. Iwidis won, isewas bunatum kasiyuwein wanuwan; o peinan Yop kadilakusana Lid, o peinan Yeisuw nagamag niliganes Pita nises ven townen Lid, mo ikayabes tawaw asteiy; inounas, inekes Pita, ilansa, “Nuwanaw kum, taneis Yop.”

<sup>39</sup> Pita iligen, itamanaw, siney tasiyas mo ineis. Pita isap, im; itokes Pita inawes bunatum townen wanakaew nakanig nimsik-yay. Nakubukwabs babaws-wan itomos wadadan Pita ivvalams, ika-timlakes asikweima babaw, ilansa, “Kukin amakweim. Dokas, igaw son mwamovan nises, nibalal maynsiyas amakweim magayana.”

<sup>40</sup> Pita ikayabes, ineis watoulan, ibasen kitatun, initoug Yowbad waseg, mo itouvin, inek nakanig,



ilana, “Tabit, kukit.” Ilivan ikous, mo ikiplal matan, ikin Pita, ikit.

<sup>41</sup> Pita iyous wanaman, mo itamnow; idawes tayakelesiys sisiyas nakubukwabs tasiyas, mo imeis, ikines Dokas bo imov.

<sup>42</sup> Butun wotet towen in vena babaw Yop walasin, kalamwey babaw gamag mo isimounids Yowbad waseg.

<sup>43</sup> Pita nisesuna Yop, yam babaw waseg; mim-sikey Saymon wanbunatum, mtowen nabalal kaleivin man.

## 10

### *Pita inek Koniliy*

<sup>1</sup> Gum-Sisaliy yagan Koniliy, mina-Lom sitakanaviys sitovek; takanaviy tasiyas mina-Italiy.

<sup>2-3</sup> Taw towen ansinap bwein, siney angamag ivnases Yowbad; tuta babaw isiwayoub gamag wasigeis. E, tuta babaw initoug Yowbad waseg. Kweitan yam, kwayav waseg, igawa ininitoug, ikin magina gum-libalab teitan imek, idibek, ilana, “Koniliy.”

<sup>4-6</sup> Iggintov, ivag anpwayat, mo ilivan, ilana, “O guyaw, aveiyag sivinam?”

Gum-libalab mo ilivan, ilana, “Peinan munitoug babaw, sona musiyayoub wasigeis tasimavs, mapuna Yowbad mo inuweim yakoum. Tut towen bweina kwayabes mugwamag mwasanin bineis Yop, bidibakes Saymon beim. Mtowen Saymon, yagan kwayuwein Pita, nises valeyin Saymon wanbunatum, towen tawtelein kaleivin man; nabunatum wakawalaw nises.”

7-8 Anelos ilivan ikous, inoun, in; Koniliy mo idawes nagamag asteitoun; tawwotets wanuwan nabunatum asteiy, sisiy natakanaviy tatanok. Takanaviy townen ansinap bwein, tuta babaw iwotet natovek waseg, mamagina takanawein aygan. Anelos anilivan ikatipel isekes ikous, mo ikayabes bineis kid Yop.

<sup>9</sup> Iyam-nen, yanay waseg, igawa waked inounas, ineis kadilakusan ven townen Yop, Pita mo imwen wakunuwatan bunatum silmanin binitoug waseg Yowbad. Peinan sibunatum manamas kunuwatan.

<sup>10</sup> Pita ivag anamoun, sivilan beikam. Igawa ikaleibwans wabunatum, matan makava isisawl, ikin magina youd kweitan.

<sup>11</sup> E, ikin libalab itavis, o mamagin kweim avakaen, matan palavas vatul iyawanis mo ikaygwagwes, italaves vatul waseg ee... in, iton watinow.

<sup>12</sup> Wanuwan kweim townen man babaw nisesus, mansiyas inounas wapwepway kikeis waseg, o mansiyas itatets wapwepway o mansiyas sam pinpineis iyoyows wanakaew.

<sup>13</sup> Pita ikin, mo iligen aygan teitan, ilana, "Pita, kun, kuweiy mansiyas man vagan bukukwam."

<sup>14</sup> Pita ikatimop aygan, ilana, "O Guyaw, adok nag, ta-mawan bakam man tasiyas, bwaboum. Kweiboug nag; adok nagein-vak nag."

<sup>15</sup> Vayuwein mo ilivan, ilana, "Magat Yowbad bivag bwein, bo bwein; awoum kupiyev; awoum kulana, 'Bwaboum;' awoum."

<sup>16</sup> Sivaton ivag mawan, youd townen mo iyum in walbalab.

17-18 Igawa Pita ininuway, ilana, “Aveiyag silawun youd towen nakin?” Koniliy nagamag tasiyas mo isaps, ikatugwans wasigeis mwasanin gamag, ilansa, “Avanuy Saymon nabunatum?” Tasiyas mo ikatimlakes nabunatum mo ineis bunatum towen waseg. E, itamanaws wakoukwed, ikatugwans, ilansa, “Tabta amibwabwal mtowen Saymon Pita, ne?”

19-20 Pita, igaw wanakaew, ininuway waseg youd towen mwana nikin, Yowbad Kululuwan mo ilana, “Kutamanaw. Gamag mwasanin watinow nisesus, inineveims yakoum. Kun, kunekes, mo simwey tasiyas kunounas; awoum nuwam bikubukub, peinan yey tatoneig nakayabes nimeis.”

21 Pita mo ibus, inekes, ilana, “Yey-yaya, kunn-eveigs. Aveiyag wawun nukumeis?”

22 Ilivans, “Matovek teitan takalikay, ansinap kamnat, tuta babaw igoul Yowbad aygan, o min-Yudiy babaw ikakinsa ansinap bwein. E, Yowbad natakayob bo idibek matovek, ilana, ‘Kudow Saymon Pita beim wambunatum, anilivan kuligen.’ Mapuna nikayabem nakam.”

23 Pita ilana, “Bwein, kumeis wabunatum kumasis, peinan bo ikwayav. Nubweig mo tanounas bitaneis.” Iyam nen mo ineis, sisiyas tayakelesiys mina-Yop mwasanin.

24 Akweiy yam mo isaps Sisaliy. Koniliy bo inmis Pita bo beim, mapuna mo idawes taliven sisiyas ansinvalams nikatuyouns nimeis.

25 Pita mo isap wanbunatum towen, Koniliy inek Pita, ikulul wamatan.

<sup>26</sup> Tage Pita bo iyous wanaman itamnow, ilana, “Awoum kukulul wamatag, awoum; yey gamag maʼwana yak.”

<sup>27</sup> Igawa ilivans son Koniliy, isiws wanuwan bunatum, Pita mo iban gamaga babaw, nisinkunouks wabunatum nisesus.

<sup>28-29</sup> Pita mo ilivan wasigeis, ilana, “Kukwakins gum-Yudiy nag bimek tobwag ven gimgeilin, nag bilakwen, nag bikaypuls son; bwaboum. Tage tut townen agumikon waseg, Yowbad bo ikatimlakeig bweina banekes tobwag ven gimgilis; awoum badok bwaboum. Mapuna nukudaweigs nam, nag apiyev. Kadiloka kudibakeigs wawun nukudaweigs nam.”

<sup>30-32</sup> Wankuyeim Koniliy mo ilivan, ilana, “Yam kweivas nein wankuyeim, kwayav waseg, kaʼlas itageg, maʼwana tut townen nagein; e tutan nitoug kwayav yam townen waseg, yey ases wagunbunatum anitoug waseg Yowbad. Igawa aninitoug mo akin taw teitan itamanaw wamatag, anakweim gimagim seikwan. Taw townen mo ilivan ilana, ‘Koniliy, peinan munitoug babaw, o peinan musiwayoub babaw wasigeis tasimavs, Yowbad bo inuweim yak. Tuta townen kwayabes mugwamag mwasanin bineis Yop, bidibakes Saymon beim. Mtowen kwayuwein yagan Pita; valeyin anbwabwal nisesus son. Valeyin tawtelein kaleivin man; nabunatum wakawalaw-o nises.’

<sup>33</sup> “Mapuna akatimaʼles gungamag mwasanin, niwekeims, o bo ikalin nuwag yakoum peinan nukum. O tut townen yakamey babaw wamatan Yowbad nakases, sivinem bakaligen daGuyaws

nakaleiwag; aveiyag nidibakeim yak, kwatipel babaw kusekem.”

*Pita ilivan Koneliy nagamag wasigeis*

<sup>34-35</sup> Pita mo isilamaw anilivan, ilana, “Mounid akakin wamatan Yowbad gamaga babaw yakids katanok-wan; o vena babaw gimgilis toubweins, kukin bivnases Yowbad, Yowbad mo bikalin nuwan gamag tasiyas wasigeis.

<sup>36</sup> “O Yeisuw Kelis, gamaga babaw daGuyaws townen. O Yowbad bo isek anilivan bwanabwein silmanin min-Yisleil yakamey, vagan beitaw nuwem.

<sup>37-38</sup> “O yakamiy kukwakins livanen gum-Nasalet townen Yeisuw; e, kweiboug Yon nigeiguy, nibaptayses gamag, wankuyeim Yeisuw isilamaw nageiguy Galiliy, ininoun in vena babaw Yudiy wasigeis; livanen Yeisuw vena babaw ibekena, peinan Yowbad natawtoun iligob Yeisuw waseg, magina Kululuwan Townen Bwanabwein inek; mapuna ininoun ililabesa gamag babaw, o tasiyas Seitan niyagages, ilivan mo ibweins, peinan Yowbad son. Livanen townen kukwakins-wan.

<sup>39</sup> “O yakamey nakakin youda babaw nivvag vena babaw wanuwan Yudiy, o Yelusalem waseg; mo iweiys ikatikavates wakamweilok.

<sup>40-42</sup> “Yam kweitoun Yowbad ivag, mo itamanaw vayuwein; gamag mo ikinbunikes. Tage gamaga babaw nag ikines; misinaka yakamey, kweiboug Yowbad nikatigikem takawein bulagan Yeisuw yakamey; bo nakakin neimov vayuwein; simey nakakam; simey nakamoum; mo isekem mawotet vagan bakageiguy gamag

wasigeis. E, kaggeiguy vagan gamag bikakins Yowbad nikatigik Kelis townen igaw mo bikaleiwag vagan bimop asisinap tamwamovs sisiyas takanigs.

<sup>43</sup> “O townen Kelis, palopit tasiyas kweiboug nilivnakes townen tawidin sinap kalbaleb wasigeis tasiyas kalisiy bisimounids yagan waseg.”

*Yowbad Kululuwan inekes tobwag ven gimgilis*

<sup>44</sup> Pita igawa illivan anilivan townen, Yowbad Kululuwan mo inekes tasiyas taliganeins livan townen.

<sup>45-47</sup> O min-Yudiy tayakelesiys tasiyas sisiy Pita nimeis bo isom ninous, peinan ikines Yowbad isiwyoubus tobwag ven gimgilis, Kululuwan Townen Bwanabwein bo inekes tasiyas asibabaw-wan. Ikines tasiyas singaya iyakawanes Yowbad, o ilivans kaeig kweitan kweitan wasigeis, peinan Yowbad Kululuwan nises wasigeis tasiyas. Min-Yudiy tasiyas bo iliganes siyakawn o sikapleon amav, mapuna Pita ikatiganes, ilana, “Kal bisilbwed sibaptays tasiyas? Tago-mawan bitasilbwed. Bweina bitabaptayses peinan Yowbad Kululuwan bo inekes, mawana yakids kweiboug.”

<sup>48</sup> Pita mo ikaleiwag bibaptayses kid Yeisuw Kelis yagan waseg. Sibaptays ikous, mo ilivans, ilansa, “Simayas yakamiy bweina tasesus, igaw yam mwasanin waseg mo bukuyums.”

# 11

*Sinap townen Pita mo ikamat Yelusalem waseg*

1 Yudiy waseg, takaweins livanen Yeisuw sisiyas tayakelesiys bo iliganes sinap towen, mamagina tobwag ven gimgilis bo itimakes Yowbad anilivan.

2-3 Iyum Pita in Yelusalem, tayakelesiys tasiyas Yowbad nakabivatus wasigeis, mo ivtokes livan Pita, ilansa, “Yakoum bo kunekes tasiyas nag ivag Yowbad nakabivatus? Kwamtans simwey, ne? Bo igak!”

4-5 Pita mo itakud livanen nawotet towen, mamagina; “Yey nases Yop, anitoug Yowbad waseg; matag makava isisawl, kweitan youd akin, mamagina kweim avakaein, vatul iyawanis kweim to matan palavas, mo italaves ee... in iton watinow, wamatag-wan.

6 “Yey akinbunik, wanuwan kweim man babaw, mansiyas sam kikeis inounas watinow, o mansiyas bulawud kawkawek, o mansiyas ta-ivag nimes tage itatets wapwepway, o mansiyas sam pinpineis iyoyows wanakaew.

7 “Wankuyeim mo aligen aygan teitan idibakeig, ilana, ‘Pita, kun, kuweiy mansiyas man silmanin bukukwam.’

8 “Yey akatimop livan towen, alana, ‘O Guyaw, ta-mawan bakam mansiyas man, bwaboum. Kweiboug nag. Adok nagein-vak nag.’

9 “Vayuwein aygan towen, libalab waseg, mo ilana, ‘Magat Yowbad bivag bwein, bo bwein; awoum kupiyev; awoum kulana; “Bwaboum.” Awoum.’

10 “Sivatoun ivag mawan, youd towen mo iyum in walbalab.

11 “Misumkwey towen tawaw teitoun mo itamanaws wawkwedan bunatum towen nakasikey-yay; peinan gum-Sisaliy nikayabes nimekeigs.

12 “Yowbad Kululuwan mo idibakeig, ilana, ‘Simwey tasiyas kunounas; awoum bisunasun nanoum; bwein-wan.’ Sigwey tayakelesiys asteinim tatanok, tasiyas-nan, nakan, kasiw taw towen wanbunatum.

13-14 “Towen Koniliy nidibakem ilana, ‘Akin gum-libalab nitamanaw wagonbunatum, ilana: “Kwayabes mwasanin gamag bineis Yop bidawes Saymon Pita beim; mtowen Pita mo bisekeimiy sinap bwanabwein; e, sinap to waseg, Yowbad mo bikatinabweimiy simwey tasiyas mugwamag wambwabwan nisesus.”’

15 “Asilamaw agulivan wasigeis tasiyas, Yowbad Kululuwan mo inekes tasiyas, maḡwana yaḡkids kweiboug.

16 “Wankuyeim mo anuw daGuyaws anilivan mamagina, ‘Yon bo ibaptays soup waseg, tage yakamiy igaw Yowbad mo bibaptayseimiy Kululuwan Towen Bwanabwein waseg.’

17 “Wanmugwana yaḡkids nitasimounids daGuyaws Yeisuw Kelis waseg, mo isiwyoubuds Yowbad Kululuwan waseg; tut towen mo isiwyoubus tasiyas maḡwan. Yey ta-maḡwan bavkek basilbwed Yowbad nawotet.”

18 Min-Yudiy tasiyas iliganes Pita anilivan, ta-maḡwan bikatimapus aygan. Tage ikavasisa Yowbad, ilansa, “Tage Yowbad bo isiwyoubus tobwag ven gimgilis, vaḡan asisinap kalbaleb bilavewas, mo sona simwamov bisigagas.”



*Tayakelesiys ven Antiyok waseg*

<sup>19</sup> Kweiboug tanuwgwes-lun neiweiys Sitiben, ikous, mo iyablebes tayakelesiys Yelusalem waseg; mapuna igayays, mwasanin ineis Pinisiy, mwasanin ineis Saypilos, mwasanin ineis Antiyok; vena babaw waseg ikatpeles livanen Yeisuw, tage misinaka isekes min-Yudiy tasiyas nikoulups nisesus ven wunsiyas; nag isekes livan townen gamaga babaw wasigeis, nag.

<sup>20</sup> Tage sisiyas tasiyas min-Saypilos mwasanin o min-Saylin mwasanin ineis Antiyok mo isekes Guyaw Yeisuw livanen bwanabwein, mina-Gilis wasigeis.

<sup>21</sup> O peinan Yowbad ilabes, babawa gamag ikanavin ninous; mo isimounids Yeisuw waseg; mo ikatimweisis singaya babaw gamag.

<sup>22</sup> Tayakelesiys tasiyas nisesus Yelusalem iliganes, mapuna ikayabes Banabas bein kid Antiyok.

<sup>23</sup> Townen Banabas isap, ikakin Yowbad singay isiwayoub wasigeis tasiyas, mapuna ikalin nuwan avakaenin; e, idibakes gamag tasiyas, ilana, “Kadiloka kusimkines, kutoukums daGuyaws inawotet waseg.”

<sup>24</sup> Mtowen Banabas gimgilitoun townen, singaya isimounid Yowbad waseg, o itawtoun, peinan Kululuwan Yowbad son nisesus. Misiyamun townen Yeisuw nagamag ikatimweisis; bo ibabaw.

<sup>25-26</sup> Wankuyeim Banabas in Talisus inineiv Soul, iban, mo itok; asteiy mo iyums ineis Antiyok. Nisesus Antiyok bweilim katanok, sitapwaloul waseg bo ikatimlakes tayakelesiysa babaw. Wanmugwana Antiyok waseg idokes

magawen yeg Kelistiyan mo idawes tayakelesiys yiges tasiyas.

<sup>27</sup> Misumkwey towen palopit mwasanin meinoy nimeis Yelusalem, imeis isaps Antiyok.

<sup>28</sup> Teitan yagan Agabous; Kululuwan Yowbad ikatipel ansinap isek mtowen Agabous, mo itamanaw ilivan, ilana, “Kadilakusa bo bitalivatus tut kalbaleb, vena babaw wasigeis, peinan nag beikweis kweis, o nag beivag kan.” Magina bo ilivnek livan towen. E, anatum Kalodiw nakaleiwag waseg mo ikamat youd towen.

<sup>29</sup> Mapuna tayakalesiys Antiyok waseg, tasiyas sam sivavag, idokes kid katanok katanok bimulouls; o muloul towen igaw mo biwyabes vagan bilabes tayakelesiys tasiyas Yudiy nisesus.

<sup>30</sup> Imulouls ikous, mo isekes Banabas son Soul, ikawes, inawes Yelusalem, silmanin tayakelesiys situwaweiks ven towen waseg.

## 12

### *Iweiyis Yemes, mo Pita isenas wadeil*

<sup>1</sup> Misumkwey towen King Elod iyousis tayakelesiys mwasanin vagan kid biyagages.

<sup>2-3</sup> Yemes, mtowen Yon tuwan, bo ibob kayon, pulut tanmunum waseg. Mapuna ikalin nuwes tasiyas min-Yudiy. O peinan ikalin nuwes, Elod mo iyous Pita, wik towen waseg min-Yudiy nag beikams bled son yist, bwaboum.

<sup>4</sup> E, iyousis Pita, inawes wadeil, Elod siwotet isekes natakanaviys vagan bintakavates Pita, natakanaviy tasiyas babiweis sinawatan teinim tatanok. Wananon idok, igaw beikous sagal

towen yagan Kaltuwon, mo bitok Pita bisekes min-Yudiy vagan kid biyateles.

<sup>5</sup> Igaw Pita nises wadeil, tayakelesiys singay ikalin nuwes, initougs, igilagels Yowbad waseg, vagan kid bileb towen Pita.

*Gum-libalab ikatinob Pita*

<sup>6</sup> Pita nises wadeil yam mwasanin ikous, Elod idok yamtan yam mo biyatal waseg. E, bo iboug, Pita imasis wanuwein takanaviys, teitan palatan, teitan palatan, immasis, o sen bo iyawanis naman Pita, walitan palatan, walitan palatan; o takanaviys mwasanin itamanaws wakoukwed, imtakavatays deil towen.

<sup>7-8</sup> Igaw immasis, Yowbad natakayob isap, itamanaw wadadan Pita; mititeilin im imteil nuwan bunatum. Gum-libalab towen im igipit Pita wawiligan, iwgun, ilana, “Kutamanaw! Nuwanaw!” Anasen tatonen mo ikabilow wanaman. Mo ilana, “Amuwat kuyawen, musandol kuvaligev.” Ivag mawan, mo ilivan, ilana, “Amukweim kusikam, mo kum kwabkunig yey.”

<sup>9</sup> Nuwanawa inek, ikabkun; ineis; nag isimounid waseg youd towen gum-libalab nivag; idoki mamagina matan isisawla mav.

<sup>10</sup> Isaps koukwed kweitan, iwekes takanaviys nisesus; isiws isaps koukwed kwayuwein waseg, iwekes takanaviy nisesus; isiws isaps koukwed avakaein waseg, tanmunum; tatonen ikaliyow, mo isaps wavtakon ven; e inounas wavtakon ven, gum-libalab nuwanaw mo inoun in.

<sup>11</sup> Wankuyeim Pita mo ikakin, ilana, “Bo akakin mounid daGuyaws nikayeb gum-libalab towen

nikatinabweig Elod waseg, isilbwed gog asisinap waninous tasiyas min-Yudiy takalbalebs.”

<sup>12</sup> Nanon idumwal ma<sub>w</sub>an, mo inoun in Meliy wanbunatum, ma<sub>w</sub>anwen Yon inan, Yon yagan kwayuwein Mak; o bunatum townen waseg, babaw gamag nikatuyouns nimeis innitougs Yowbad waseg.

<sup>13-14</sup> Igipit wakoukwed; nakubukwab nawwotet, yagan Lod, mo in ilivan, “Kal yak kuggipit?” Iligen aygan Pita, sona nam<sub>w</sub>asaw isiwlayum; nag ikaliyow koukwed, isawl in wanuwan bunatum, ilana, “Pita bo isap, nitet watoulan.”

<sup>15</sup> Ilansa, “Adok nakabalawein yak.”

Iw ma<sub>w</sub>anwen, ilana, “Mounida Pita nises.”

Mo ilansa, “Adok aluwan-nan.”

<sup>16</sup> Igaw Pita iggipit, mo ikaliyowes koukwed, ikines Pita; singaya bo isom ninous.

<sup>17</sup> Tage Pita naman itamnow, ikatitun asilivan, mo itakud ma<sub>w</sub>an siGuyaw nikatinob wadeil, mo ilana, “Kudibakes Yemes sen nagamag,” mo inoun in kweitan ven.

<sup>18</sup> Iyam gaboug mo ivag mouvit wasigeis takanaviys siyas, peinan nag iban<sub>e</sub>s Pita.

<sup>19</sup> Elod siney natakanaviys mo inineivs Pita; inineivs, bo nag. Mapuna iyateles natakanaviys, ikaleiwag mo ikatimates tasiyas. Wankuyeim mo ilisow Yudiy, iwloubus in Sisaliy, nisikey-yay.

### *Elod ikanig*

<sup>20</sup> Elod singay ikawkunes min-Tayil sisiy min-Sidon; o tasiyas sivines beimwas, mapuna

isineikimas; wanmugwana imwas waseg Bila-sit, mtowen nawotet King Elod wanbunatum; wankuyeim asilivan mo ikow isek King Elod vagan kid beimwas siney tasiyas. Ivages mawan peinan niggimweles kaeis Elod waniven.

<sup>21</sup> Elod ikatigik siyam, ilana, “Yam towen waseg mo kumeis.” E, imeis, mo isap wantes gamag tasiyas; bo isikam King kweiman, singay may-namnabwein, isin wakaban, mo iliwon wasigeis tasiyas.

<sup>22</sup> Illivan ikous, mo iwaks, ilansa, “Nag kweitan gamag aygan mawan; towen mamagina yowbad aygan.”

<sup>23</sup> Nuwanaw Yowbad natakayob mo iweiy King towen, peinan ibakew Yowbad yakawanan; ikasimwamwat nuwan, mo ikanig.

<sup>24</sup> Wankuyeim babaw gamag mo iliganes Yowbad aygan, vena babaw wasigeis.

<sup>25</sup> O peinan siwotet bo ikous, Banabas son Soul mo ilisawes Yelusalem, sisiy itokes teitan gamag yagan Yon, yagan kwayuwein Mak.

## 13

### *Isekes siwotet Banabas son Soul*

<sup>1</sup> Ven Antiyok waseg, tayakelesiys wasigeis palopit mwasanin nisesus, o mwasanin takatimlakeins Yowbad nakaleiwag. Teitan yagan Banabas; tayuwein Simiyon, mtowen yagan kwayuwein Wobug; tatounun gum-Saylin yagan Lukiyos; tavašin Manen, son Elod asibweilim

katanok-wan, kweiboug niskuls son townen, min-Galiliy siguyaw avakaein Elod; o tanimen yagan Soul.

<sup>2</sup> Tasiyas ivnases Yowbad nawotet, ipsapos silmanin; Kululuwan Townen Bwanabwein mo inekes, ilana, “Kadiloka kutames Banabas son Soul silmanin wotet kweitan bakatigik siwotet.”

<sup>3</sup> Mapuna ipsapos innitougs Yowbad waseg, mo isenas nimes wawous tasiyas, ikayabes silmanin wotet townen.

### *Ineis Saypilos igeiguys*

<sup>4</sup> Peinan Yowbad Kululuwan nakaleiwag mawan townen, bo ikayabes, iwloubus, ineis Selusiy, itouws wawag, ikuks ineis Saypilos.

<sup>5</sup> Ineis wanakaew ven yagan Salamis, mo igeiguys Yowbad anilivan, min-Yudiy sisinagog nisesus ven kweitan kweitan wasigeis. Sisiy Yon, mtowen illabes.

<sup>6</sup> Sim townen ikanpeles, isaps palatan, ven yagan Pepos, mo ilouvats sisiy tamgameg teitan, gum-Yudiy, yagan Bayosuw; gamag babaw idokes palopit teitan; nag gog, tayyaweid.

<sup>7-8</sup> Gabman-nen ven townen, yagan Segipawl, tassinap teitan. Mtowen Bayosuw son Segipawl nisesus. Segipawl idawes Banabas son Soul bimeis, sivilan kid biligen Yowbad aygan, tage tamgameg townen Elaymas idoki bisilbwed; nag sivilan gabman townen biligen Yowbad nakaleiwag. (Yagan Bayosuw takativin bein kaeig kweitan Elaymas.)

<sup>9-10</sup> Mapuna Soul, nidokes yagan piniyuwein Pawl, bo itawtoun singay, peinan son Kululuwan

Yowbad, ikinbunik tamgameg townen, ilana, “Seitan natun yakoum, singay takalbaleb o tayyaweid yak; tuta babaw kusilbwed sinap bwein, tuta babaw sivinam Yowbad inaked bukukididog.

<sup>11</sup> “E, tut townen Yowbad bo beiweiy matam; tut mwasanin nag matam beikin kalas mititeilin, peinan bo beikaw matam.” Nuwanawa matan mo ikaligwen, wankuyeim mo ikaw singay dadub. Ininoun, inineiv kavel biyous naman vagan bitok, peinan ta-mawan bikin inaked.

<sup>12</sup> Gabman townen Segipawl ikin wotet townen, mo isimounid Yowbad waseg; iligen daGuyaws nakaleiwag, waseg isom nanon.

*Paul son Banabas ineis Antiyok ven Pasidiy waseg*

<sup>13</sup> Pawl siney nagamag mo ikuks, ilisawes Pepos ineis Pelig, wawnuwan ven avakaein Pampiliy; tage Yon ilisawes, iyum in Yelusalem.

<sup>14</sup> O tasiyas ikanpeles Pelig ineis Antiyok, ven Pasidiy waseg; isaps ven townen; Sadad waseg mo isiws wanuwan sinagog, tapwaloul silmanin.

<sup>15</sup> Tapwaloul waseg ivinis Bukitab, Moses nakaleiwag kweitan yageivein o palopit asilivan kweitan yageivein; ivinis ikous, mo tanuwagan sinagog idibek teitan ikatugwan wasigeis Pawl son Banabas, ilana, “Sigwey yakamiy, kukin amisinap nises, kadiloka kugeiguys gamag babaw wasigeis.”

<sup>16</sup> Pawl mo itamanaw, itamnow naman, ilana, “Min-Yisleil yakamiy, o tagouluns Yowbad yakamiy, kunages agulivan.

17 “Min-Yisleil yakids, daYowbads bo idawes tamumwey, igawa nisesus Yidipt; e, ilabes mo itawtounsa singay; o natawtoun waseg imgwayes, mo isaps vagan bineis kid wasiven tatineis.

18 “Wankuyeim sinawavas bweilim wanawoud mo imgwayes tasiyas, o singay mounouvit, peinan tuta babaw takakons tasiyas.

19-20 “DaYowbads mo iweiyis ven kweinim kweiy, Kenan wawnuwan. Yowbad nisekes tamumwey sipwepway townen; e nisesus ven townen bweilim babaw, lakatuvas sinawanim bweilim. Wankuyeim mo isekes situwawek vagan bikaleiwags wasigeis. Tasiyas ikaleiwags bweilim babaw ee... mo isilamaw nakaleiwag palopit townen Samwel.

21 “Wankuyeim mo ivag sivines siking kid beivag; initougs waseg Yowbad, mo isekes siking teitan, Kis natun yagan Soul, anakum Binyamin, anbweilim sinawavas.

22 “Wankuyeim Yowbad mo ipiyev king townen Soul; siking kweivaw mo ikatipel isek mtowen Deibid. Livanen Deibid Yowbad nilivan, mamagina, ‘Bo aban Desiy natun Deibid, ikalin nuwag waseg; mtowen biwtel youda babaw mawana nanoug yey.’

23 “O mawana Yowbad kweiboug-o nilivnek; tut townen bo isek Deibid tabun nawotet vagan bikatinabweids min-Yisleil yakids. O Deibid tabun townen yagan Yeisuw.

24 “Yon bo ikidumwal ked wamatan Yeisuw, inageiguy min-Yisleil babaw wasigeis, vagan bilaves kid asisinap kalbaleb, mo bibaptayses.



25 “Yon nawotet iyakous, mo ilivan mamagina, ‘Kuninuways kavel yey. Yey nag Kelis mtowen kukwayamats, nag. Tage watibweloug teitan bo beim; nag kadilokeig bakulul wamatan vāgan bakablev nasandol, nag. Peinan towen guyaw avakaein.’

26 “Sigwey, Ebelam tibun yakamiy, o kalisiy yakamiy kugoulus Yowbad, anilivan bo isekeimiy vāgan bikatinabweimiy.

27 “O min-Yelusalem sisiyas situwāveks nag bikakins mtowen Yeisuw bikatinabweids; o nag bikakins palopits asilivan Bukitab wanuwan. Asilivan tasiyas Sādad katanok katanok, tapwāloul waseg, ikatilutegsa mav tage nag bikakins silawun. Mapuna mo iyateles mtowen Yeisuw; o māwana nikatigik kweiboug-o livānen Yeisuw, Bukitab waseg, nagein gog mo ikamat livānen māwana nilivnek.

28 “E nag ibānes ansinap kalbaleb vāgan beiweisy, tage bo initougs takaleiwag towen Paylat bikatimet kid.

29 “E livānen babaw nises Bukitab wanuwan, mo iwteles māwan; e, imat, ikaygwagwes wakamweilok ee... inibwis, mo ikawes inawes, isewas watakunumwan.

30 “Yowbad mo iyakit, itamanaw vayuwein.

31 “Tasiyas kweiboug sisiy Yeisuw nitanouys ven Galiliy waseg ineis Yelusalem; e, tasiyas yam babaw ikines Yeisuw, bo imov. Asilivan tasiyas mo isekemas yakamey, o isisekes-vak gamag babaw wasigeis.

32-33 “O livan towen bwānabwein kasekeimiy yakamiy, o youd towen kweiboug-o Yowbad

nilivnek tamumwey wasigeis. O nagein gog youd townen bo ikamat wasigeis yakids, tamumwey tibsiyas yakids, peinan Yeisuw igawa wakanig nises, Yowbad mo iyakit vayuwein. Livanen nises Sam kwayuwein waseg, mamagina:

‘Yakoum natug yak. Nagein mo nukumlavag natug.’

<sup>34</sup> “Igawa wakanig nises bo ikit; nag bikanig vayuwein, nag. Won nag beipwas, nag. Livanen nises, Yowbad anilivan mamagina:

‘Gunasiwayoub waseg Deibid, tage igaw mo basekeim yak.’

<sup>35</sup> “E, livan nises kweitan Sam waseg, mamagina,

‘Mugwamag townen kukwayus, nag bukutam won beipwas, nag.’

<sup>36</sup> “Deibid inatut ven watinow waseg, bo ikokew Yowbad nakaleiwag; mo ikanig, inekes timen, won tonen bo ipwas.

<sup>37</sup> “Tage Yeisuw won nag ipwas, peinan Yowbad bo iyakit vayuwein.

<sup>38-39</sup> “O sigwey yakamiy, kunages amalivan, kadiloka kukwakins townen anmwānet biwid adsinaps kalbaleb. Adsinsa babaw, Moses nakaleiwag waseg na-ikadilok biwid; tage kukin bitasimounids waseg Yeisuw, mo biwid adsinaps kalbaleb, babaw-wan; Yowbad mo binumlev, beikous.

<sup>40-41</sup> “Palopit kweiboug-o anilivan mamagina: ‘Tayyagays yakamiy, kukines gunawotet, beisom ninoumiy, mo bukumtamats.

Peinan mitut waseg gunawotet bawtel;

gamag mwasanin bikatimlakeimiy gunawotet  
townen,

tage nag bukusimounids; nag.’

E, palopit anilivan mamagin. Kadiloka ku-  
vnaseimiy, mata ge tut wanakougwaw livan  
townen bikwaneimiy.”

<sup>42</sup> Pawl nageiguy ikous, isaps wannat, gamag  
babaw mo initougs wasigeis, sivines kwayuwein  
Sadad mo bisekes livan townen.

<sup>43</sup> Ikous tapwāloul, sinagog townen waseg,  
gamag babaw bo ikabwākuns wasigeis Pawl  
son Banabas, min-Yudiy babaw, sisiyas tawaw  
tadidumwals mwasanin, tasiyas kweiboug  
nikawes min-Yudiy asisinap. Pawl son Banabas  
mo ilivans wasigeis tasiyas, iguyes silmanin  
bisimkines Yowbad nasiwayoub waseg.

<sup>44</sup> Katanok wik ikous, Sadad waseg, ven townen  
gimgilis babaw ikatuyouns nimeis, sivines kid  
biliganes livanen Yowbad.

<sup>45</sup> Tage Yudiy gimgilis, ven townen waseg,  
bo igeg ninous, peinan gamag babaw sivines  
biliganes anilivan Pawl, mapuna ikamnimans  
sisiyas Pawl nagamag, sona siyagay.

<sup>46</sup> Pawl son Banabas mo iwons, ilansa, “Kadilok  
wanmugwana bakasekeimiy Yowbad livanen.  
O peinan kupiyaves livan townen, o peinan  
kupiyaves ked silmanin mwamovamiy nag beik-  
ous, takaleiwagsa yakamiy. Adok livan townen bo  
bakasekes tobwag ven gimgilis wasigeis.

<sup>47</sup> “DaGuyaws nikalawagem māwan, peinan  
Bukitab waseg anilivan nises mamagina,  
‘Bo akalawageim, vena babaw sikamnat yakoum;

Vagan bukuymoves vena babaw gimgilis wadaban pwepway.’ ”

<sup>48</sup> Vena babaw gimgilis iliganes Pawl anilivan townen, bo imwasaws; ikalin nuwes Yowbad waseg, anilivan townen silmanin. O peinan Yowbad nikaleiwag mwasanin son simwamov mo bisigagas, tasiyas bo isimounids Yowbad waseg.

<sup>49</sup> Gamag tasiyas mo ikawes livanen Yowbad, inawes vena babaw wasipalatan.

<sup>50</sup> Tage min-Yudiy bo ikamliwes Pawl son Banabas, mo ivtokes livan. Mwasanin iliganes asilivan, guyvinay siyas nasiwayoubs, sisiyas tamumwey mwasanin; wankuyeim mo ivages asisinap kweitan, ipiyaves Pawl son Banabas, iyagages; ikayabes kid bineis kweitan ven.

<sup>51</sup> Tage tasiyas Pawl son Banabas ikatsapis kikeis, musamusan ven townen waseg, peinan ipiyaves ven townen gimgilis. Tasiyas mo inounas waked, ineis Ikoniya.

<sup>52</sup> Tasiyas gog nikawes livanen Yeisuw bo imwasaws, peinan Kululuwan Yowbad sisiy tasiyas.

## 14

### *Pawl son Banabas ven Ikoniya waseg*

<sup>1</sup> Mawana ven townen nilisawes, mawana ven townen Ikoniya waseg, isiws wanuwan min-Yudiy sisinagog, igeiguys; e, tasiyas min-Yudiy o mina-Gilis, tabebaws-wan, mo iliganes asilivan tawaw tasiyas asteiy.

<sup>2</sup> Tage min-Yudiy mwasanin ipiyaves asilivan, ivtokes livan; mapuna tobwag ven gimgilis ikanavin ninous mo ikamliwes Yeisuw nagamag.

<sup>3</sup> Isesus ee... imwemway-nen; e, illivans livanen Yeisuw nasiwayoub; nag iwenes gamag, nag. O Yeisuw bo ilabes, siwotet tawtoun mo iwteles, wayagan Yeisuw; magina naman mulin Yowbad.

<sup>4</sup> Gamaga babaw ven townen waseg mo ilivis, mwasanin ilabes Yudiy gimgilis, mwasanin ilabes takaweins livanen Yeisuw.

<sup>5</sup> Wankuyeim tasiyas tapiyaveins livan townen mo isilamaws sinap kweitan. Min-Yudiy mwasanin, sisiyas vena babaw gimgilis, sisiyas ven townen gabman-nen, asibabaw idokes biyagages Pawl son Banabas, beiweiys dakul waseg, bikatimates kid.

<sup>6-7</sup> Tasiyas Pawl son Banabas bo iliganes livan townen, mo isawls ineis Lisitil o Dabiy o vena babaw wawnuwan ven avakaein Lakeyoniy; mo igeiguys livanen Yeisuw, vena babaw wasigeis.

### *Pawl son Banabas ven Lisitil waseg*

<sup>8</sup> Taguyagwey teitan isin ven Lisitil waseg, kaken paleyuna ipam; ta-mawan binoun. Igawo inan nikopweyay mawan-wan.

<sup>9-10</sup> Pawl isap, ilivan gamag babaw wasigeis, o taw townen iligen. Pawl mo ikinbunik taw townen, ikakin inanamis nises waseg Yeisuw vagan bivag kid mo beibwein; mapun mo ilivan, aygan avakaein, ilana, “Kutamanaw, kutadamoms;” taw townen mo ipel, itamanaw, inoun.

11 Gamag babaw ikines Pawl nawotet townen, mo iwaks, aga-Lakiyoniy waseg, ilansa, “Dayowbads bo imlavags gamag, bo ibus, ilakewaneids yakids gamag ven watinow.”

12 Banabas idokes Yupit, peinan siyowbad yagan Yupit; Pawl idokes Makiyul, peinan talliwon.

13 E, tanuwagan lun silmanin Yupit nises ven townen, o lun buntuman nises ven townen koukwed wadadan. Townen ivaniyel asipay bulumakaw wasigeis, mo itokes, sivanan kid beiweiys bulumakaw mansiyas, vagan gog beiluns wasigeis Banabas son Pawl, o gamag babaw ninous bo mawan, bo bilabes tanuwagan lun.

14-15 Tasiyas Pawl son Banabas iliganes, mo isiledes asikweim, peinan singaya igeg ninous, mo isawls, inekes gamag babaw. Ages avakaein ilivans, ilansa, “Tawaw yakamiy, awoum kuvages mawan. Yakamey gamag mawana yakamiy gamag; sinap bwanabwein bakasekeimiy vagan gog bukulavewas makava sinap townenan. Kadiloka kumekes Yowbad townen tamwamov, tabunin libalab, o pwepway, o yol, o youda babaw waseg.

16 “Tut kweiboug Yowbad itames vena babaw gimgilis binoyes siked tatineis.

17 “Tage peinan Yowbad sivanan bukukwakins kid ansinap bwanabwein, nissekeimiy kweis o kaeimiy bweilim katanok katanok, vagan bukukwamuweips, bukumwasaws.”

18 Pawl ilivan mawan, o singay keikay siwotet vagan bisilbwades ninous tasiyas; peinan singay sivines beiluns wasigeis.

<sup>19</sup> Wankuyeim min-Yudiy mo isaps, Antiyok o Ikoniyaḡ gimgiliḡ, ivalutsa livan issekes gamag babaw wasigeis, iliganes mo iweiys Pawl, dakul waseg, mo ibiteilis, ilaves in watoulan ven; idokes kid bo imat.

<sup>20</sup> Yeisuw nagamag ikatuyouns inekes Pawl nimmasis wapwepway; mo itamanaw, isuwwaw vayuwein wanuwan ven. Iyam ne-gaboug Pawl son Baḡabas mo ineis Daḡbiy.

*Iyums ineis Antiyok, ven Siliy waseg*

<sup>21</sup> Ven townen Daḡbiy waseg mo igeiguys, gamaga babaw iliganes asilivan, Yeisuw livanen. Ikous, mo iyums ineis Lisitil; ilisawes Lisitil mo ineis Ikoniyaḡ, ilisawes Ikoniyaḡ ineis Antiyok.

<sup>22</sup> Vena babaw wasigeis tasiyas asteiy ilabes Yeisuw nagamag silmanin kid bitawtouns; idibakes, ilansa, “Kadiloka kusimkines misi-mounid Yeisuw waseg, peinan tuta babaw abads bigeg mo bitasiws wanuwan Yowbad nakabkaleiwag.”

<sup>23</sup> Vena babaw wasigeis sivines tamumwey mwasanin, kalisiy bintakavates tayakelesiys, mapuna itamnawes gamag mwasanin tasimounids Guyaw Yeisuw waseg, ipsapos katanok yam o akweiy, ininitougs waseg Yowbad, mo itapwalouls, isenas nimes wawous gamag tasiyas, intougs Yeisuw vagan bikimtuwes silmanin siwotet townen.

<sup>24</sup> Ikous, ikanpeles Pisidiy, ineis Pampiliy.

<sup>25-26</sup> Illivans livanen Yeisuw ven Pelig waseg, mo iwloubus ineis Ataliy; itouws wawag, ikuks, iyums ineis Antiyok, ven Siliy waseg. Kweiboug

ven towen tayakelesiys nisekes siwotet, ininitougs silmanin Yowbad bilabes; e, misumkwey towen mo iyakousis siwotet.

<sup>27</sup> Iyums ineis Antiyok, tayakelesiys mo ikatuyouns, imeis; itakuds livanen Yowbad nawotet tawtoun to niwtel wasigeis tasiyas, peinan bo ikaliyow koukwed vagan tobwag ven gimgilis mo bisimounids, beisiws bimekes Yowbad.

<sup>28</sup> Pawl son Banabas tut kalamwey kadiveiyov nisesus sisiyas tayakelesiys tasiyas.

## 15

### *Ikaleiwags ven Yelusalem waseg*

<sup>1</sup> Isesusa ee... imwemway-nen mo gamag mwasanin meinoys nimeis Yudiy isaps Antiyok, ikatimlakes tayakelesiys, ilansa, “Kukin bukukwawes nakabivatus Ebelam, mawana Moses nakaleiwag, bweina bikatinabweimiy Yowbad; kukin gog nag, bo nag.”

<sup>2</sup> Pawl son Banabas mo itamanaws, ikanimans sisiyas; mapuna tayakelesiys mwasanin ilansa, “Simiyas mwasanin kuneis Yelusalem vagan bukullivans simsimiyas min-Yelusalem tasiyas tayakelesiys situwaweaks o tasiyas takaweins livanen Yeisuw; e, livanen Ebelam nakabivatus kwambuvisis vagan nanouids bidumwal.”

<sup>3</sup> Mapuna ilisawes tayakelesiys ven Antiyok waseg, itanouys mo ikanpeles Piniy. Ikous, mo ikanpeles Samaliy. Vena babaw ititavins ikatimlakays, ilansa, “Tobwag ven gimgilis bo ikanavin ninous, isimounids waseg Yeisuw.” Tayakelesiys tasiyas iliganes, mo imwasaws avakaen.



<sup>4</sup> Wankuyeim mo isaps Yelusalem, tayakelesiys babaw imulouls sisiyas tasiyas, o situwaweiks imulouls, o takaweins livanen Yeisuw imulouls. Pawl son Banabas mo itakuds Yowbad nawotet babaw niwtel siney tasiyas.

<sup>5</sup> Takaweins Yeisuw anilivan mwasanin, tasiyas Palisiy kweiboug niyakelesiys, tasiyas mo itamanaws, ilansa, “Kadiloka tobwag ven gimgilis bibwabwes momwes, bikanawes Moses nakaleiwag, mo beisiws biyakelesiys.”

<sup>6</sup> Mapuna ikatuyouns takaweins livanen Yeisuw, sisiyas tayakelesiys situwaweiks, vagan bikaleiwags silmanin sinap towen.

<sup>7</sup> Illivansa babaw ee... ikous, wankuyeim mo Pita itamanaw, ilana, “Sigwey yakamiy, kukwakins kweiboug-o Yowbad nakaleiwag waseg yey, vagan bakow livanen Yeisuw, banow tobwag ven gimgilis wasigeis, vagan biliganes, mo bimwasaws.

<sup>8</sup> “O peinan Yowbad ikakin ninous gamaga babaw, bo itimakes tasiyas; Kululuwan Townen Bwanabwein mo isekes, mawana yakids kweiboug.

<sup>9</sup> “Bo isimounids waseg Yowbad, mo iwid asisina kalbaleb, mawana yakids. Youda babaw ivag wasigeis tasiyas, mawana yakids.

<sup>10</sup> “Tut towen awoum bitayagages nanon Yowbad, awoum bitakaleiwag moumouvit wasigeis budidayas tasiyas. Peinan tammwayas ilapes Moses nakaleiwag; mawana yakids, bo ilapeids, nag kadilokeids.

11 “Deisa towen daGuyaws Yeisuw bo isiwyoubuds vāgan bitasimounids waseg, mo bikatinabweids; o tasiyas gog bo māwan.”

12 Tasiyas babaw bo iliganes, isesusa ge ikikapays; wankuyeim mo itakuds Bānabas son Pawl, isekes livānen Yowbad nawotet tawtoun, mamagin naman mulin nivag tobwag ven gimgilis wasigeis; o nawotet towen niwtel wasigeis tasiyas Bānabas son Pawl.

13-15 Iliganes, igawa ge ikikapays; Yemes mo iliwon, ilana, “Sigwey yakamiy, kuliganes agulivan. Saymon bo idibakeids: Wanmugwana Yowbad ilokon tobwag ven gimgilis wasigeis vāgan bidawes gamag mwasanin bikawes ansinap, o bikawes yagan tonen. E, mo ikamat youd towen, palopit kweiboug nilel Yowbad anilivan, mamagina:

16-18 “Ikous, mo bayum baw, bawlulavaw Deibid nabunatum towen nigulekwes,

Naven nises makaw; igaw mo bawlulavaw, mo biton bitadumwal beibwein.

Bawtel māwan vāgan vena babaw gimgilis mo bineveigs siGuyaw yey.

O silmanin tobwag ven gimgilis tasiyas nadawes gungamag tasiyas.’

DaGuyaws anilivan māwan, o nawotet towen pwamug-o ikamtel tammwayas wasigeis.

19 “Mapuna akaleiwag, awoum youd moumouvit bitasekes vena babaw gimgilis, tasiyas mwana nitouvins inekes Yowbad.

20 “Deisa takaleiwags wasigeis tasiyas vagan bipiyaves kan ningwavis silmanin tobwag yowbad; awoum bisubwans; awoum beikams viniyonan man bo niskwen kayon neimat nanawan, o viniyonan man sona buyavin. Misinak.

21 “Peinan nagwadiven ivnivins Moses nakaleiwag Sadad katanok katanok, vena babaw wasigeis. E, vena babaw sisinagog wasigeis tageiguys ivinis Moses nakaleiwag, igeiguys.”

*Kaleiwag townen ikawes inawes Antiyok*

22 Takaweins livanen Yeisuw, sisiyas tayakelesiys situwawek, sisiyas tayakelesiysa babaw, idokes bikayabes sigamag mwasanin, sisiy Pawl o Banabas bikawes silet binawes Antiyok. E, ikayabes tayakelesiys guyawaw asteiy, teitan Yudas, yagan kwayuwein Basabas, tayuwein yagan Saylas.

23 Let townen nikawes nakalelel mamagina:

“Kalin nuwem budimayas yakamiy, Antiyok gimgilis, o Siliy gimgilis, o Silisiy gimgilis, tobwag ven gimgilis tayakelesiys yakamiy. Yakamey takaweins livanen daGuyaws Yeisuw, simayas tayakelesiys situwawek ven Yelusalem waseg.

24 “O peinan nakaligen simayas mwasanin bo ivages moumouvit wasigeis yakamiy, o ibol ninoumiy yakamiy asilivan waseg. O yakamey nag kakayabes tasiyas, nag; ninousa tasiyas niweis.

25-26 “Mapuna ninom yakamey bo katanok-wan vagan bakakayeb tawaw mwasanin biwekeimiy, sisiyas Banabas son Pawl. O

yakamiy o yakamey, babaw yakids ikalin nuwads tawaw tasiyas Banabas son Pawl, peinan tuta babaw inounas abkanig waseg, daGuyaws Yeisuw Kelis silmanin.

27 “Mapuna nakakayabes Yudas son Saylas, biwekeimiy, mo bidibakeimiy mawana nakalel malet townen waseg.

28-29 “O simey Yowbad Kululuwan kadok kid nag kweitan kaleiwag moumouvit bakasekeimiy; tage kadiloka kupiyaves kalbaleb sinap tasiyas, viniyonan man ningwavis silmanin tobwag yowbad, o buyav, o viniyonan man bo niskwen kayon neimat nanawan, o makava kanavay.

“Magat bukuvnases kaleiwag townen bo bukusesusa bwein, bukutawtowns.

Taneimiyo.”

<sup>30</sup> Bo itanouys, mo inounas, ineis Antiyok. Tayakelesiys babaw ikatuyouns imeis, mo isekes silet townen.

<sup>31</sup> Ivinis let townen, bo imwasaws, peinan bo ikambuvis ninous, bo idumwal.

<sup>32-33</sup> O Yudas son Saylas, peinan palopit tasiyas, asilivan babaw wasigeis mo igeiguys tayakelesiys wasigeis, mapuna itawtowns. Nisesus sisiyas ee... imwemway-nen; mo imulouls wasigeis, itanouys, iyums, inekes tayakelesiys tasiyas kweiboug nikayabes niweis. <sup>34</sup> (-)

<sup>35</sup> Pawl son Banabas sisiy tageiguys mwasanin, nisesus Antiyok, illivans livanen Yeisuw, o Yowbad anilivan bwanabwein ikatimlakays.

*Banabas ilisow Pawl*

<sup>36</sup> Yam mwasanin ikous, Pawl mo idibek Banabas, ilana, “Kum, taneis, takines tayakelesiys vena babaw, kweiboug-o nitaguyes livanen Yeisuw; mo bitakin amawan sikasis.”

<sup>37</sup> Banabas itam, ilana, “Bwein;” ilana, “Adok sod Yon bitanounas.” Yon yagan kwayuwein Mak.

<sup>38</sup> Pawl ipiyev, ilana, “Nag, peinan kweiboug nilisaweid ven Pampiliy waseg, ipiyev dawotet, iyum. Nag kadilok sod bitanoun. Bweina bises.”

<sup>39</sup> Mapuna ikamnims. Banabas son Mak mo ilisawes Pawl, ikuks ineis Saypilos.

<sup>40-41</sup> Tage Pawl idow Saylas; tayakelesiys initougs waseg Yowbad, sivines kid Yowbad bilabes tasiyas asteiy mo inounas, ikanpeles Siliy o Silisiy, vena babaw wasigeis ilabes tayakelesiys, vagan kid bitawtouns.

## 16

### *Timotiy inekes Pawl son Saylas*

<sup>1</sup> E, isaps Dabiy, ikanpeles, mo ineis Lisitil. Ven townen waseg mo ibanesh taw teitan, kweiboug-o niligen livanen Yeisuw. Mtowen yagan Timotiy, inan vinen-Yudiy, isimounid Yeisuw waseg; taman gog guma-Gilis.

<sup>2</sup> Tayakelesiys ven Lisitil waseg o Ikoniya waseg idokes kid Timotiy singay tadidumwal.

<sup>3</sup> Pawl sivinan taw townen sisiy bineis, mapuna ibob momwan, magina Ebelam nakabivatus; peinan gamag babaw ikakins Timotiy taman guma-Gilis; o peinan min-Yudiy babaw nisesus ven townen, o Pawl nag ivag sivinan tasiyas

bivtokes livan, mapuna mtowen Timotiy ibob momwan.

<sup>4</sup> Igawa ikaninapels ven katanok katanok wasigeis, mo ikatpeles sikaleiwag isekes, kweiboug nikalawages Yelusalem waseg. Tasiyas takaweins livanen Yeisuw, o tayakelesiys situwaweiks, isekes sikaleiwag, ilansa, “Kadiloka kuvnases.”

<sup>5</sup> Mapuna tayakelesiys iyamweis sisimounid; o yam katanok katanok ikatimweisis, mo ibabaws.

<sup>6</sup> Ikanpeles ven avakaein Piligiy, ikous mo ikanpeles ven avakaein Galetiy. Yowbad Kululuwan mo isilbwades, awoum bisekes asilivan min-Esiy wasigeis.

<sup>7</sup> Wankuyeim mo ineis Misiy, sivines kid bineis Bitiniy; iyokonsa, nag; peinan nag beitam Kululuwan Yeisuw.

<sup>8</sup> Misiy ikanpeles ikous, mo iwloubus ineis Tilowas.

<sup>9</sup> O boug waseg, Pawl matan isisawl mav, magina ikamikon, ikintuwen ikin wayol ikin gum-Masidoniya itamanaw iton palatan, ilana, “Kudopel kum wamaven Masidoniya, kulabem yakamey.”

<sup>10</sup> Pawl ikikin ikous; bo ikatimamal, sivinan kid bidopel bein Masidoniya; kadok kid Yowbad nidawem bakan bakasekes tasiyas livanen Yeisuw. Ninom katanok-wan.

### *Lidiy iyakelesiy*

<sup>11</sup> Kakilev Tilowas, kadumwala kan Samotiles kamasis; neiyam nen kakuk ee... kalug Niyapolis.

12 Niyapolis waseg kabus kan Pilipay, ven townen wunovek wawnuwan Masedoniy; mina-Lom babaw o mina-Lom sitakanaviy babaw nis-esus ven townen waseg. Yam mwasanin kasesuna ven townen.

13 Sādad waseg kadoki gamag mwasanin ininitougs o ititapwālouls Yowbad waseg wadadan lay kweitan; mapuna kasap adunan ked kan lay townen, kawekes vinay mwasanin, kakaypul simayas; kallivan.

14 Guyouvin nātan yagan Lidiy, vinen-Tayatil, taymayisein kweim bwabwel, tuta babaw niti-tapwāloul Yowbad waseg; e, manāwen mo iligen amalivan. Peinan Yowbad bo ikatiboug nuwan vāgan biligen kid Pawl anilivan.

15 Peinan iligen livānen Yeisuw, mo nakabaptāyses Lidiy sen angamag. Ikous, Lidiy mo idibakem ilana, “Magat bukudokeig nasimounid yey daGuyaws waseg, kadiloka kumeis wāgunbunatum, agubwabwal yakamiy.” Ivvalut ee... mo kātām.

### *Imapumas wādeil ven Pilipay waseg*

16 Yatam yam nakan tapwāloul silmānin, kani-noun ee... mo ilivatūm nukubukwab nātan, kululuwan waseg ikatigigik aveiyag igaw bikamat, o nawotet maysan singay avakaein ikawes taliven.

17 Vin nāwen ikabkunim yakamey simey Pawl, iwkuwak, ilana, “Yowbad Tatawtoun nagamag tasiyas; tasiyas ikatimlakeids ked townen waseg Yowbad bo bikatinabweids.”

18 Nawkuwak anilivan māwana yam babaw. Mapuna igeg nanon Pawl, itouvin, idibek yeiluw

towen, ilana, “Akalawageim wayagan Yeisuw Kellis, kulisow manawen vin, kunoun.” Mitiyamun towen yeiluw mo inoun.

<sup>19</sup> Vin manawen taliven ikakins bo iyakous wawun simoney, igeg ninous, iyousis Pawl son Saylas, ibiteilis tasiyas ineis wawtakon ven vagan kid biyateles wamtes tasiyas takaliwageins ven.

<sup>20-21</sup> E, itokes, inawes takalleiwags wasigeis; ilansa, “Min-Yudiy tasiyas kalbaleb sinap ivages wadawanuys, peinan sivines kid bisekemas sinap kweitan, o asisinap towen bwaboum wasigeis yakamey mina-Lom.”

<sup>22</sup> Gamag babaw mo ilabes, sivines kid biyagages Pawl son Saylas. Takaleiwags mo ilansa, “Kunisis asikweim, mo kuweiy amweilok waseg.”

<sup>23</sup> Iwaways avakaein wawous; ikous, mo ikalabus, idibakes takaymatein deil ilansa, “Kukwaymates tasiyas beibwein. Awoum bisaps bineis watoulan.”

<sup>24</sup> Townen iligen, isenas wadeil bunatum tawtoun waseg, ilokes kikeis amweilok akiy wanuwein; ta-mawan biyaganis kikeis.

<sup>25</sup> Watapwan boug Pawl son Saylas ikululs wamatan Yowbad, initougs waseg, ikannuwels asiwous. Tasiwuns deil mwasanin ikatilutegs.

<sup>26</sup> Mo ivag nik avakaein, kakolan bunatum dakul igogewns-wan; koukweda babaw ikaliyowes, o sen o amweilok niyousis tasiwuns deil nimes o kikeis bo ipalpaieiks o itigtgut ikous.

<sup>27</sup> Takaymatein deil mo ilaktukit, ikin koukweda babaw bo ikaliyowes, idok kid bo isawls tasiwuns deil babaw; igeg nanon, ikow napulut



tanmunum vāgan kid bibes nipowun tatonen, beimat.

<sup>28</sup> Pawl ikin, aygan avakaein ivag, ilana, “Awoum kuygageim toneim yak. Yakamey-yaya, amababaw-wan.”

<sup>29</sup> Takaymatein deil idow teitan bimey lamp; mo ikow, isawl, isiw wanuwan deil, itatat won, ikulul wantes Pawl son Saylas.

<sup>30</sup> Wankuyeim mo itokes ineis wamnat, ilana, “Adok guntuwāvek yakamiy, kadiloka kudibakeigs aveiyag bavag silmanin kid Yowbad bikatinabweig.”

<sup>31</sup> Ilansa, “Kadiloka kusimounid daGuyaws Yeisuw waseg, mo bikatinabweimiy simwey amg-wamag.”

<sup>32</sup> Mo idibakes tasiyas livānen Guyaw Kelis, siney gamaga babaw nisesus wanbunatum.

<sup>33</sup> Mitiyamun townen boug waseg, tanuwagan deil ikow yevagam, buyavis wawous itawis. Ikous, mo ibaptāyses sen nagamag.

<sup>34</sup> Ibaptāyses ikous, mo isiws wanbunatum, kaeis isekes, ikams, peinan imwasaws avakaein sineya-wan angamag; livānen Yowbad niliganes.

Ikous, mo iyums ineis wādeil.

<sup>35</sup> Iyam nen gaboug takaliwageins ven mo ikayabes sipilismans ineis wādeil, ilansa, “Kulavewas tasiyas asteiy, bineis.”

<sup>36</sup> Tanuwagan deil ikow asilivan townen, isek Pawl, ilana, “Takalawageins ven bo ikayabeimiy bukounas. Bweina beitout ninoumiy, kuneis.”

<sup>37</sup> Pawl idibakes, ilana, “O yakamey mina-Lom yakamey; bo iwemas wantes gamag babaw nov, o nag iyatelemas vāgan bikakins amasinap

aveiyag kalbaleb. Makaw isenamas wadeil; nagein gog bikakiws asimwasin, bikawumemas mo bikayabemas. Kapiyev. Bakasesuna. Kadiloka tasiyas bimeis bitokemas bakan wannat, mo bikayabemas.”

<sup>38</sup> Tasiyas pilismans mo inekes takaliwageins ven; asilivan ikatpeles isekes. Kweiboug nag bikakins Pawl o Saylas mina-Lom tasiyas; e, tut townen mo ikakins, asimwasin seikwan.

<sup>39</sup> Aspwayat inekes Pawl son Saylas, asilivan siwayoub, mo itokes ineis wannat, ikayabes bineis kid kweitan ven.

<sup>40</sup> Ilisawes deil mo inekes Lidiy, inekes tayakelesiys, iguyes, mo itanouys, inounas, ineis.

## 17

### *Moumouvit ilivatus ven Tesalonik waseg*

<sup>1</sup> Inounas mo isaps Ampipol; ilisawes Ampipol mo ineis Apolony; ilisawes Apolony mo ineis Tesalonik. Min-Yudiy sibuntuman tapwāloul yagan sinagog nises Tesalonik.

<sup>2-3</sup> Māwan ansinap vena babaw waseg, Pawl mo isiw wanuwan sinagog ikatimplakes silawun Bukitab. Kweitoun Sādad waseg ikatiboug nuwes min-Yudiy tasiyas. Isekens ninous māwan; ilana, “Kadiloka gamag biyagages Kelis, bikanig, mo beikit vayuwein. Livānen nises Bukitab waseg, bo māwan. Silawun gunkatimlakay Yeisuw, mtowen moundid Kelis.”

<sup>4</sup> Pawl ivvalut ee... mo isimounids mwasi-nis gamag, mapuna ikatuvases sisiyas Pawl son Saylas; mina-Gilis-vak tavnāseins Yowbad

isimounids singaya babaw, sisiyas guyvinays mwasanin.

<sup>5</sup> Tage min-Yudiy mwasanin bo ikameiliws, ivtokes livan. O mwasanin tasiyas tabgumats bo iliganes asilivan, ikatuyouns gamag babaw, sivines kid bikawpwanaws wasigeis Yeisuw nagamag, ineis Yeson wanbunatum, iwkuwaks; ilansa, “Kadilok tasiyas Pawl son Saylas bimeis wannat.” Peinan min-Yudiy ninous bo biyagages Pawl son Saylas.

<sup>6-7</sup> Iyyokons, bo nag; mapuna itokes Yeson siney Yeisuw nagamag mwasanin, inawes takaliwageins ven wamtes, iwkuwaks, ilansa, “Gamag tasiyas niyagages vena babaw, nagein mo imeis wadavanuys yakids, Yeson anwabwal tasiyas nisesus. Tawaw tasiyas bo ibwabwes Sisal nakaleiwag, peinan ilansa, ‘King kweitan nises, yagan Yeisuw.’ ”

<sup>8-9</sup> Gamag babaw iliganes livan towen, mo igeg ninous, sisiyas takaliwageins ven; mapuna idibakes, ilansa, “Yakamiy simiy Yeson kadiloka kupayins, money mwasanin kusekemas, mo kunounas. Igaw kukin bukusesusa bwein, o nag kweitan sinap bukuvages mawana kalbaleb sinap towen, igaw tut wanakoug mo bakayamen mimoney.”

### *Takaweins livanen Yeisuw ineis Beloy*

<sup>10</sup> Yeisuw nagamag ikatimamals, boug waseg ikayabes Pawl son Saylas, bineis Beloy. Isaps Beloy mo ineis wasinagog, isiws wanuwan, livanen Yeisuw mo isekes min-Yudiy tasiyas.

<sup>11</sup> E, tasiyas asisinap bwein, nag maʷan min-Yudiy tasiyas nisesus Tesalonik; bo iseiw nuwes Pawl anilivan towen sivines binganegs-wan; e, yam babaw ivnivins Bukitab vagan bikakins kid livan towen moundid, o nag, yaweid.

<sup>12</sup> Babaw gamag mo isimounids, sisiyas vinaynen Gilis guyvinays, sisiyas tawaw mwasanin.

<sup>13</sup> Wankuyeim min-Yudiy tasiyas nisesus Tesalonik mo iliganes Pawl nises Beloy igeiguy livanen Yowbad; mapuna inounas imeis Beloy, ivtokes livan, vagan beivag aspwayat gamaga babaw, mo bikamliwes towen Pawl.

<sup>14</sup> Mapuna Yeisuw nagamag tayakelesiys ven towen mo ikatimamals ikayabes Pawl biwloubus kid bein wayol. Tage Saylas son Timotiy nisesusa ven towen Beloy.

<sup>15</sup> Gamag mwasanin itokes Pawl, itouws wawag, ikuks, ineis Atens; Pawl mo idibakes tasiyas, ilana, “Kuyums kuneis kukines Saylas son Timotiy nuwanaw bimekeigs,” mo iyums ineis Beloy.

### *Pawl nises ven towen Atens*

<sup>16</sup> Pawl, igawa nises Atens ikaymates Saylas son Timotiy bimeis; bo igeg nanon peinan ikines tasiyas taginvens singay imgamegs. O babaw siyowbad tobwag wasigeis ikululs wamtes.

<sup>17</sup> Mapuna yam babaw Pawl mo isen kweit-an livan, Yowbad livanen, min-Yudiy sisinagog waseg, o tavnaseins Yowbad wasigeis, o gamag mwasanin ilivatus wavtakon ven, igeiguy wasigeis.

18 Tassinaps mwasanin tasiyas Epikul sisiyas tasiyas Sitowik illivans sisiy Pawl. Mwasanin iliganes, ilansa, “Taw towen, makava illivan. Aveiyag illivan?” Mwasanin gog ilansa, “Livānen kweitan ven siyowbad illivan.” peinan Pawl anilivan Yeisuw inakanig silmanin o neikit vayuwein.

19-20 Mapuna itokes Pawl inawes buntuman Konsel waseg, yagan Aliyopag, ilansa, “Tabta bukwatimlakes amsinap towen kweivaw, towen nukulivan wasigeis gamaga babaw; kadok kid youd kweitan towen isowsiw watigem yakamey. Sivinem gog bakakakin silawun sinap towen.”

21 Peinan min-Atens sisiyas asibwabwal tuta babaw sivines bikatilutegs youd kweivaw, o livānen youd kweivaw billivans sisiyas; mapuna tuta babaw inineivs sinap kweivaw.

22-23 Pawl mo itamanaw wakabgeiguy bunatum Aliyopag wanuwan, ilivan. Ilana, “Min-Atens yakamiy, bo akin singay tamgamegs yakamiy. Bo atavin miven akikinena wuliyougwan tapwāloul, bo aban abeilun kweitan. Lelel-nen mamagina, ‘Silmanin yowbad tamtawas.’ Yakamiy nag kuk-wakins Yowbad towen nukukululs wamatan, yey mo bakatimlakeimiy yagan towenan.

24 “Yowbad towen bo ibun youda babaw, o peinan towen tanuwagan libalab, o ven watinow, nag bimasis wabunatum towen tawlules wana-mads; nag.

25 “O nag ivag sivanan aveiyag namads biwtel silmanin towen, peinan bo nisekeids damwamovs o kululuwads, o dawliyougs babaw-wan.

26 “O tabuds anmwānet-wan Adam waseg, bo ibunids, nitamlavags vena babaw gimgilis wadaban pwepway. Bo ikaleiwag idatuts, o dakablivis pwepway ven katanok katanok wasigeis.

27 “O bo ikaleiwag vagan kid bitaneves mtowen Yowbad; igaw takinew mo bitaban, peinan kadilakus nises wasigeis yakids katanok katanok.

28 “Mtowen waseg tamwamovs, taninounas, tasesus. Māwan tawutun wous nilivan wasigeis yakamiy,

‘Peinan yakids Yowbad tibun yakids.’

29 “E, peinan Yowbad tabuds yakids, awoum bitanuways Yowbad kid māwana goul o silib o dakul, o aveiyag gamag teitan binuway mo bibun wanaman, nag.

30-31 “O Yowbad gog inumlev tut kweiboug dadub; tut gog towen ikaleiwag vena babaw gimgilis vagan bikanavin ninous, peinan nikatigik tutan katukin wanakougwaw, yam towen bo bikatukin gamag babaw wasigeis, amtowen bwein, amtowen kalbaleb; e, teitan taw bo itamnow, takaleiwag tatonen. Kakakin anilivan mound, peinan taw towen nikanig, Yowbad ivag mo ikit vayuwein.”

32 Ikatiliganes livānen dakabeikits kanig waseg, mwasanin mo igigs peinan nag isimounids; mwasanin gog ilansa, “Igaw, kweitan tut mo bukuwgavaw amlivan towen vagan bakaligen.”

33-34 Pawl iligen asilivan, mo ilisawes, inoun. Mwasanin gamag bo isimounids anilivan waseg, mo ikatuvases sisiy Pawl, teitan Diyonisiy, mtowen takaleiwag teitan bunatum Aliyopag waseg, natan Damalis, sisiyas mwasinis gamag.

# 18

## *Pawl ven Kolinit waseg*

<sup>1-2</sup> Wankuyeim Pawl mo ilisow Atens in Kolinit; iban gum-Yudiy yagan Akwil, naven Ponit. Kweiboug nises Italiy, o peinan Sisal Kalodiw nakaleiwag vagan min-Yudiy babaw bilisawes naven townen Lom, mapuna ilisow Italiy; e, mwana nimeis Kolinit son nakwav Piliskil.

<sup>3</sup> Townen nawotet, ikow man kulivis mo ibsibas ivag bunatum. O peinan Pawl ikakin sinap townen, mo inekes, sisiy nisesus, iwotets.

<sup>4</sup> Tapwaloul waseg, Sadad katanok katanok illivans siney Min-Yudiy, o mina-Gilis, isimkakin vagan bisimounids waseg Yeisuw.

<sup>5</sup> Wankuyeim Saylas son Timotiy meinoy nimeis MasidoniY isaps Kolinit, igawa Pawl ivvalut wotet townen, ikatimlakes min-Yudiy vagan bikakins beibwein mtowen Yeisuw mound Kelis.

<sup>6</sup> Wankuyeim tasiyas mo ipiyaves Pawl anilivan, itawyages, asilivan kalbaleb waseg; mapuna ikatsap anakweim vagan bikakins bo ipiyaves tasiyas, ilana, “Deis! Peinan kupiyaves livan townen, igaw bukumtamats; takaleiwag yakamiy. Bweina bo batouvin basekes livan townen tobwag ven gimgilis, vagan bo biliganes.”

<sup>7</sup> Ikous, mo ilisawes, isiw wanbunatum tavnasein Yowbad teitan, yagan Titos Yusitos, nabunatum nises sinagog wadadan.

<sup>8</sup> Tanuwagan sinagog, yagan Kilisip, bo iliganes livanen Guyaw Yeisuw, sen angamags babaw; o min-Kolinit babaw bo iliganes, mo ibaptayses.

9-10 Kweitan tut, boug waseg, Pawl immasis, anmikon waseg mo ikin naguyaw Yeisuw, ilana, “Pawl, awoum beivag ampwayat, kusimkakin livaneig waseg; awoum kukwapay, peinan agugwamag namagleis nisesus ven townen. Ta-kweitan gamag beiweim o biyagageim, peinan soum yey tases.”

11 Mapuna Pawl isesuna katanok bweilim ikous, mo tibukon kweinim katanok. Misumkwey townen waseg ikatimlakes ven townen gimgilis vagan kid bikakins livanen Yowbad.

12-13 Mitiyamun townen, min-Akay sigabman avakaen, yagan Galiyon, nises ven townen. Min-Yudiy ninous katanok-wan mo itamanaws iyousis Pawl itokes inawes Galiyon wankabkaleiwag, aban townen wamatan, ilansa, “Taw townen sivinan bibob dakaleiwags, ikatimlakay tobwag tapwaloul vagan bitateiy gamag ninous.”

14-15 Pawl sivinan bisilamaw anilivan, tage Galiyon mo idibakes min-Yudiy tasiyas, ilana, “Min-Yudiy yakamiy, magat townen ansinap kalbaleb, o magat biyageg son, bweina baligen amilivan; o peinan sinap townen yakamiyana amisinap, sinapun imiven, o livanen imiven, kadiloka yakamiyana bukwaleiwags; yey apiyev.”

16 Ilivan mawan, mo ikayabes, ilisawes nakabkaleiwag townen.

17 Gamag babaw mo iyousis tanuwagan sinagog yagan Sositen, iwaways-wan kabkaleiwag townen wamatan; tage Galiyon nag igeg nanon sinap townen waseg.



*Pawl iyum in Antiyok*

<sup>18</sup> Wankuyeim Pawl isesuna ven townen, yam mwasanin. Ikous, mo ilisawes Yeisuw nagamag, itanouys siney Piliskil son Akwil; ikuks, bineis Siliy. Isaps ven Kenikil waseg, Pawl iduy kunun peinan anilivan katout Yowbad waseg.

<sup>19</sup> Ikuks ee... ilugs Epesos, Pawl mo ilisawes tasiyas, isiw wanuwan sinagog mo illivans sisiyas min-Yudiy; vagan bivag ninous bikanavin.

<sup>20-21</sup> Tasiyas mo idibakes Pawl, ilansa, “Kadilok kadiveiyov tut yakoum simey yak tasesus.” Ilana, “Nag; bo banoun. Kukin nanon Yowbad mawan, igaw mo bayum bam.” Mo itouw wawag, ikuks, itanes min-Epesos.

<sup>22</sup> Ilugs Sisaliy, ikatulag in Yelusalem, imulouls siney tasiyas tayakelesiys; mo inoun in Antiyok.

<sup>23</sup> Isesuna yam mwasanin waseg; ikous, mo inoun ilakwanes tayakelesiys ven katanok katanok wasigeis; isilamaw ven katanok katanok wawnuwan ven Galetiy; iyakous, mo ikanapel in ilakwanes ven katanok katanok wawnuwan Piligiy; ilabes tayakelesiys vagan kid bitawtouns.

*Apolos igeigy ven Epesos waseg*

<sup>24</sup> Gum-Yudiy tassinap teitan mo isap Epesos, townen yagan Apolos, naven Aleksanidel, singay ikakin Bukitab, o itawtoun geigy waseg.

<sup>25</sup> Kweiboug mwasanin gamag bo ikatimlakes, mapuna ikakin Yowbad inaked. E, bo isiw nuwan livanen Yeisuw bilivan, anilivan moundiwan. Ikatimlakes gamag mwasanin anilivan townen. E, ikakin sinapun tabaptaysein gamag townen Yon. Tage sinapun Yeisuw nag iyakous.

<sup>26</sup> Anilivan kamnat mo isilamaw sinagog wanuwan. Piliskil son Akwil iliganes, mo idawes im wasibunatum, ikatimlakes Yowbad inaked, mo ikakin bwein.

<sup>27-28</sup> Iyakous nawotet ven townen, mo ivag sivanan kid bein Akay. Yeisuw nagamag ilivans, “Bwein;” mo ilelels let silmanin ven townen tayakelesiys-nen, vagan bivnases mtowen Apolos, anbwabwal tasiyas. Isap wasiven, mo ikatimweis asisinap tayakelesiys tasiyas. Kweiboug-o Yowbad nilabes mo isimounids Yeisuw waseg, misiyamun townen asisinap mo ikatimweis peinan Apolos ilabes; o anilivan itamap wasigeis min-Yudiy asilivan, peinan anilivan tawtoun waseg ikatimlakes silawun Bukitab, vagan bikakins kid moundid Kelis mtowen Yeisuw.

## 19

### *Pawl nawotet ven Epesos waseg*

<sup>1-2</sup> Igaw Apolos nises Kolinit, Pawl ikaninapel ven tasiyas wanawoud. Ikous mo isap Epesos; mo ilivatus Yeisuw nagamag mwasanin; idibakes, ilana, “Nukuliganes livanen Yeisuw, Yowbad Kululuwan Townen Bwanabwein iwekeimiy tan, o nag?” Ikatimapus aygan; ilansa, “Nag. Nag bakaligen livanen Kululuwan Bwanabwein.”

<sup>3</sup> Pawl mo ikatugwan; ilana, “Amawan nukubaptays?” Ilansa, “Nakaligen Yon nageiguy, mo ibaptaysem yakamey.”

<sup>4</sup> Iw to Pawl, ilana, “Yon bo ibaptayseimiy vagan bikanavin ninoumiy, o vagan bukulavewas amisinap kalbaleb, sinap

bwanabwein bukuyousis; o Yon nidibakeimiy ilana, ‘Kadiloka bukusimounids waseg mtowen nibkunig yey.’ Anilivan gog livanen Yeisuw.”

<sup>5</sup> Gamag tasiyas bo iliganes Pawl anilivan, mo ibaptayses Guyaw Yeisuw wayagan.

<sup>6</sup> Pawl isen naman wawous tasiyas, Yowbad Kululuwan mo inekes, ilivans kaeig kweitan kweitan wasigeis, o ipalopisays Yowbad anilivan waseg ilivnakes.

<sup>7</sup> Babiweis tawaw tasiyas adok sinawatan teiy.

<sup>8</sup> Pawl mo isiw wanuwan sinagog, anilivan kamnat waseg igigeiguy kweitoun tibukon; livanen Yowbad nakaleiwag isekes, vagan kid bisimounids waseg.

<sup>9</sup> Wankuyeim mwasanin gamag ipiyaves anilivan, ikapidabs, ivtokes livan Yeisuw inaked, e wantes gamag babaw ivtokays mawan. Mapuna Pawl itokes inagamag ilisawes, isiw wanuwan Tilan nabunatum, sikul buntuman, yam katanok katanok mo ikatimlakes gamag.

<sup>10</sup> Nawotet towen niwtel akweiyuna bweilim waseg, min-Esiy babaw-wan mo iliganes livanen Guyaw Yeisuw, min-Yudiy sisiyas mina-Gilis.

<sup>11</sup> Yowbad nawotet niwtel Pawl naman waseg. Inawotet kweitan-wan, singay tawtoun.

<sup>12</sup> E, gamag ikawes Pawl anakweim o kweim towen itanob magin waseg, isen takatouns wawous, inimul, mo ibweins, o yeiluw ilisawes mwasanin gamag mo ibweins.

<sup>13-14</sup> Min-Yudiy tamgameg mwasanin mo isaps, iyokons kid bikayabes yeiluw, Yeisuw yagan waseg. Tasiyas ininounas vena babaw ikikayabes

yeiluw; maysan wotet towen ikokews. Tawaw teinim teiy, times tanuwagan lun avakaein, Sikev yagan; tasiyas iyokons kid bikayabes yeiluw, Yeisuw yagan waseg; ilansa, “Kadibakeimiy Yeisuw wayagan kunounas; yeg towen Yeisuw, Pawl nikavvatag waseg.”

15 Yeiluw towen ikatimop asilivan, ilana, “Akakin Yeisuw, akakin Pawl, tage yakamiy kalisiy yakamiy?”

16 Takayeiluw towen mo ipel iwawaysa mav tasiyas, itawtoun wasigeis, ikididul wous ibuybuyav-wan; mapuna sona mwadiyes mo isawls ineis wamnat, aspwayat nag bikakit vagan.

17 Min-Epesos babaw iliganes youd towen, mo ivag aspwayat, tasiyas min-Yudiy sisiyas mina-Gilis misikes Epesos. Mapuna mo igoulus mtowen Guyaw Yeisuw.

18 Babaw gamag tasiyas mwana niliganes livanen Yeisuw mo ikamteles asisinap kweiboug dadub waseg.

19 O tamgamegs babaw simeg nileles nein wasibuk, nimeyes sibuk maynsiyas, mo igabus wamtes gamaga babaw. Maysan buk tasiyas ivinis, singay avakaein, sinawanim tawsan kina.

20 Wotet babaw waseg livanen Yeisuw mo itaw-toun, gamaga babaw o sinap babaw wasigeis.

### *Min-Epesos ikawpwanaws*

21 Wotet towen ikous, Kululuwan Teiwen Bwanabwein mo isek nanon Pawl, ilana, “Singay sivinag batavin Masidoniya o Akay, mo ban

Yelusalem. Wankuyeim gog mo banoun ban Lom.”

<sup>22</sup> Mapuna ikayabes natouwat asteiy, ineis Masidoni, yiges Timotiy son Elasi. Townen gog Pawl isesuna Esiy tut kayakus waseg.

<sup>23</sup> Misiyamun townen, gamaga babaw inoyes Yeisuw inaked, mapuna ven townen Epesos gimgilis mo ilivatus moumouvita singay.

<sup>24</sup> E, takatanak teitan yagan Dimitil, mtowen tawtelein didawag silib, ibwabubs sen nagamag; biyakousis, mo bimeis gamaga babaw bigimwals; bikawes binawes vagan simeg bidagis wanuwan didawag townen; imgamegs silmanin siyowbad natan yagan Dayan, vagan kid bilabes. Didawag tasiyas singay kawkwavek mayses.

<sup>25</sup> O gamag babaw inganegs Pawl anilivan, mo ipiyaves meg silmanin nawnen Dayan; mapuna Dimitil idawes nagamag sisiyas takatanaks babaw; ikatuyouns imeis, Dimitil mo iliwon; ilana, “Tawaw, kukwakins dawotets townen waseg kads tabanes vagan bitakams.

<sup>26</sup> “O kukwakins Epesos gimgilis, o gimgilis ven tasiyas Esiy wawnuwan, bo iliganes aygan Pawl, mo ipiyaves adgeileiws tatoneids, peinan Pawl anilivan manwana, ‘Yowbad tasiyas kubunis wanimamiy, yowbad tobwag tasiyas.’

<sup>27</sup> “Adok tut kalbaleb bitalivatus; peinan gamag bipiyaves Dayan navavag tasiyas tabunins; o dayowbads avakaein nawnen bidokes tobwag yowbad, bipiyaves kid nabunatum; mo biyakous yakawanan manawnen Dayan. Bo igak, peinan babaw yakids takululs-wan wamatan Dayan,

min-Esiy yakids, o gimgilis vena babaw wadaban pwepway.”

<sup>28</sup> Iliganes, mo ikavikuns avakaein, iwkuwaks, ilansa, “Min-Epesos yakids dayowbads Dayan, manawen singay natawtoun.”

<sup>29</sup> Wankuyeim gamaga babaw ven townen waseg mo isilamaws wak, makava ikawnaweins, mamagina takabalaweins tasiyas. Wankuyeim babaw gamag mo isawls, iyousis min-Masidoniya tasiyas Gayus son Alistak, mo ibiteilis inawes buntuman kaleiwag waseg. Kweiboug tasiyas sisiy Pawl nimeis waked.

<sup>30</sup> Pawl sivan beisiw bein buntuman kaleiwag wanuwan, tage tayakelesiys bo isilbwades.

<sup>31</sup> Tasiyas guyawun Esiy mwasanin, kweiboug o nisiwayoubs waseg Pawl, tasiyas mo ikayabes sigamag vagan kid bidibakes Pawl, ilansa, “Awoum yakoum bukun buntuman kaleiwag wanuwan; awoum!”

<sup>32</sup> Gamag babaw, asilivan kweitan kweitan iwkuwaks, ta-kal biligen; o babaw gamag nag ikakins aveiyag wawun ikatuyouns nimeis, iwkuwaksa mav.

<sup>33</sup> Min-Yudiy mo idibakes Alekisan, ilansa, “Kulivan vagan babaw gamag bikakins yakamey ta-ivag silawun sinap townen;” gamag babaw mo iyabinis townen Alekisan, in wamtes gamag babaw, itamnow naman vagan bikapays, mo bilivan.

<sup>34</sup> Gamaga babaw ikakins gum-Yudiy townen, mo iwaks, ages ikobobt-wan, akweiy veit waseg iwkuwaks, ilansa, “Min-Epesos yakids daguyaws Dayan, manawen singay natawtoun.”

35 Tanuwagan ven isap, mo ikatitun sikawnawein, ilana, “Min-Epesos yakamiy, vena babaw gimgilis ikakinsa davanuys bulagan peinan yakids tamtakavateins nabunatum dayowbads avakaein Dayan, sona nadakul nises, kweiboug-o meinoy neim libalab nikalivatow neim watinow.

36 “Peinan youd tasiyas moundid, nag kadilok teitan gamag bisen kweitan livan, nag. E, kadilokena kukwapays kusesus, peinan nag aveiyag bivag, nag. Awoum kuwkuwaks, o kwawnaweinsa mav, awoum.

37 “Gamag tasiyas nukumeyes nag ineis iveinaws Dayan wanbunatum; nag ivtokes livan dayowbads manawen, nag.

38 “Magat Dimitil sivanan biyatel teitan gamag, o magat takatanaks yakamiy simiy Dimitil sivanamiy bukuyateles teitan gamag, yatal nises, o gabman nisesus; kadiloka bukuyateles simiy, gabman mo bikaleiwags.

39 “Kukin bikabwag sikaleiwag tasiyas gabmans, igaw tutan gamag babaw bikatuyouns bimeis, mo babawa gamag bikaleiwags sinap towen silmanin.

40 “Nag ivag silawun sinap towen nagein kwawnaweinsa mav. Magat daguyaws avakaein biligen, mo bikatiganeids, nag kweitan livan nises waseg yakids vagan bitakatimapus anilivan; moumouvit mo bitalivatus. Kadiloka kunounas kuneis wamibunatum tatineimiy.” Iliganes, mo inounas, ineis wasibunatum. <sup>41</sup> (-)

## 20

### *Pawl in Masidoniꝯ mo inoun in Gilis*

<sup>1</sup> Bo iyakousis asisinap to nikawnaweins mav; nag ivag kweitan kawna<sup>u</sup>wein, nag ivag kweitan tamwageg, nag. Bo ikous. Pawl mo idawes ven towen tayakelesiys-nen, iguyes tasiyas, imulouls siney, mo inoun in Masidoniꝯ.

<sup>2</sup> Itavin ven tasiyas Masidoniꝯ wawnuwan; anilivan babaw igeiguy wasigeis, mo inoun in Gilis.

<sup>3-4</sup> Isesuna ee... kweitoun tibukon, min-Yudiy mo asisinap ikatilawos sivines kid beiweiys Pawl. Misiyamun towen Pawl nanon ivag bo beikuk bein Siliy; mo iligen livanen asisinap kalbaleb, mapuna ikanavin nanon, mo inounas waked, ikanapels Masidoniꝯ, siney gum-Beloy teitan, Pilos natun yagan Sopetal, sisiy min-Tesalonik asteiy, Alisitak son Sikanid; sisiyas gum-Dabiy yagan Gayus son Timotiy, sisiyas min-Esiy tasiyas Tikikos son Tilopim.

<sup>5</sup> Tasiyas imgwayemas, mo ikaymatemas ven Tilowas waseg.

<sup>6</sup> Ikous sagal to nag bitakams bled son yist, mo katouw ven Pilipay waseg, kakuk ee... yam kweinim ikous mo kalug Tilowas, mo kanekes tasiyas; kases simayas katanok wik.

### *Pawl itanouy min-Tilowas wasigeis*

<sup>7</sup> Wik kweitan nakabsilamaw, Sabat waseg, kakatuyoun nakam, vagan bakakiv bled bakakam, mawan Yeisuw nakaleiwag. Pawl mo iguyes tasiyas; o peinan bo binoun nubweig, singay iveiyov anilivan wasigeis tasiyas.



<sup>8</sup> Mabunatum wanakaew, o imalamp babaw wabunatum townen.

<sup>9</sup> Watapwan boug, Pawl igawa illivan; tawlat teitan yagan Yutikos isin wasintaboul, matan inanup; o Pawl igawa illivan, taw townen imasis kangagay, mo ikalouw bunatum kastounun waseg, in watinow. Gamag ineis watinow, ikines imasis, inupes bo imat.

<sup>10</sup> Pawl ibus, ibasin kitatun, mo iwliboub wawon taw townen, ilivan, idibakes gamag, ilana, “Awoum bigeg ninoumiy; mwamovan nises.”

<sup>11-12</sup> Pawl imwen in wanakaew, sinsiney mo ikivis bled ikams, illivans ee... walalayis mo inoun in. Gwad townen itokes inawes wanbunatum, imwasaws seikwan, peinan sona mwamovan.

### *Ikuks ineis Milit*

<sup>13</sup> Yakamey nakan nakatouw wawag, nakakuk silmanin Asos vagan bakakayamat Pawl ven townen waseg; townen gog sivanan kid beinoy waked, o nidibakem mawan.

<sup>14</sup> E, imekem Asos waseg, simey townen nakakuk nakan Mitilin.

<sup>15</sup> Neiyam nen mo kakuk kan Kiyos walasin; neiyam nen mo kasap Samos; neiyam nen mo kalug Milit.

<sup>16</sup> Nakakalipouy Epesos peinan nanon Pawl bo mawan; nag ivag sivanan yam babaw bis-esuna Esiy, ikatimamal nuwanaw kid bisap Yelusalem, silmanin Kaltuwon anayam mo bilouvat Yelusalem waseg.

### *Pawl iguyes tayakelesiys situwawekeks Epesos*

17 Ven Milit waseg Pawl idawes min-Epesos tayakelesiys situwaweiks bimeis.

18 Isaps mo idibakes mamagina, “Kukwakinsa agusinap tuta babaw nases wasigeis yakamiy. Wanmugwana asap Esiy waseg nukukineigs ee... bweilima babaw agusinap bo mawan-wan.

19 “Nawwotet daGuyaws nawotet, ta-akaypom sinap; tut babaw nanoug igeg, navvalam-wan, o min-Yudiy tut babaw biyagageigs kid, abag nivages singaya igeg.

20 “Nag akayus agulivan wasigeis yakamiy, nag. Ivag sivinag balabeimiy; babaw bo asekeimiy, bo akatimlakeimiy buntuman tapwaloul waseg o wamibunatum-vak tatineimiy.

21 “O min-Yudiy bo adibakeimiy, o mina-Gilis bo adibakeimiy, alana, ‘Kadiloka bikanavin ninoumiy, bukunekes Yowbad, o bukusimounids daGuyaws Yeisuw waseg.’

22-23 “Tut gog townen Yowbad Kululuwan bo isimkineig ban kid Yelusalem. Nag akakin aveiyag balouvat ven townen waseg; deisa vena babaw wasigeis Kululuwan Townen Bwanabwein ikatimlakeig abag bo bigeg, o bisenags wadeil ven to Yelusalem waseg.’

24 “O peinan daGuyaws Yeisuw nawotet bo isekeig gunawotet townen, akokew kid livanen nasiwayoub Yowbad, bassekes kid gamag babaw wasigeis; o nag akayus mwamovag tatoneig; deisa bayakous Yeisuw nawotet townen.

25 “Kweiboug-o nageiguy aguyeimiy livanen Yowbad nakaleiwag; o nagein gog kamnat

akakin-wan nag vayuwein bayum bam bukukines magig, nag.

26-27 “Nagein adibakeimiy moundid bo asekeimiy Yowbad anilivan vagan biymoveimiy; nag kweitan akayus, nag akawum, nag. Kukin kavel yak bukupiyev, mo bukukwanig; takaleiwag yakoum.

28 “Kuvnaseimiy yakamiy, o kuvnases Yowbad nagamags, Kululuwan Town Bwanabwein nisekeimiy miwotet vagan kid bukumtakavates tasiyas; kadiloka kumtakavates Yowbad alen mamagina tayakelesiys tasiyas, peinan bo iyamayises tasiyas buyavin tonen waseg.

29 “Yey bo banoun; akakin-wan takalbalebs mwasanin igaw mo biweis wasigeis yakamiy; biyagages tayakelesiys; o tasiyas magina awuk bulawud, bikapasal nuwes bikananeis; o tayakelesiys magina sip, mamagina awuk bulawud bigades, bikatimates.

30 “Akakin mwasanin gamag yakamiy igaw bukutamanaws, bukwatidavis tayakelesiys mwasanin, vagan kid bikabkunimiy yakamiy.

31 “Kadiloka kuvnaseimiy. Kununuways-wan kweitoun bweilim nases wasigeis yakamiy, adibakeimiy, aguyeimiy katanok katanok yakamiy; iwtawout mitinagig, yam katanok katanok waseg, o boug katanok katanok waseg.

32 “Tut townen nagein kadilok Yowbad bimtakavateimiy, kadiloka kuliganes livanen nasiwayoub wasigeis yakamiy, mo bikatimweis kululuwamiy, bikayuseimiy simiyas yakamey, angamag tonen babaw yakids.

<sup>33</sup> “Kweiboug simiy yey nitasesus, nag apwakit soug namoney o anakweim o nawliyoug; nag.

<sup>34</sup> “Kukwakinsa wanamag tatoneig nawtel silmanin kag o gunavavag, o bo awotet vagan bagimwel sigwey sivavag o kaeis tatineis.

<sup>35</sup> “Agusinap townen waseg, bo akatimlakeimiy vagan kid bukukwakins bweina bitawotets mawan, vagan bitalabes sidayas tasiyas tougweys. Kadiloka kid taninuways daGuyaws Yeisuw anilivan mamagina, ‘Soum bisiwyoubum mo bukumwasaw; tage bukusiwyoub soum bukumwasaw singay avakaein.’ ”

<sup>36</sup> Illivan ikous, mo ikululs siney tasiyas, initoug Yowbad waseg.

<sup>37-38</sup> Ikous, mo ivalamas asibabaw-wan, iwli-boubs Pawl wawon, imulouls sisiy. Ivalams avakaein peinan anilivan Pawl mamagina, “Nag yamtan yam bukukines magig, nag.”

Igawa ivalamas mo sisiy Pawl ineis wawag.

## 21

### *Pawl ikuk silmanin Yelusalem*

<sup>1</sup> Pawl itouw wawag, mo itanouy sineyas wasigeis. Yakamey katanouy, ikous, kakuk, kad-umwala Kos. Neiyam nen, mo kan Lods; kakilev Lods mo kan Patal.

<sup>2</sup> Ven Patal waseg mo kaban wag akitan, kakita bikilev silmanin Pisisiy, mapuna katouw mo kakuk.

<sup>3</sup> Kakuk kasisawl ee... mo kaban ven Saypilos, inoy wamakimaw, kasawl mo kan Siliy, kalug ven yagan Tayil vagan wuliyoug babaw wawag beibus bein wanakaew.

<sup>4</sup> Kanineiv tayakelesiys, kaban mwasanin, mo kasesuna simayas tasiyas katanok wik; o peinan Yowbad Kululuwan ikatimlakes, ikakins-wan igaw min-Yelusalem biyagages kid Pawl, mapuna illivans, “Awoum kun Yelusalem.”

<sup>5-6</sup> Bo ikous matut simayas tasiyas mo katanaw kanoun. O simayas tasiyas, sisiyas sik-wawas o nitsiyas, nakan watoulan ven, kabasin kititum wakawalaw kanitoug Yowbad waseg, mo kamuloul simsimeyas tasiyas, katouw wawag, mo katanouy; tasiyas mo iyums ineis wasiven.

<sup>7</sup> Kakilev Tayil kasisawl ee... mo kalug Pitolimey, kanekes tayakelesiys, kamuloul simayas tasiyas, kases-vak wasibunatum katanok yam.

<sup>8</sup> Neiyam nen nakatanouy nakaw Sisaliy, mo kasiw Pilip wanbunatum, anbwabwal yakamey. Mtowen Pilip nawotet igeiguy-wan livan bwan-abwein, livanen Yeisuw. Kweiboug-o takaweins livanen Yeisuw nisekes siwotet towen siney tawaw teinim tatanok, ven Yelusalem waseg.

<sup>9</sup> Nitun nakubukwabs nanim nay; Yowbad nisekes asisinap, mo ilivnakes Yowbad anilivan.

<sup>10-11</sup> Kasesun ee... bo imwemway-nen, teitan palopit meinoy neim Yudiy; mtowen yagan Agabous, imekem mo ikow Pawl anpalit iyawen naman o kaken tatonen; ilana, “Yowbad Kululuwan ilivan mawana: Ven Yelusalem waseg min-Yudiy biyawanis naman o kaken tanuwagan palit towen, bisilkodes vagan kid tobwag ven gimgilis mo biyagages.”

<sup>12</sup> Kaligen anilivan mawan; simayas tasiyas misikena gimgilis ven towen; yakamey mo

kadibek Pawl; kalana, “Awoum kun Yelusalem; bweina kuses.”

<sup>13</sup> Pawl mo ikatimop agem, ilana, “Awoum kuvalams; ma<sub>w</sub>an bo bigeg nanoug. Nanoug bo atam vagan kid tasiyas biyagageigs, daGuyaws Yeisuw peinan. Bweina biyousigs; bweina bikatimateigs; bwein-wan.”

<sup>14</sup> Tage Pawl nag biligen amalivan, mapuna kasesun-wan, kalana, “Magat Yowbad nanon ma<sub>w</sub>an, bweina bivag.”

<sup>15-16</sup> Ikous, mo kakatunag bakan Yelusalem, simayas tasiyas min-Sisaliy tayakelesiys mwasi-nis. Tasiyas imgwayemas nakan Mineson wan-bunatum, kamasis. Mtowen gum-Saypilos, wan-mugwana niligen livanen Yeisuw.

### *Pawl ilakwen Yemes*

<sup>17</sup> Nakasap Yelusalem, tayakelesiys mo ikine-mas, singaya imwasaws pinem.

<sup>18</sup> Neiyam nen simey Pawl mo kanekes Yemes siney tayakelesiys situw<sub>w</sub>veksa babaw.

<sup>19</sup> Pawl imulouls siney tasiyas ikous, mo ikam-tel youd katanok katanok Yowbad niwtel tobwag ven gimgilis wasigeis, peinan Yowbad son Pawl niwteles wotet towen.

<sup>20</sup> Iliganes, iyakawns Yowbad waseg, mo idibakes Pawl; ilansa, “Gwade, adok kukwakin min-Yudiy singay babaw tawsans bo niliganes livanen Yeisuw; tasiyas babaw-wan ivn<sub>w</sub>ases bwein Moses nakaleiwag waseg.

<sup>21</sup> “Bo niliganes livaneim mamagina, “Towen Pawl ipiyev Moses nakaleiwag, o ikatimlakes min-Yudiy vena babaw wadaban pwepway, vagan nag bibwabwes momwes nitsiyas,

o bipiyaves kid adsinaps kweiboug Moses nisekeids.’

<sup>22</sup> “Amawan bitavkek? Peinan bo biliganes livaneim yak, mwana nukum Yelusalem waseg.

<sup>23-24</sup> “Adok kuvag mawan. Tawaw tayakelesiys simayas teivas nisesus; peinan asilivan waseg Yowbad, kakita bo biduyes kunus mo bisiwayoubs Yowbad waseg, mawan Moses nakaleiwag. Kadiloka kunekes simwey tasiyas, kuwidis woumiy, money kusekes vagan beiluns beibwein Yowbad waseg, mo biduyes kunus tasiyas. Gamag babaw bikineimiy simwey tasiyas, mo bikakins livaneim to niliganes kweiboug iyyaweids-wan, peinan nukutam Moses nakaleiwag waseg, o kuvnas nakaleiwag towen.

<sup>25</sup> “Makaleiwag wasigeis tobwag ven gimgilis, kalisiy isimounids waseg Yeisuw, nakalel silet nein wasigeis tasiyas, nakakaleiwag vagan kid bipiyaves kan ningwavis silmanin tobwag yowbad, o buyav, o viniyonan man bo niskwen kayon neimat nanawan; o nag bikanavays mav.”

<sup>26</sup> Pawl iligen, itam. Neiyam nen itokes gamag tasiyas, iwidis wous, mo isiw Yowbad wanbunatum, Pawl mo idibek tanuwagan lun; ilana, “Yakamey amalivan Yowbad waseg; yam tasiyas beikous bakaduy kunum, bo bakalun Yowbad waseg, mawan Moses nakaleiwag.”

### *Iyousis Pawl Yowbad wanbunatum*

<sup>27-28</sup> Asiwik kakita beikous, Pawl sen tawaw tasiyas nisesus Yowbad wanbunatum; min-Yudiy siven Esiy waseg mo ikines, ikabuts gamaga babaw, iyousis Pawl; iwkuwaks; ilansa, “Tawaw,

min-Yisleil yakamiy kulabemas. Taw townen tuta babaw ikatimlakes vena babaw gimgilis vagan kid bikasigumids yakids, o bikasigumis adsinaps, o Yowbad nabunatum townen. Tut gog townen bo imeyes mina-Gilis, isiws wanuwan Yowbad nabunatum bunawen nikayus silmanin min-Yudiy yakids. Bo igak!”

<sup>29</sup> Ilivans mawan peinan kweiboug nikines gum-Epesos townen Tilopim son Pawl nisesus waven; idokes kid Pawl itok taw townen ineis Yowbad wanbunatum.

<sup>30</sup> Ven townen gimgilis asibabaw-wan mo isaps, isisawls, ikatuyouns imimeis, iyousis Pawl, ibiteilis Pawl, in watoulan Yowbad nabunatum, awkwedan mo ikatibagus.

<sup>31</sup> Tasiyas iwaweiys Pawl, sivines kid bikati-mates. Mina-Lom sitakanaviy babaw nisesus Yelusalem. Teitan gamag mo inek takanaviys sitovek, ikow livanen asisinap tasiyas min-Yelusalem, peinan ikawnaweinsa mav.

<sup>32</sup> Takanaviys sitovek mo idawes takanaviys sisiyas sitakalikays, nuwanaw isawls vagan binekes gamag tasiyasa babaw. Tasiyas ikines takanaviys sisiy sitovek bo nimeis, mo ipiyaves anaway Pawl.

<sup>33</sup> Takanaviy sitovek mo iyous Pawl, idibakes natakanaviys biyawanis kid Pawl naman palayun-wan sen waseg, mo ilana, “Kal mtowen? Aveiyag inuwek?”

<sup>34</sup> Gamag babaw mo iwkuwaks, livan kweitan kweitan illivans. Ta-mawan biligintun livanen



taw townen; idibakes natakanaviys; ilana, “Kutokes taw townen, kumeyes; taneis wadabunatum.”

<sup>35-36</sup> Mo itokes Pawl, inawes wasibunatum. Ika-pasal nuwes gamaga babaw ikabwakunsa wat-iblous, silmanin beiweiys kid, iwkuwaks ilansa, “Kuweiys! Kuweiys!” Ilivatus watet, takanaviys tasiyas mo inupes Pawl, inounas, peinan gamaga babaw sivinesa biyousis.

### *Pawl iyatal*

<sup>37-38</sup> Kakita beisiws wanuwan takanaviy sibunatum, Pawl mo idibek sitovek; aga-Gilis waseg ilivan; ilana, “Tab kadilok balivan waseg yak?” Sitovek ilana, “Kukwakin aga-Gilis, ne? Adok yakoum gum-Yidipt townen mwana nukumgwayes kweivas tawsan tawaw, tasiyas tawayins gamag, nukuneis wanawoud sivinamiy kid bukwanaviys wasigeis Gabman Lom takanaviy yakamey.”

<sup>39</sup> Pawl ilana, “Nag, yey gum-Yudiy, gunaven avakaein yagan Talisus wawnuwan ven avakaein Silisiy. Tab kadilok balivan gamaga babaw wasigeis?”

<sup>40</sup> Takanaviy sitovek itam. Pawl iton tet townen wakunuwatan, itamnow naman, mo ikapays tababaws-wan; wankuyeim Pawl mo ilivan agabliw waseg, ilana:

## 22

<sup>1</sup> “Sigwey, timog budag yakamiy, kuliganes agulivan, mamagina akayan wasigeis yakamiy.”

<sup>2</sup> Tasiyas iliganes aga-Ibliw waseg illivan, mo ikikapays vāgan kid binganegs bwein. Mo ilivan.

<sup>3</sup> Ilana, “Yey gum-Yudiy yey. Inag nikopweig ven Talisus waseg, wawnuwan ven avakaein Silisiy; tage bo askul ven towen Yelusalem waseg. Tamwey towen yagan Gamaliyel ikatimlakeig, mo akakin dakaleiwags yākids, akakinbunik, iseiw nuwag Yowbad nawotet, māwana babaw yakamiy tut towen.

<sup>4</sup> “O gamag tasiyas inoyes kadetan ked, bo amop asisinap; mwasinis akatimates. Vinay o tawaw ayousis asenas wādeil.

<sup>5</sup> “Tanuwgwes lun sitovek avakaein, o tammwayas babaw ikakins agulivan towen mound. Peinan bo isekeigs let silmanin budidayas ven Damasik waseg, anounana wāked silmanin Damasik vāgan bayousis gamag, bameyes Yelusalem, vāgan kid takaleiwags mo bimop asisinap.

*Kweiboug Pawl ikanavin nanon*

*(Wotet 9:1-9; 26:12-18)*

<sup>6</sup> “Yanay waseg anoun kadiyakusa Damasik, mo mititeilin avakaein imekeig, māwana kavikawn meinoy neim walbālab.

<sup>7</sup> “Akalouw wapwepway aligen aygan teitan; ilana, ‘Soul, Soul, aveiyag wawun kuybilebeig yey?’

<sup>8</sup> “Akati mop aygan, alana, ‘O guyaw, kavel yak?’ Ilana, ‘Yey gum-Nasalet Yeisuw, mtowen tut babaw nukuybileb.’

9 “Tasiyas sigwey nakan, bo ikines mititeilin, tage nag biliganes aygan townen, soug yey nakallivan.

10 “Wankuyeim mo alivan; alana, ‘O guyaw, aveiyag bavag?’ Guyaw townen mo idibakeig, ilana, ‘Kutamanaw kun Damasik, igaw teitan gamag mo bikatimlakeim muwotet, aveiyag bakaleiwag vagan bukuwtel.’

11 “Peinan mititeilin ikaligwen matag, tamawan bakin. Misinaka iyousis namag itokeigs, mo kan Damasik.

12 “Ven townen waseg taw yagan Ananiyas; min-Yudiy tasiyas misikes ven townen ikakinsa tadidumwal, peinan tavnasein Moses nakaleiwag townen.

13 “E, mtowen imekeig itamanaw itom mo ilivan; ilana, ‘Bwadag yakoum Soul, townen bukukin.’ Ilivan ikous mo akinbunik, akin taw townen Ananiyas.

14-16 “Mo ilivan, ilana, ‘Tammwayas siYowbad bo ikaliwageim vagan kid bukukwakin nanon, o bukukin tadidumwal townen, o bukuligen aygan tonen; o amsinap townen bisekeim kadiloka bukwatipel kusekes gamag babaw wasigeis. E, tut townen aveiyag kukwayamat? Kutamanaw, kutam mtowen waseg, mo babaptayseim, yagan tonen waseg, bo biwid mukwalbaleb, vagan beikous.’

### *Ikeyeb Soul binekes kid tobwag ven gimgilis*

17-18 “Ikous, nayum nam Yelusalem, akulul, annitoug Yowbad wanbunatum, matag mo isisawla mav, akin Guyaw townen idibakeig; ilana,

‘Nuwanaw kun kulisow Yelusalem, peinan min-Yelusalem bipiyaves amlivan, livaneig yey.’

<sup>19-20</sup> “Yey alivan; alana, ‘O Guyaw, tasiyas ikakins sinagoga babaw wasigeis bo ayablebes taliganeins livaneim yak; mwasinis awaweiys vatul waseg, mwasinis asenas wadeil. Kweiboug neiweiys takanawein aygam mtowen Sitiben, yey bo atam wotet towen waseg, natamanaw akikin, bo amtakavet asikweim tawayins taw towen.’

<sup>21</sup> “Guyaw towen mo idibakeig, ilana, ‘Kunoun, bakayabeim bukun kadiveiyov, silmanin tobwag ven gimgilis.’ ”

### *Pawl ilivans son takanaviys sitovek*

<sup>22</sup> Anilivan babaw iligintunis, tage iliganes livan towen “Tobwag ven gimgilis,” mo iwaks avakaein, ilansa, “Singaya takalbaleb towen; kuweiys taw towen. Na-ikadilok son mwamovan bises.”

<sup>23</sup> Iwkuwaksa, ilivelovs asikweim, musamusan pwepway ilivelovs ininein wanakaew, singay ikapasal nuwes.

<sup>24</sup> Takanaviy sitovek mo ilivan; ilana, “Kutokes taw towen kunawes wanuwan bunatum, kuweiys vatul waseg vagan bikamtel aveiyag anilivan waseg ikawkunes.”

<sup>25</sup> Iyawanis won Pawl; ta-mawan bigogewn naman o kaken. Takalikay teitan itamanaw wadadan. Pawl mo idibek takalikay towen; ilana, “Nag kadilok bukwatimaveigs, guma-Lom yey. Kadiloka kuyateleigs, magat bukubanes agusinap kalbaleb, mo kuweigs.”

<sup>26</sup> Takalikay iligen anilivan towen, inek natovek, idibek, ilana, “Aveiyag bukuvag? Taw towen guma-Lom teitan.”

<sup>27</sup> Takanaviy sitovek mo inek Pawl, ikatigan, ilana, “Adok yakoum guma-Lom yakoum, ne?”

Pawl ilana, “Mawan.”

<sup>28</sup> Takanaviys sitovek ilana, “Money avakaein bo asek, mo amlavag guma-Lom.”

Pawl ilana, “Peinan kweiboug-o tamag imlavag guma-Lom, mo inag nikopweig guma-Lom tatonen yey.”

<sup>29</sup> Iliganes tasiyas, ikakiws wous peinan kakita bo beiweiys Pawl; sitovek-vak anpwayat seikwan, peinan guma-Lom towen bo iyawanis naman o kaken.

### *Pawl mo iyatal*

<sup>30</sup> Iyam nen gaboug mo ilikus vatul wawon Pawl, o peinan takanaviys sitovek sivinan bikakin wawun min-Yudiy sikavikun waseg Pawl, mo idibakes bimeis tasiyas tanuwgwes lun situwaweiks sisiyasa takaleiwags babaw; teitan mo itok Pawl, imey, itamanaw wamtes tasiyas.

## 23

<sup>1</sup> Pawl ikinbunikes takaleiwags tasiyas, ilana, “Tuwag yakamiy, yam babaw nases agusinap bwein wamatan Yowbad, nagein gog bo mawan.”

<sup>2</sup> Tanuwgwes lun sitovek avakaein Ananiyas mo idibakes tasiyas nitamanaws wadadan Pawl, ilana, “Kuweiys wadon taw towen, singay kalbaleb anilivan.”

<sup>3</sup> Pawl mo idibek Ananiyas, ilana, “Yowbad bo beiweim yak, magina budakay kalbaleb yakoum,

yālig isin, magin ibwein, tage bo ipwas, bukuy-ateleig Moses nakaleiwag waseg; tage bo kugulek nakaleiwag towen, peinan kudibakes tasiyas kid beiweigs mav.”

<sup>4</sup> Tasiyas itomos wadadan Pawl, ilansa, “Oo ne! Bo kuyeg Yowbad nagamag towen, ne?”

<sup>5</sup> Pawl ilana, “Nag bakakin mtowen tanuwagan lun sitovek avakaein. Akakin Bukitab livānen mamagina, ‘Awoum kuyeg mitovek.’ ”

<sup>6</sup> Pawl mo ikines tasiyas mwasanin Sadusiy, mwasanin Palisiy, aygan avakaein mo idibakes takaleiwags tasiyas, ilana, “Tuwag yakamiy, yey Palisiy yey, tamag gog Palisiy. Bo ayatal peinan bo anamis vāgan bitakits vayuwein kanig waseg.”

<sup>7-8</sup> Ilivan māwan ikous, tasiyas Palisiy bo ikamnimans sisiyas tasiyas Sadusiy; ilivis, ivāges bod akweiy. Peinan tasiyas Sadusiy idokes gamag nag beikits vayuwein; ta-kweitan anelos nises; ta-kweitan kululuwan nises; tasiyas gog Palisiy idokes gamag beikits vayuwein, o anelos nises, o kululuwads nises-vak.

<sup>9</sup> Tasiyas babaw-wan mo ikamnimans avakaein. Igawa ikamnimans takatimlakeins Palisiy sikaleiwag mwasanin mo itamanaws, ages avakaein, ilansa, “Kadok nag kweitan kalbaleb nises taw towen waseg; nag. Adok anelos teitan o kululuwan teitan bo ikatimlek ansinap.”

<sup>10</sup> Tasiyas babaw-wan singay ikavikuns; takanaviy sitovek idok kakita biyousis Pawl bikisālis kid won, mapuna idibakes natakanaviy biyousis Pawl, bikawes, binawes wasibunatum.

<sup>11</sup> Boug towen waseg naGuyaw Yeisuw mo itamanaw wadadan Pawl, ilana, “Awoum beivag

ampwayat. Mawan kweiboug livaneig nukusek ven Yelusalem waseg, igaw ven Lom waseg bo mawan.”

*Min-Yudiy sivines beiweiy Pawl*

<sup>12-13</sup> Iyam nen gaboug, min-Yudiy tabebaws-wan, sinawawas o sinawanim, mo ivtames sisiyas vagan beipos kid mo beiweiy Pawl. Ilansa, “Kalisiy yakamiy bukukwams o bukumoums, Yowbad bo beiweimiy. Igaw bitaweiy Pawl, mo bitakams.”

<sup>14-15</sup> Tasiyas mo inekes tanuwgwes lun situwaweiks sisiy takaliwageins ven, ilansa, “Yakamey amalivan Yowbad waseg, bo bakapos ee... tonena bakaweiy Pawl. O yakamiy kamnat amilivan kusekes takanaviys sitovek, kulivans mamagina, ‘Taw townen Pawl kutok kumey, sivinem bakaytel, kweitan sinap silmanin, vagan bakakinbunik.’ E, kukin takanaviys sitovek beitam, Pawl bimey, yakamey bakakayamat, tutan bo beim, mo bakaweiy.”

<sup>16</sup> Gwad teitan, Pawl kadan, bo iligen asilivan, mo in, isiw takanaviys wasibunatum, livan townen mo ikatipel isek Pawl.

<sup>17</sup> Pawl mo idow takalikay teitan, ilana, “Gwad townen sinap kweitan nisisiy. Kadiloka kutok, kuneis mutovek waseg, igaw kweitan livan mo bisek.”

<sup>18</sup> Itok gwad townen, inekes natovek, ilana, “Tasiwun deil townen Pawl bo idaweig, ilana, ‘Kutok gwad townen kuneikes mutovek waseg, anilivan mo bisek.’ ”

<sup>19</sup> Natovek mo itok gwad townen, asteiyuna ineis palatan, mo ilana, “Aw-youid bukunukweig?”

20-21 Ilana, “Tasiyas min-Yudiy ninous maḡwana, nubweig kid bivatoms waseg yaḡoum vaḡan kid bukuyamanes townen Pawl kusekes takaleiwags tasiyas wasigeis, mamagina biyateles, bikatugwans waseg, vaḡan ansinap bikakins kid. Nag gog, peinan mwasanin ikayamats, sivines kid beiweisy. Awoum kutam. Tawaw tasiyas sinawawas o sinawanim tapsapos sivines beiweisy. Bo itabudabods Yowbad waseg bivages kid maḡwan. Bo ikatunags ikous, ikaymatesa ge amlivan yaḡoum.”

22 Takanaviys sitovek ilana, “Bwein-wan. Kadiloka kunoun. Bo talivan aditeiy bo deis; awoum bukudibakes simwayas; awoum!”

### *Ikayeb Pawl inek gabman avakaein Piliks*

23 Takanaviys sitovek mo idawes takalikays asteiy bimeis, mo idibakes; ilana, “Kukin takanaviys lakatuy bikatunags bineis Sisaliy, sisiyas tasiyas sihos sam sinawanim sinawey, sisiyas takaweins kayal lakatuy. Igaw bidadub, kwayav, mo kuneis.

24 “Kuneves hos vaḡan Pawl beimwen, kuvnases beibwein, kunawes binek guyaw townen Piliks.”

25 Takanaviys sitovek ilel let silmanin Piliks, mamagina:

26-27 “Kalin nuwag guntovek avakaein yaḡoum Piliks. Yey Kalodiw Lisiyas; gunalet beiw. Peinan min-Yudiy niyousis taw townen, kakita beiweisy; akakina guma-Lom townen, mapuna kakatinob sigwey guntakanaviys.



28 “O sivinag bakakin wawun askameiliw waseg taw townen, atok wasigeis tasiyas min-Yudiy takaleiwags vagan kid biyateles.

29 “Tage nag ivag ansinap kalbaleb vagan bikatimates o bises wadeil, nag. Misinaka ilivans, ‘Bo igulek makaleiwag min-Yudiy yakamey.’

30 “Wankuyeim, mo aligen asisinap ikatilawos idokes kid beiweiyis taw townen, mapuna akayeb vagan biwekeim yak; o min-Yudiy tasiyas bo adibakes, ‘Kunekes guyaw avakaein Piliks vagan bukuyateles taw townen Pawl.’ ”

31 Sitovek nakaleiwag bo mawan, takalikay tasiyas mo inawes Pawl, boug waseg, ineis Antipatil, imasis.

32 Iyam nen gaboug, tasiyas wakwakway inounas mo iyums wasiven; tasiyas tatouweins hos igaw binawes Pawl.

33 Inounas ee... Sisaliy, inekes guyaw townen avakaein, mo isekes Pawl son let.

34 Ivin let ikous, mo ikatigan Pawl, ilana, “Munven avakaein amiyagan?”

Ilana, “Silisiy.”

35 Piliks mo ilana, “Ga bimeis tasiyas biyateleims, baligen amilivan, mo bakaleiwag.” Ikous, mo idibakes nagamag, ilana, “Kadilok kumtakavates taw townen wanuwan bunatum bunavakaein, kweiboug Elod nabunatum.”

## 24

*Iyateles Pawl*

<sup>1</sup> Yam kweinim ikous, iwloubus tanuwgwes lun sitovek avakaein Ananiyas son tallivan teitan yagan Telitul sisiyas tamumwey mwasanin. Inekes gabman avakaein, sivines kid biyateles Pawl.

<sup>2-3</sup> Idow Pawl beim; Pawl im; Telitul mo isilamaw anilivan, iyatel Pawl mamagina, “Kalin nuwem maguyaw avakaein yakoum, peinan mukwaleiwag bwein. Nag kweitan kawpwanaw nises wamaven. Bwein-wan nakases. O mukwaleiwaga babaw nilabemas min-Yisleil yakamey. Mapuna tut babaw o vena babaw gimgilis yakamey ikalin nuwem maguyaw yakoum.

<sup>4</sup> “Adok nag biveiyov agulivan, sivinag gog kusiwyoubum bukuligen kid amalivan kakit waseg yakoum.

<sup>5</sup> “Taw townen kakakin singay takakon, ivages min-Yudiy vena babaw wasigeis vagan bikawpwanaws, peinan imgwayes tasiyas min-Nasalet nidokes, mo ivages moumouvit vena babaw wasigeis.

<sup>6</sup> “Taw townen idok biyageg Yowbad nabunatum, tage kasilbwed, nakayous. <sup>7</sup> (-)

<sup>8</sup> “Igaw kukwatigan taw townen, mo bukukinbunik nakalbaleb townen nalivan.”

<sup>9</sup> Igaw Telitul ilivan, min-Yudiy tasiyas itimatams, ilansa, “E, mawan! Mounid.”

### *Pawl ilivan*

<sup>10</sup> Guyaw townen Piliks mo ikin Pawl, itam vinum, mo Pawl ikatimop asilivan, ilana, “Peinan bweilim babaw nukusesun matovek yakoum, bweina basekeim agulivan.

11 “Yam sinawatan akweiy nein wankuyeim mwana asap Yelusalem v<sub>u</sub>gan batapw<sub>u</sub>loul. Igaw kukwatugwans min-Yudiy wasigeis mo bilivans m<sub>u</sub>wan.

12-13 “Nag kal ikineig aliwon Yowbad wanbunatum, nag; nag alivan v<sub>u</sub>gan gamag bikatuyouns biliganes aygag, nag. Nag ikatuyouns wasinagog; nag ikatuyouns waven, nag. Nag kakamniman soug teitan gamag, nag. Nag kadilok teitan bisimounid asilivan tasiyas mwana nilivans, nag.

14 “Misinaka b<sub>u</sub>tam kweitan sinap waseg; makadewen ked atapw<sub>u</sub>loul maYowbad waseg, ked townen idokes ked kalbaleb, kid; isibawemas, mapuna idokem min-Nasalet yakamey. Tage yey asimounid maBukitab sinapun, Moses nakaleiwag babaw, o palopit tasiyas asilivan babawan.

15 “Sigwey min-Yudiy tasiyas kanmis Yowbad bivag, mo bitakits kanig waseg, tadidumwals o takalbalebs, yakidsa babaw.

16 “Mapuna tut babaw sivinag agusinap bwein wamatan Yowbad, o gamaga babaw wamtes.

17 “Bweilim babaw ikous, mwana nam wangunaven, gunmuloul asekes, o basiwayoub kid waseg Yowbad.

18 “Bo awid woug, a<sub>u</sub>siw Yowbad wanbunatum; sigwey nag ivag gamaga babaw, nag ikaw-naweins, nag.

19 “Wankuyeim mo isaps min-Yudiy mwasanin siven Esiy; o tut townen nag bimeis v<sub>u</sub>gan bikamteles aveiyag agusinap kalbaleb.

20 “O min-Yudiy tasiyas-nan nikineigs kweiboug naton takaleiwags wamtes, kadilok bikamteles aveiyag agusinap kalbaleb.

21 “Misinaka agusinap townen, sigwey tasiyas nakatamanaw mo awak, alana, ‘Silawun gunyatal nagein, peinan asimounid bitakits kanig waseg.’”

22 Townen gog Piliks bo ikabunik ked makadewen, Pawl nilivan; mtowen Piliks mo ilana, “Ga-ises, ga-beim takanaviys sitovek townen Lisiyas, mo bakaleiwag.”

23 Mo idibek natakalikay, ilana, “Bweina biyei-was wadeil, mtowen Pawl; o taliven bweina bimeyes kan vagan bikamkwam.”

### *Pawl nises wadeil*

24 Yam mwasanin ikous, mo isaps Piliks son nakwaw Dilusil, manawen vinen-Yudiy; mo idawes Pawl beim vagan bikatilutegs livanen Yeisuw Kelis, livan townen Pawl nisimounid waseg.

25 Pawl mo idibakes livanen sinap didumwal, o livanen kapatul, o livanen Yowbad nakaleiwag igaw mo bikatukin vena babaw wasigeis. Pawl igawa illivan, Piliks gog mo ivag anpwayat, ilana, “Ga-ises. Tut townen kunoun. Igaw kweitan tut bwein waseg, mo badaweim bukuyum bukom, amlivan bukusekeig.”

26 Bo inimis Pawl bisiwayoub waseg; mapuna kutukuta ididow, illivans son; ininamis gog nag, peinan Pawl ta-isek Piliks namoney vagan bilik Pawl, nag.

<sup>27</sup> Akweiy bweilim ikous Piliks atimapun neim, yagan Posiw Pestos. Tage Piliks sivinan bilabes min-Yudiy, mapuna ikaleiwag vagan Pawl bis-esuna wadeil.

## 25

### *Pawl sivinan Sisal bikaleiwag*

<sup>1</sup> Pestos isilamaw nakaleiwag, isesuna ven Sisaliy kweitoun yam, mo in Yelusalem.

<sup>2-3</sup> Tanuwgwes lun situwawek sisiyas min-Yudiy tamumwey mo inekes Pestos, ilansa, “Takalbaleb townen Pawl nises wadeil Sisaliy. Tabta ikadilok bukukwayeb townen beim wamaven Yelusalem vagan gog bakaytel?” Sivines kid bikayamats wadadan ked. Igaw beim Pawl mo beiweisy.

<sup>4-5</sup> Pestos ilana, “Nag. Bweina bises Sisaliy. Igaw kakit mo bayum ban Sisaliy. O sigwey guyawaw mwasanin yakamiy bitaneis Sisaliy, inayatal silmanin; magat nakalbaleb nises, kadiloka guyawaw tasiyas biyateles.”

<sup>6</sup> Ises Yelusalem nag bibabaw yam, adok kwein-in-kweitoun o sinawatan, mo iwloubus in Sisaliy, imasis. Iyam nen gaboug mo isin wakan idibakes nagamag wasigeis vagan kid Pawl bimeyes.

<sup>7</sup> Pawl imeyes, wankuyeim mo isunaps min-Yudiy tasiyas meinoy nimeis Yelusalem, itowas mo iyateles, ikavtagis Pawl ansinap babaw-wan kalbaleb nivvag kid; tage asilivan nag bikamnat, mapuna takaleiwag nag isimounid asilivan waseg.

<sup>8</sup> Pawl ikatimop asilivan, ilana, “Nag agulek min-Yudiy makaleiwag, nag. Nag ayageg Yowbad

nabunatum, nag. Nag agulek Sisal nakaleiwag; nag.”

<sup>9</sup> Togo Pestos sivinan bisiwayoub min-Yudiy wasigeis; mo idibek Pawl, ilana, “Tab kadilok bukun Yelusalem mo bakaleiwag amsinap ven towen waseg?”

<sup>10</sup> Pawl ilana, “Tut towen bo atamanaw Sisal wanakabkaleiwag. Kaleiwag kadilok towen-an waseg. Nag ayablebes min-Yudiy. Kukwakin agulivan towen mound. Na-ikadilok tasiyas bikaleiwags waseg yey.

<sup>11</sup> “Magat agusinap singaya kalbaleb, mawan asilivan tasiyas, mogo bweina bakanig; nag bakakiws; nag. O peinan tasiyas tayateleigs iyyaweids-wan, na-ikadilok bukutameig vagan kid tasiyas bikatimateigs, nag. Kadiloka Sisal tonen bikaleiwag.”

<sup>12</sup> Pestos iligen anilivan towen, mo ineis palatan sen nagamag tassinaps mwasanin, sinsineyas illivans. Ikous, Pestos iyum, im, ilivan; ilana, “Sivnam bukunek Sisal vagan kid bikalawageim; mapuna bo bakayabeim bukunek mtowen Sisal.”

*Agalip son Belinis ikatiliganes anilivan Pawl*

<sup>13</sup> Tut nag biveiyov wankuyeim King towen Agalip son nakwav Belinis mo imeis Sisaliy vagan kid bimulouls sisiy towen Pestos.

<sup>14</sup> Yam babaw nisesus sisiy Pestos anbwabwal tasiyas. Livanen Pawl mo isek King towen, ilana, “Tutan Piliks inoun yey mo asap, teitan taw nises wadeil.

<sup>15</sup> “Wankuyeim an Yelusalem, tanuwgwes lun situwaweiks sisiyas tamumwey, ven towen

Yudiy waseg, mo idibakeigs; ilansa, ‘Taw townen takalbaleb; kadiloka bukumop ansinap kalbaleb.’

16 “Akatimop asilivan, alana, ‘Yakamey mina-Lom, nag ivag amasinap mawan. Kadiloka kuyateles taw townen wamatan, o townen biyamen amilivan; kukin ansinap kalbaleb nises, mo bakamop; kukin gog nag, bo nag.’

17 “Wankuyeim imeis tasiyas, nag akabiyun, nag. Neyam nen mo asin wakabag vagan kid bakaleiwag, adibakes gungamag bimeyes taw townen.

18-19 “Adok ansinap kalbaleb; nag gog, tasiyas itamanaws iyateles, nag ikavtagis ansinap kalbaleb; misinaka livanen sitapwāloul tatineis, o livanen teitan taw yagan Yeisuw nikanig, o Pawl ilivan namwamov igawa nises.

20 “O yey nag bakakin amawan bakaleiwag sinap townen waseg, akatugwan taw townen waseg, alana, ‘Tab kadilok bukun Yelusalem mo bakaleiwag sinap townen waseg?’

21 “Townen gog ilana, ‘Nag. Sivinag datoveks avakaein bikaleiwag.’ Mapuna akaleiwag alana, ‘Ga-bises wadeil mo banineiv amata ked waseg baban, mo bakayeb binek datoveks townen Sisal.’”

22 Agalip mo idibek Pestos, ilana, “Sivinag bali-gan taw townen anilivan.”

Pestos ilana, “Bwein. Nubweig mo bukukin.”

23 Iyam nen gaboug Agalip son Belinis mo ineis wabuntuman liwon, sisiyas takanaviys situwaweiks o guyawuns ven townen, asikweim maynamabwein nisikams, askatubub singaya bwanabwein nivages. Pestos mo idawes

nagamag bimeyes Pawl, mo imeyes, itamanaw wamtes.

<sup>24</sup> Pestos mo ilivan; ilana, “Agalip, making yakoum, o tawaw babaw yakamiy wabunatum towen, kukines gamag towen. Min-Yudiy, Yelusalem waseg o ven towen waseg, intougigs vagan bamop ansinap, niwkuwaks, ilansa, ‘Kuweiy. Nag kadilok son mwamovan bises.’

<sup>25</sup> “Bo akatiligen asilivan, akatugwan waseg, akakin nag ivag ansinap kalbaleb. Na-ikadilok baweiy taw towen. O towen nilivan, ‘Sivinag guntovek avakaein bikaleiwag’; mapun bakayeb binek Sisal.

<sup>26</sup> “Kukin bakayeb, nago akakin ansinap, aveiyag balel walet. Mapuna bo amey taw towen wamitamiy, yakoum making Agalip simwey guyawaw tababaws, vagan kid bukunganegs anilivan; adok bitabanes ansinap kweitan, mo balel walet, vagan Sisal bikaleiwag.

<sup>27</sup> “Adok na-ikadilok makava bakayeb, nag.”

## 26

### *Pawl ilivan wamatan Agalip*

<sup>1</sup> Agalip mo idibek Pawl, ilana, “Kadiloka kuli-van.” Pawl itamnow naman, ilivan mamagina:

<sup>2</sup> Ilana, “Peinan min-Yudiy niyateleigs, ilivans kid agusinap kalbaleb, o tut nagein ikalin nuwag peinan yakoum bo kuligen agulivan, matovek avakaein yakoum.

<sup>3</sup> “Peinan kukwakin amasinap, min-Yudiy yakamey, o kukwakin silawun makamnimana babaw, sivinag kwaptuleim bukuligen agulivan.



4-5 “Min-Yudiy babaw ikakins agusinap. Ikakins igaw-o wagwādig gungamag wasigeis, o ven Yelusalem waseg, gum-Yudiy yey; o tut kadiveiyov ikakins agusinap, Palisiy teitan yey. O yakamey Palisiy singaya kavnas min-Yudiy makaleiwag babaw. Kukin tasiyas sivines, mo beitams waseg agulivan townen; peinan moundid.

6 “Nagein tasiwun deil yey, o tasiyas bo iyateleigs peinan animis Yowbad bivag māwan anilivan wasigeis tamumwey min-Yudiy yakamey.

7 “O yakamey, amakum sinawatan akweiy, meiveka yakamey kasimkakin yam babaw o boug babaw kakanow aygan Yowbad, kadoki bisekem māwan anilivan. O yey anmis sinap townen, igaw kanig waseg bitakits vayuwein, mapun min-Yudiy tasiyas bo iyateleigs.

8 “O guyaw, aveiyag wawun isunasun ni-noumiy livan townen, ‘Takanigs beikits vayuwein.’

9 “O kweiboug ivag sivinag basilbwed nawotet gum-Nasalet mtowen Yeisuw.

10 “Yelusalem waseg navvag māwan. Tanuwgwes lun situwāveks nisekeigs gunakaleiwag vāgan bayousis tayakelesiys basenas kid wādeil; o igawa niyyātals yey bo ātam vāgan bakakatimates.

11 “O sinagog babaw wasigeis bo amop asisina-  
nap tasiyas, adok kid mo bipiyaves siguyaw townen Yeisuw. Singay kapasal nuwag, aneves tayakelesiys vāgan bamop asisina-  
nap kadiveiyov ven wasigeis.

*Pawl ilana, “Bo ikanavin nanoug”*

*(Wotet 9:1-19; 22:6-16)*

<sup>12</sup> “Misumkwey towen tanuwgwes lun situw<sub>u</sub>vek bo itams gunawotet towen waseg, ilansa, ‘Bweina bukun Damasik bukuyousis tayakelesiys tasiyas-one.’

<sup>13</sup> “Igawa w<sub>a</sub>ked, y<sub>a</sub>nay waseg, bo akin kamnat singay avaka<sub>e</sub>in meinoy neim walb<sub>a</sub>lab. K<sub>a</sub>las mititeilin kalamwey-nen, tage towen mititeilin singay avaka<sub>e</sub>in; imteilim yakamey sigwey tasiyas nakaninoun.

<sup>14</sup> “Kakalouw wapwepway, kamasis, mo aligen teitan aga-Ibliw waseg idibakeig; ilana, ‘Soul, Soul, aveiyag wawun kuygageig? Tut babaw kwatipiyow kayal toneima ibasim avaka<sub>e</sub>in.’

<sup>15-16</sup> “Yey alana, ‘O guyaw, kavel yak?’

Ilana, ‘Yey Yeisuw, mtowen tuta babaw nukuyageg. Tut gog towen kutamanaw kutom. Bo amekeim, v<sub>a</sub>gan kid basekeim muwotet. Kadiloka kwanow aygag, kusekes gamaga babaw liv<sub>a</sub>neig yey peinan nukukineig nagein; o igaw tut wanakougwaw sinap mo bakamtel waseg y<sub>a</sub>koum, kadiloka bukusekes-vak liv<sub>a</sub>neig m<sub>a</sub>wan.

<sup>17</sup> “‘Bakayabeim bukun tobwag ven gimgilis wasigeis. Igaw tasiyas beivag sivines biyagageims y<sub>a</sub>koum, sisiyas mugwamag min-Yudiy mwasinis; yey mo bakatinabweim y<sub>a</sub>koum.

<sup>18</sup> “‘O vena babaw gimgilis wasigeis, y<sub>a</sub>koum bukuvag beilal mites, v<sub>a</sub>gan kid bipiyaves sinap dadub, kamnat biyousis; o bipiyaves Seitan nakaleiwag, mo binekes Yowbad, v<sub>a</sub>gan kid biwid asisinap kalbaleb. E, tasiyas dadub mo

binekes tasiyas tasimounids waseg yey, peinan akayuseimiy simiyas tasiyas, asekeimiy amisinap kweivaw, bwanabwein.’

*Pawl nawotet livqnen*

<sup>19</sup> “O King yakoum, peinan Yeisuw meinoy neim walbalab nidibakeig mawan, ta-mawan bapiyev aygan.

<sup>20</sup> “Bo naguyes min-Damasik, wankuyeim min-Yelusalem, o vena babaw wawnuwan Yudiy, mo tobwag ven kadiveiyov wasigeis; adibakes, ‘Kadilok bikanavin ninoumiy, vagan kid bukunekes Yowbad. Awoum ninoumiy bikanavin makaw; kadilok sinap bwein kuwteles.’

<sup>21</sup> “Peinan gunawotet townen nawtel, min-Yudiy mo iyousigs Yowbad wanbunatum, sivines kid beiweigs.

<sup>22</sup> “Yam babaw Yowbad nilabeig, nagein gog bo mawan; ililabeig vagan kid baguyes gamaga babaw, takinew toul, o takinew guyaw; gamaga babaw wasigeis agulivan katanok-wan; mawan tasiyas palopits sisiy Moses nilivnakes, mawana yey agulivan; nag kid kweitan livan balivan; nag.

<sup>23</sup> “Mawan tasiyas kweiboug, yey alana, ‘Kadilok aban Kelis bigeg, bikanig, o kanig waseg mtowen biginikit, mo anilivan bwanabwein bimteilis nagamag min-Yudiy, wankuyeim vena babaw.’ ”

*Pawl igeiguy King Agalip waseg*

<sup>24</sup> Igawa Pawl illivan mawan, Pestos mo ilivan; aygan avakaein, ilana, “O Pawl, takabalawein

yākoum; peinan buk babaw kuvnivin mo kukwalawein.”

<sup>25</sup> Pawl ilana, “Nag akabalawein. Guntovek yākoum kukineig nanoug idumwal, agulivan moundid-wan.

<sup>26</sup> “King Agalip ikakina sinap townen, mapun nag ivag agumwasin, peinan nag itagouwaw sinap townen waseg; peinan bo ikamat wawtakon ven. <sup>27</sup> O King yākoum, tabta kusimounid tasiyas palopit asilivan? Akakina kusimounid-wan.”

<sup>28</sup> King Agalip mo ilivan, ilana, “Kudokeig yey kakita bamlavag Kelis nagamag, ne?”

<sup>29</sup> Pawl ilana, “Igaw tut kadiveiyov o tut kayakus, yakamiy babaw bukumlavags Kelis nagamag yakamiy, bo bwein. Yowbad ikakin nanoug bo māwan. Sivinag nagein bukumlavags māwana yey, yākoum making yākoum, simwey gamag tasiyas babaw niliganes aygag. O nag sivinag bukusiws wādeil; sivinag bukumlavags Kelis nagamag yakamiy, māwan yey.”

<sup>30-31</sup> King townen mo itamanaws siney Piliks o manāwen Belinis, sisiyas tasiyas nisinis bunatum townen, mo isaps. Sisiyas mo illivans, ilansa, “Taw townen nag ivag ansinap kalbaleb; nag kadilok bis-esuna wādeil; nag kadilok min-Yudiy beiweiy, nag.”

<sup>32</sup> Agalip mo idibek Pestos; ilana, “Magat gamag townen nag sivanan Sisal bikaluweg; bweina bitakaluweg vāgan bisap bein bininoun wannat.”

## 27

*Ikuks silmānin Lom*

<sup>1</sup> Ikaleiwags kid bikayabem, bakakuk, bakan Italiy, isekes takalikay nawotet vagan bikaymates Pawl siney tasiwuns deil mwasanin. Takalikay townen yagan Yuliyas. Natakanaviys nisesus. Meivek-wan tasiyas Ogoustos inabod.

<sup>2</sup> Katouw wag kaytan, meinoy neim Adil-amiteim bein ven wunsiyas Esiy wakawalaw; simey kakuk Alistak, gum-Masidoniyy teitan, naven Tesalonik.

<sup>3</sup> Neiyam nen mo kalug Sidon. Peinan takalikay townen isiwayoub, itam waseg Pawl vagan kid binek taliven nisesus ven townen, bimasis, asb-wabwal townen.

<sup>4</sup> Neiyam nen mo kakuk Sidon, kasawl. Peinan yag kalbaleb kanoy wangwanan sim townen Sayp-ilos.

<sup>5</sup> Wankuyeim kakuk kadoupouy awasas avakaein walasin ven yagan Silisiy o Pampiliy, mo kalug Mayl, wawnuwan ven avakaein Lisiy.

<sup>6</sup> Ven Mayl waseg matakalikay iban min-Aleksanidel siwag akitan, mo katow wag akiwen waseg, peinan kid bein Italiy.

<sup>7</sup> Singaya youviy to nakakuk; peinan yag meinoy neim wamitem; yam babaw ikous, mo kalug Nidas. Igaw yag nitotow wamitem, mapuna kayawatein kan wangwanan sim yagan Kilit waseg, kan kadounip silbunun yagan Salamon.

<sup>8</sup> Singay keikay to nakadavayal wadadan ven, nakan ee... mo kalug wamunon, yagan Munon Bwanabwein, kadiyakusan ven yagan Lasey.

<sup>9-10</sup> Bo kalasibwen yam mwasanin nein wankuyeim, peinan yag igeg, o bo ikous yam townen min-Yudiy yakamey kapsapos, bo tutan

yag avakaein bisilamaw; mapuna Pawl idibakes tasiyas; ilana, “Tawaw, bweina bitayeiwas munon towen waseg; kukin bitakuks, adok bukuyamkwanes kaydod o wag, o yakids babaw adok bitamtamats.”

<sup>11-12</sup> Tage taginiwag son takavaveis ilansa, “Munon towen kalbaleb; bweina bitadokons; kukin bitalugs kweitan ven, bo bwein.” Takalikay iligen asilivan tasiyas, ipiyev Pawl anilivan. Tabebaws-wan sivines beikuks, bidokons kid bineis munon yagan Piniks, mo bakayeiwas munon towen waseg.

Piniks wawnuwan sim to Kilit; munon towen wadon isekew wayals, awasas-nen isekew wayawat.

*Kalouvat bwaw avakaein*

<sup>13</sup> Yag yals mo iyagil, idokes bweina bakadavayal bakan Piniks, mo ikawes lon, kakuk kadavayala ven Kilit wadadan.

<sup>14</sup> Yag mo itet in wabomat, meinoy neim waven, singaya tawtoun, mamagina sinkawein!

<sup>15</sup> Ta-mawan bakakuk peinan yag meinoy neim wamtem, singay avakaein, mo mweg kweitan kakit kakuk mo isigogonem oko wabwanit.

<sup>16</sup> Kan wangwanan sim kakit yagan Kilod, mawotet singay keikay waseg kakatimwen kewow, in wakunuwatan wag, kayawen.

<sup>17</sup> Ikous, ikawes yiwayon, mo isays wag. Aspwayat wag kid bitul wakunabub yagan Silitus, mapuna kalug, mo iyalaves.

<sup>18</sup> Neiyam nen igaw itotow yag, ilaves kaydod in wabwanit.

19 Neiyam nen mo ikawes wuliyoug-wan wag, ilaves in wabwanit.

20 Yam babaw libgagay ivag; nag kakin kalas, nag kakin wutun, yag singay avakaein itotow. Kadoki bo bakamtamat.

21 Yam babaw waseg, nag kakamkwam kan. Kweitan yam Pawl mo itamanaw wamitem; ilana, “Tawaw, kadiloka bukuliganes aygag kweiboug; bitayeiwas ven Kilit bo bwein; tut townen bo tayagages, bo tayamkwanes youda babaw.

22 “Tage tut townen awoum beivag amipwayat, peinan nag bitamtamats; nag. Misinaka bitayamkwanes wag.

23-24 “Yey atapwaloul Yowbad waseg. Boug waseg gunaYowbad natakayob imekeig, ilana, ‘O Pawl, awoum beivag ampwayat; bo bukunek Sisal. O peinan kwanow Yowbad aygan, bo itam simwey tasiyas tababaws-wan, bo bikatin-abweimiy.’

25-26 “Kadilok beibwein amnamiy, peinan animis Yowbad; bo bikamat mawana nilivnek. Dawag gog bo bibilag wasim.”

27 Akweiy wik iyalavem wabwanit townen yagan Ediliy. Watapwan boug tasiyas wunataw mo idokes ven kid kadiyakusa nises.

28 Mo bitakwanes bwanit amawan vayovan; mo ivinis ovanin. Ovanim, ovanim, ovanim, ovanim; e, mo imlavag sinawey. Wankuyeim vayuwein mo itakwanes, mo imlavag sinawatan ovanim vayovan bwanit townen.

29 Aspwayat bakan wadaku, mata ge igulek wag, mo ilaves lon walivas wawawun wag; sivines kid ga-iyam.

<sup>30</sup> Wunataw inibwis kewow, ilansa, “Lon mwasanin bakanow wadabwen wag bakaley;” iyaweids gog, sivines kid bikalavis, bisawls kid bilisawemas.

<sup>31</sup> Pawl mo idibek takalikay sen natakanaviys; ilana, “Kukin tasiyas bilisaweids, bo bitamtamats babaw yakids. Kukin bisesus, bo bwein.”

<sup>32</sup> Mapuna takanaviys tasiyas mo ibwabwes vatulen kewow, ikalouw in wayol, iyetuwen.

<sup>33-34</sup> Wankuyeim kakita beiyam. Pawl mo iguyem vagan bakakam; ilana, “Yam sinawatan kweivas nukusesus, ikubukub nuwamiy, nag kukwams. Kadiloka kukwams vagan gog biyamoveimiy; nag aveiyag bivag, nag; bweinwan bitasesus.”

<sup>35</sup> Ilivan ikous, mo ikow bled, ikalin nuwan Yowbad waseg, initoug wantem meiveka gamag yakamey, bled ikiv, mo isilamaw ikam.

<sup>36</sup> Amnem mo ibwein babaw yakamey, mo kakam.

<sup>37</sup> Meiveka yakamey wag makaywen adagan, lakatuy sinawanim sinawey teinim tatanok gamag.

<sup>38</sup> Kakam, kakamuweip, mo kalev kan, in wayol vagan kid wag bikayay.

### *Ikatugulek wag*

<sup>39</sup> Iyam nen gaboug, nag teitan gamag iwtus ven townen, tage kaban awasas kakit alekel kakit nises; tasiyas wunataws idokes biyokons kid beikuks vagan wag bein wanuwan, mo bibilag wag.

<sup>40</sup> Mapuna ibwabwes yiwayon, lon kalisow wayol; kweiboug niyawanis avaveis naman



vagan awoum bigogewn kid, tut townen mo ilikus vitulen avaveis vagan bigogewn; kanagon mo isenas, mo kākuk silmanin kawalaw townen.

<sup>41</sup> Kākuk ee... wag mo itul kunabub waseg, dabwen ibilag, kaysay iwaway wag wawawun, mo ikatagulek.

<sup>42</sup> Takanaviys idokes bweina bikatimates tasiyas tasiwuns deil, mata igegays ge igalags mo bisawls.

<sup>43-44</sup> Tage takalikay townen sivinan biyamov Pawl, mapuna isilbwed asisinap; ilana, “Tasiyas kalisiy ikakins gegay kadiloka bikaspepel bineis wayol bigegays bingwayemas bineis wanakaew. Yakamey wankuyeim kaypap waseg mo bakagay bakan wanakaew.”

E, mawan sona mwamovem meiveka yakamey kan wanakaew mo kasap waven.

## 28

### *Kases sim yagan Melit*

<sup>1</sup> Kagalag kan wanakaew; ven townen gimgilis imeis mo ikavtagis siven yagan Melit.

<sup>2</sup> Tasiyas nag isinalemas, nag; bo isiwyoubumas. Amaloulun, peinan kweis, mapuna ilabemas, ikavlakes imakov, kakamunuw.

<sup>3</sup> Pawl in ikow amweilok sinivtanok, isen wakov, mwatet gog nises amweilok townen wanuwan; muymuyan kov isimkwen, isap, iged naman Pawl.

<sup>4</sup> Ven townen gimgilis ikines mwatet townen ikakuvatay wanaman Pawl, mo ilansa, “Mounid tawayin gamag taw townen; nag kadilok son

mwamovan bises; nag iw<sup>g</sup>wel wabwanit, tage mwateta n<sup>w</sup>awen mo iged, v<sup>u</sup>agan kid bikatimet.”

<sup>5</sup> Pawl ikatsap mwatet wanaman, mo ikaliva-  
tow, in w<sup>a</sup>kov; nag ikatoun, bwein-wan ises.

<sup>6</sup> Idokes kid naman beilol, o bikalouw wapwep-  
way beimat kid; ikayamats ee... nag aveiyag ivag;  
mo ikanavin ninous, idokes kid yowbad teitan.

<sup>7</sup> Sim towen gimgilis siguyaw avakaein Pubiliy,  
napwepway nises ven towen waseg; anbwabwal  
yakamey kasesuna ee... kweitoun yam, singaya  
ge isiwyoubum, guyaw towen.

<sup>8</sup> Misumkwey towen Pubiliy taman nises  
wabunatum, ikatoun, itak<sup>a</sup>lon won, mwaliyes  
isawel. Pawl isiw wanbunatum, initoug Yowbad  
waseg, isen naman w<sup>a</sup>won, mo ibwein.

<sup>9</sup> Wankuyeim takatounsa babaw sim towen  
gimgilis nimeis, Pawl initoug pines, mo ibweins.

<sup>10</sup> Mapuna isiwyoubumas bwanabwein, o igaw  
tutan bo bak<sup>a</sup>kuk mo itanouys wuliyoug makaw  
isekemas.

### *Pawl isap Lom*

<sup>11</sup> Tibukon kweitoun ikous, mo k<sup>a</sup>touw wag ak-  
itan nikayamat w<sup>a</sup>sim towen bulbweilim waseg.  
Min-Aleksanidel siwag makaywen antabuy mam-  
agina tawaw papap asteiy.

<sup>12</sup> K<sup>a</sup>lug Sulakous kases kweitoun yam.

<sup>13</sup> K<sup>a</sup>kuk mo kayeyewousa kayeyewous ee... mo  
k<sup>a</sup>lug Legiyam, kamasis. Iyam nen g<sup>a</sup>boug, yag in  
yals mo k<sup>a</sup>kuk silmanin Putiyol, akweiy yam mo  
k<sup>a</sup>lug.

<sup>14</sup> Ven Putiyol waseg kaban Yeisuw nagamag mwasanin, ilivans, “Kadiloka kumeis wam-abunatum, amabwabwal yakamiy.” Katam, kases katanok wik. Wankuyeim mo kanoun waked silmanin Lom.

<sup>15</sup> Yeisuw nagamag, tayakelesiys mwasanin nisesus Lom; bo iliganes livnem yakamey bo bakan Lom, mo imeis waked silmanin bakalouvat; e, imekemas ven yagan Apiyos Maket, o kweitan ven Buntuman Masis Bunatoun. Pawl ikines budan tasiyas mo ikalin nuwan Yowbad waseg, ibwein amnan.

<sup>16</sup> Kasap Lom, gabman mo itam Pawl nabunatum tatonen vagan kid bisikes son takanaviy teitan bikayyamat.

*Pawl igeiguy ven Lom waseg*

<sup>17</sup> Yam kweitoun nein wankuyeim mo idawes min-Yudiy situwaweiks bimeis. Ikatuyouns imeis, mo idibakes, ilana, “Tuwag yakamiy; yey makava asiw wadeil. Nag aveiyag avag sidayas wasigeis, o nag apiyev datammwayas asisinap, nag. Tage bo iyousigs Yelusalem waseg mo itameigs mina-Lom takaleiwags wasigeis.

<sup>18-19</sup> “Bo iyateleigs, nag go ibanenes agusinap kalbaleb, nag. Tasiyas mina-Lom takaleiwags idokes bweina basap wamnat banoun; tage min-Yudiy ilansa, ‘Awoum. Kuweiys taw townen, peinan takalbaleb.’ Mapuna alivan, alana, ‘Sivinag Sisal bikaleiwag.’ Nag sivinag bayateles min-Yudiy wamatan Sisal; nag. Gunaked kaditanokwan, ked townen waseg manoy.

<sup>20</sup> O silawun gunyatal townen sivinag bitalivans sigwey yakamiy, mapun to nadaweimiy

bukumeis waseg yey. Kukines agusen wanamag niyawanis, o min-Yisleil yakids tanmises Yowbad igaw mo bikatinabweids, o inawotet townen silmanin yey nasiw wadeil.”

<sup>21</sup> Tasiyas ikatimapus aygan, ilansa, “Min-Yelusalem nag ileles malet vagan bikatimlakemas livaneim yak, o min-Yudiy meinoy nimeis palawen, livaneim kalbaleb nag isekemas, liwon waseg o asilivan waseg, nag.

<sup>22</sup> “Sivinem bakaligen nanoum yakoum, peinan kakakin ven babaw gimgilis ivtokays livan sinap townen waseg, Yeisuw nagamag amisinap.”

<sup>23</sup> Ikaleiwags kweitan yam igaw mo bimeis biliganes Pawl anilivan. Yam townen nimeis wanbunatum, singaya babaw gamag. Gaboug isilamaw anilivan, ee... in kwayav mo iyakous. Yowbad nakaleiwag livanen nisekes. Moses nakaleiwag ivin, o tasiyas palopits sikaleiwag ivin, ikatimlakes wawun asilivan, vagan kid bismounids Yeisuw waseg.

<sup>24</sup> Mwasanin gamag mo iliganes anilivan Pawl, isimounids; mwasanin nag, ipiyaves.

<sup>25</sup> Ta-mawan ninous bilatanes bimplavags katanok-wan, mo inounas. Nakabiyokous Pawl anilivan mawana, “Mounid anilivan Yowbad Kululuwan tamumwey wasigeis. Palopit townen Isaya nikatipel nisekes anilivan townen-an.

<sup>26</sup> “Ilana, ‘Kunekes gamag tasiyas, kudibakes mawana:

Bukuliganes, tage nag bukukwakins.

Bukukines, tage nag bukuwtusis.

<sup>27</sup> Peinan gamag tasiyas ninous bo imouvit, bo ituy tiges; bo ikaw mites;

mata ge mites waseg beikins, o tiges waseg  
 beinegs,  
 bikakins mo bikanavin ninous,  
 bavages kid beibweins tasiyas. Nag gog.’

<sup>28</sup> “Kadiloka bukukwakins Yowbad anilivan bo nisekem yakamey, ikayabem, bakan tobwag ven gingilis bakasekes; tasiyas bo biliganes; e, Yowbad mo bisiwyoubus tasiyas, bikatinabwes.” <sup>29</sup> (-)

<sup>30-31</sup> Akweiy bweilim Pawl misik wanbunatum tatonen, peinan bo iyamiyis bunatum towen; nikaypuls siney tabebaws tasiyas ininekes, bo iguyes Yowbad nakaleiwag waseg, o ikatimlakes sinapun daGuyaws Yeisuw Kelis. Bwein-wan illivan, peinan nag teitan gamag isilbwed anilivan.

**KALEIWAG KWEIVAW**  
**The New Testament in the Muyuw Language of Papua**  
**New Guinea**

**Nupela Testamen long tokples Muyuw long Niugini**

Copyright © 1976, 1993 The Bible Society of Papua New Guinea

Language: Muyuw

Translation by: Wycliffe Bible Translators

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2016-08-30

---

PDF generated using Haiola and XeLaTeX on 21 Feb 2024 from source files dated 31 Aug 2023

517ae3da-6769-54e8-8afd-7d53f958558c